

麟原文集

王礼

文硕阁

wenshuoge.com

目录

关于我们	3
提要	5
目录	6
原序	10
卷一	11
卷二	13
卷三	19
卷四	25
卷五	32
卷六	38
卷七	44
卷八	49
卷九	51
卷十	55
卷十一	60
卷十二	64
麟原后集卷一	68
麟原后集卷二	74
麟原后集卷三	81
麟原后集卷四	87
麟原后集卷五	92
麟原后集卷六	98
麟原后集卷七	104
麟原后集卷八	110
麟原后集卷九	114
麟原后集卷十	119
麟原后集卷十一	126
麟原后集卷十二	132
麟原后集附录	140

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望可以帮助有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 集部五

麟原文集 别集类四【元】

提要

【臣】等谨案麟原文集二十四卷元王礼撰礼字子尚後更字子让庐陵人元末为广东元帅府照磨明兴不仕聘为考官亦不就江西通志载吉安人物有王子让而无王礼盖误以子让为名也礼工於文章着述甚富尝选辑同时人诗为天地间集【案谢翱尝録宋遗民诗为天地间集此袭其名盖陰以自寓】其名见於郭钰静思集中今已久佚维是编尚存分前後两集各十二卷前有李祁刘定之二序定之序谓其托耕凿以栖迹於运去物改之余依面蘖以逃名於头童齿 之际其文奇气硃礪胸臆以未裸将周京故也有与子让同出元科目佐幕府其气亦有掣碧海弋苍旻之奇及攀附龙凤自拟留文成然有所坐噫暗郁抑扞舌駢顏曩昔豪气漸泯无余矣意盖借礼以诋刘基然所评与礼文不甚似祁序称其蔼然仁义之词凜然忠愤之气深切恳至无不可人意者斯得之矣乾隆四十三年五月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

目录

钦定四库全书 集部五

麟原文集目錄 别集类四【元】

前集

卷一

碑

卷二

志

卷三

行状

卷四

序

卷五

序

卷六

记

卷七

记

卷八

表

卷九

传

赞

卷十

题

跋

卷十一

记

卷十二

哀辞

後集

卷一

序

卷二

序

卷三

序

卷四

序

卷五

记

卷六

记

卷七

记

卷八

铭

卷九

铭

卷十

行状

祭文

书

啓

卷十一

说

卷十二

杂着

词

题疏

原序

麟原前集原序

永新溪东北入庐陵界敖城谚谓楚相孙叔敖尝筑城然楚都郢去兹甚远敖既相楚恶得来哉盖臆说尔敖通作陂山聱牙蟠纠环回若城故谓敖城居敖城王姓最旧号宣溪王溪至是名宣因溪以号其族也王之老成人见称於国初者子让子让当元时举於乡为经魁从藩省辟佐主帅全普庵戡定江湖间志弗遂归隐号麟原然人不以前藩省辟官今麟原自号称惟曰子让亦犹宋尹师鲁非不有官号人惟曰师鲁以其炳着人耳目不在官号也子让既隐本朝治化聿兴有来迎典场屋文衡主乡饮宾席者辄避匿不就其所与友有云阳李提学希蘧洲原胡尚书山立皆以弗仕为心昔元盛际专假科举抑南士南士多伏藏用诗文自写至是与子让希蘧山立辈往还丘壑岩谷有为诗题子让所居者予忘首聯其下云当户雨苔双石峻隔江烟树数峯闲杖藜麦垄秋霜後樽酒茅堂夕照间闻有古书人不见柴门客去又常关观是子让甘寂淡乐幽僻托耕凿以栖迹於运去物改之余依麴蘖以逃名於头童齿豁之际无求於今有期於古可见也子让没有年其族显者今大理寺卿同节谓子让诸孙被荐入京者谦为族侄以谦谒予持子让集来不尽出予亦以病不及尽观其所出信手阅数篇至为吾邑作纲目书法老儒水窗刘友益後胤记复先庐慨仰春陵伯升文叔昆季复炎鼎引杜牧神尧能以一旅倾孤隋後世子孙不能以四海全盛力复河北深惜永叹之嗟乎子让其奇气硃胸臆犹若佐全普庵时以未裸将周京故也有与子让同出科目佐舒穆鲁主帅定吴越幕府唱和其气亦有掣碧海弋苍旻之奇後攀附龙凤自拟留文成然有作嘻暗郁伊扞舌駢顏曩昔气漸泯无余矣王半山云高位纷纷谁得志穷途往往始能文上句斯人之谓下句子让之谓论士者奚必以遇合与否较量抑扬哉同节愿予序斯集予谓同节文集有建大将旗鼓独出井陘口若淮陰侯者有合诸国从亲共入函谷关若信陵君者多寡惟所当今同节法理余暇手不释卷子世赏成童踰年宴琼林绩文翰苑俟他日合子让同节世赏所作为宣溪三王集岂不善予序焉亦以期焉赐进士及第通议大夫礼部左侍郎兼翰林院学士经筵官国史副总裁知制诰永新刘定之序

余与王君子让为斯文友二十余年矣始余友子让时子让方锐意科目眉目清耸举举异常人余谓其必为後来之秀其後果亚江西乡榜余又谓此未足以溷子让子让名誉当不啻此已而世故纷纭为性命奔走不暇音问不相及近一二年乃得再会於禾水之上须发容貌累累然其中退然其辞气卑卑然余疑其颠沛转徙随俗异化以故若此及观其所为文数十篇皆藹然仁义之辞而凜然忠愤之气深切恳至无不可人意者然後知子让之学与日俱进子让之气与年俱老而非变故反覆之所能沮丧者也余又观其易字子让一篇所见益高所处益下有歛春华而就秋实之义於是又知子让之学日近乎里子让之心日进乎道而非辞说工巧者之所能尚也呜呼丧乱既久平生友朋存者百无二三纵有存者亦不能以自力而子让独能肆志於学不废而益勤故其见於文章者如此余衰惫已甚无复有意斯世而独於子让之文有发焉故为书之岁在乙巳夏四月云阳李祁序

卷一

钦定四库全书

麟原前集卷一元 王礼 撰

碑

贛州路总管府判官王侯纪勋碑

今大郡古侯国也而政令之设施财赋之出纳军民之统治尤为繁浩必长克长贰克贰同德協共臂指同运则事无不举不然虽平世不能以治况抢攘亡纪之日哉贛之政可睹矣兵部尚书全公以选牧兹郡文武并用声威赫然越二年为至正壬辰蔡颖流毒江右搯于吉安间道由抚以窥贛四月据宁都於是府判官奉议王侯分兵讨之癸亥战猫儿石得间谍戮之甲子战小庄寇乙丑至葛坳三捷毁其茭舍夺其马丙寅战印山寇奔溃已巳驻兵女冠三方并进七战大捷是日复宁都获首贼范某及徒七十余人得所夺有司铜印一十有三万户金虎符一日遣部将迹残凶掠鬼岭越果子园斩首数百级擒伪元帅刘万户赖尽焚其巢一十有六乃命增旧城三尺陂万斛里以灌濠外置鹿角栅以备设护民巡检募集义民城内巡防者千二百人城外守望者二千四百人节钟鼓以知缓急未几寇再至再衄州民始安十一月又檄侯分府事於兴国既至县即调兵巡捕与寇逆於方石生擒二百人斩首百六十有奇死者不可胜计始葺城壁象十二次先是寇据方大官兵退次遂用郭鼎计分兵进屯宝石逼方大觜寇实虚卒破之招怀胁从失业者五百余户稍暇建尊经阁以诱士类曰教不可废也明年春会昌失虞复分治雩都以援之广设义兵千户所以聯其民习武以备用置斜站以报警棋布三堡於近郊为外防建钟楼县治之左以明禁令矚奸慝二月复会昌三月援瑞金怀徕石城归正者十五砦调兵饷士赉勤罚愆书牒坌集辰至已决业业然如奉漏卮沃焦釜十一月戊辰贼数千自循梅来攻雩都侯躬率衆扞城上发矢如雨殪其十之一明日寇益张编竹箕骈负以前矢石不得入于是冶铜液以灼之遂大溃初雩都未有城侯命属官毛荣胡思恭吴溥龚昂廖谦杨贵德先後督成之不五月而竣事高厚为尺十有二周环里计者五为门凡六各为楼缭以甬脱六十有四於时苟安之民睊睊若可缓者至是贼乃环拜曰再生我者侯也新城之力也不然吾属无死所矣既而窃相告语侯频年劳身竭思使我民得以饮食事育繫侯之德甚大况雩学之新侯功为多而古者议政必公於乡校若琢词其中足系无穷之思且庶有劝于後也乎侯闻之曰无以为也讨贼吾職所当为幸而成功者圣天子其仁如天之福也兵部公卧护坐筹之胜算也况宁都之役时则有若府史危诚孚方泰亨千户法昌贛县主簿巴延彻尔郑秉忠道拉实兴国之役时则有若府知事程瑞参谋郭鼎摄邑事孔雀努林昶雩都之役时则有若府史王尚文徐行摄邑事县丞和卓典史胡思恭务使龚昂教谕吴溥等皆有折冲之劳供给先後之助焉吾何力之有衆皆再拜称叹然卒以为不可已乃窃具功状以文属礼礼惟贛以伉健之俗虽治世难尽绳以法乃不敢乘昏浊自肆俛首听约束效智力非兵部公文武威明临照於上非侯经营於外以抚之未易臻此又尝经其战伐之地睹山川险壮闻父老道侯行事感其志节故不辞而乐书之侯名荣忠岳州人系以诗曰帝式万国深

仁久安蠢尔蔡颢獫狁其间民不知兵忘战忘守言言贛城如虎斯吼长有大贤贰克同心匪我王侯提师孰任闽险粤岩倚声藉势道远应迟分府往治既往治之小大是倚爰誓旅徒勿怖勿疑维此羣丑乘时披猖侵掠我土诱奸胁良并力齐心我荣彼辱良者致归奸者同戮汝拏汝旗汝伐汝鼓赏功联曹罚过逮伍军士私语凡言必酌各尽乃力毋俾悔尤旆旌扬戟矛耀光竹矢檠弓洵直且强我师震之谷响川应执讯凯还风息尘静迨我闲暇修我陴墉浚我濠池曷售其凶居安怀危顷刻靡懈衆人嬉嬉视我反怪迂治无常念乱若一弗问弗事民谁与恤子孝臣忠雅言所存行义或亏惧侯有闻山成其高水就其深为民之氏为国之琛我作铭诗宜志宜史達於帝聰用锡蕃祉

贛州重修孔子庙碑

贛通守杨侯偁叙兴学本末遣文学金友德过庐陵以书属予曰贛学创于宋庆历而再造于绍兴宏丽甲於江右元元贞丙申复改作之癸未鲁侯至道一新旧观于是廿有五年矣时艰事殊坏于兵乱丙午夏令中书右司郎中张公民瞻来参贛卫军事始至谒先圣先师于庙见其颓弊弗支顾瞻太息慨然思以为已任明年四月即捐已俸鳩工庀徒由礼殿廊庑暨奎文阁撤腐易新盖甃堊丹外之灵星泮池垣墉桥道内之冕服貌像?幙秩封靡不完美自先圣配享从祀而下坐列有序五月己卯始事踰月丁未卒工上不勤官下不动民视平时糜廩粟帑财以为文具者相絶矧今贍学之粮移资军饷非公笃尚儒术营度有方夙夜匪懈曷克臻此蒙等免于劳勩而受其成思琢石视後子其为吾书之余惟古今治乱系乎风俗醇漓风俗醇漓系乎学校兴废方其治运休明家给人足固以学校为首政况乎师旅丧乱之余纲沦法斁之日兴学校以正人心岂非先务之急哉公之是役可谓知治本矣抑兴学校守令责也公官在戎阃以武备为务苟兵戢民安即不旷其職乃能汲汲及此则材识过人远矣使贛之士来游来歌愀愀济济讲遗经以致其知遵圣训而敏于行兴让兴仁为邹为鲁俗无伉健以不负兴国美意实自兹始礼儒士也儒宫之成职所当书况请之勤勤又乌得以固陋辞遂为志之而系以诗诗曰

於穆夫子 师表万世 天地与参 四时与契 载瞻睟容 有肃其地 召芟犹思
胡此弗治 既曰治之 曷又戾之 侃侃士子 行已是思 四端五典 大道孔夷 曰权曰数
冒邪抵巇 兴学之初 崇美庙貌 成德達材 聿观其效 勗哉士子 知至思行 步超贤圣
见于墙羹 章贡沄沄 空同郁郁 倬彼儒宫 垂教罔极

麟原前集卷一

卷二

钦定四库全书

麟原前集卷二 元 王礼 撰志

邵巡检墓志铭

君讳南字道行其先本姬姓系出召公世为燕人後迁河南在宋尧夫为河南族厥後复徙河北天常至本朝有曰进者金侍卫後奕军籍于君为曾大父又家广平威州古宗城也居郡城西北隅大父讳信娶李氏二男子长公良字政卿次忠良字干臣又居北门外治先茔于城西驿道之北凡五冢後复迁于城东北上世俱隐德不仕忠良始受部符任钱谷官配栗继刘宋李王凡五氏男子四君其长也次庸道中次成道修次通道亨君由国子监生举呈翰林院既试捧中书檄充淮安路安东州学正考满勅授贑州路雩都县印山巡检历两考代未至卒于官寔至正壬辰十月初五日也生于元贞乙未享年五十有八娶张氏子三人思孝思齐思远女二人刘嗣古赵秉彝其壻也孙男三人江汉汝君之没也江淮驿骚不得归祔于先茔权厝贑城之外思齐闻予避地雩阳具状稽顙涕泣而请铭予哀其孝思不敢固辞受状而读之君平生事父母孝母氏蚤弃世事继母四人愈谨无间友爱异母弟加厚葬族之不能葬者十余丧仍抚其遗孤性笃厚乐易友谊尤深皆可书遂铭铭曰

公爽于周系姬自邵其采邑後为氏由燕跨河几历世文献寥寥属焉志大贤之後羽林士丰啬相承君始仕才多龄寡嗟莫致垂庆後昆尚昌炽

郭会可墓志铭

呜呼医能以仁存心若郭君会可者真百一千一者耶何可得也前二十余年里永阳有佣于贑之安远者至雩都病革舟人出之水滫一息未絶如缕君过而怜之舁归家冒衆口非诋不顾躬眠药剂饮食之宜既愈给道里费遣还其乡佣人感更生之赐称雩郭大医不离口闻者传诵谓世诚少斯人也又迟之十五年余举进士筮仕安远道雩闻郭明善精于医同郡太和人也始定交焉其後余侨寓於雩则与明善日密矣一日明善求余铭其尊人会可之墓昉知佣人所德雩之郭大医者实会可也使世有仁医如此余犹将求其名氏而传之矧有子亲厚于余其敢爱一言耶按状君讳元亨字会可世家太和鍾步曾大父讳某大父讳德庆父讳祥叔俱业医俱善士会可始游雩其道日行遇故旧倾倒尽欢坐客常满所识穷乏者间移贷营什一类不能偿君亦不较人以疾请不问贫富远近即驰视之日四五往不懈未尝责报而或賙之者以为常非独水滫人也後家日肥迎养其二亲亲歿归葬故里襄事有丰无俭姻族称之为难晓畅地理爱雩之百丈塘有古?记语其子曰异日必归我於此死之岁尽会亲友与诀居无何得疾蚤作衣冠而坐历历区处家事毕曰吾逝矣竟不起至正甲申九月十六日也享年六十有三娶袁氏有妇行後君十六年卒男二人明孙德孙德孙明善也女三人壻邹彭萧

孙男三某某某初以陰阳之忌权厝于里之近今卜某年月日改葬遵治命焉铭曰

雩山之峯云油然兮下垂百丈之塘水鳞焉兮沦漪厥藏既安诏後允宜千岁之外知其为仁医之墓尚封崇之

照磨王公墓志铭

公讳思道字国宾姓王氏宋绍兴间卢溪先生庭珪修谱具载金地长者十一孙大光冢子六承事徙东向以是徵之公东向之系距长者十有九世矣曾大父仲繇修眉丰頰垂手踰膝治生勤俭而家日肥年近百岁大父必先克承志业慕靖节恬退之风性喜植菊丞相杭山章公监字其亭曰晚菊父宗元尝试艺不偶遭世易思自树于乡间浮荣不复动其心妣某氏公自少诚笃有容语不妄出性至孝弱冠以推择为吏念一弟远宦于外祖父高年不可劳于户役即而家居日以奉亲干蛊教子为事兄弟聚处无论亲远贫富一不以户役累之而驱驰因控身任其责宾亲至者必倾竭尽欢座上常满不厌儒有儒不自立者奸人从他邑移文媒走卒及群无赖为欺侮公力扞之甚者根拔其风遂熄人蒙其惠到今元初法制未一點吏复乘之以奸民困徭役公乃义以济之首捐田五十亩倡以次出有差共得田二百五十亩岁收粟五百石以供科役未歛时用有不给辄先贷之而後取偿不以岁月规息利公赋首办而吏弊无所施纲维其间者三十年野无叫嚣之卒里多足给之家于是隣境闻义徙宅来依者六七今皆长子老孙矣乡隣有不平者小而壤地婚姻大而鬪争死事无不诣公求直则悉理以开谕公以处裁无不心服以退无复踏邑门者凡游食无良之徒喜使酒尚鬪然闻公警欬即远引避不敢过其前已巳至壬申连岁旱饥公竭诚祷于延福河江之神每瓢水以归云雨随至民赖以全活者衆三江桥兴废不时来往病涉公见富人有欲修释典报亲者辄讽其莫若捐田贍桥其福田殆甚于彼闻者信从积助田得百四十以共修葺经费谓其本于报亲也名之曰白云桥所居邻小溪人称为溪滨居士天历间有荐其才授东平两军照磨适丁父忧制满越明年卒生宋德佑乙亥歿於至顺甲戌九月廿三日享年六十配刘安成着姓也弟国辅游状元所寄黎公之门从乡先生罗静山受业学优而仕声誉蔚然皆公力也子男一人贞以易试连不得志於有司遂就校官选终平江学正女三人壻刘齐方李所先郭立心孙男五人震允益志同益历潯州静江教授补分省掾同罗鬼宣抚司奏差女一人葬公於里之小女坑戌山辰向公卒之後二十年奉训大夫顺元宣慰司副使范公汇尝状其行谓公处宗族兄弟极其雍睦而宗族兄弟怀其厚处乡里姻朋尽友助之道而乡里姻朋莫不服其义御下以诚而小人输其情接士以礼而君子尚其德处事则公正谐世则谦损其孙允力学好修深惧先美不章将泯泯无以示後遂以状来请铭余惟公行义孚于一乡者隐然与王彦方同科铭其可辞乎铭曰

惟古於民 岁用三日 世远风譌 尽瘁徭役有能义田 卑高计力 吏弊自除
公赋自给 鋤强植弱 护里如璧 有拂於膺 望庐求直 诚以折之 鬪忿冰释 弭灾利涉
惠泽非一 嗟嗟彼苍 胡不憖遗 胡不百年 俾乡尔师 我铭幽光 孰其齐而 所谓伊人
古之人斯

游杏隐墓志铭

君讳从善字性初永新人也永新番禺段为士族有由科第起家至银青金紫者其近有游氏世医小儿人称为游小儿家君之祖本段氏赘而後于游曾大父某大父明叔父圣传世守医业君幼明敏兼精大方脉知义理喜吟诗胸次出乎等夷有以疾苦告辄惻然动中风雪暮夜不避不以贫富异其心于窆者尤加意焉予之药屡视问不倦既愈然无德色常活艰危於他技穷蹙之後故疾笃者率曰得游公一视虽死无憾盖用药权宜不拘拘泥古如婴儿患噤口痢食辄吐忽鬻饴者过门儿索????父母有难色君曰????本谷藥所成食无害且恣其满餐诘旦视之饭无噤矣其于理冥会多类此君不幸蚤失恃衔哀没齿事父愈竭其情世父高年食贫君事之如其父存顺没宁悉躬任之乡里尤以是多君平生喜地理家术居屡迁最後得里之大湖山有林泉之胜遂营筑以老焉左图右书古帖名画轻裾长袖与宾交清谈其中或焚香瀹茗或酒酣豪歌亦不自知其乐也一时名胜莫不有湖山归隐之咏乱定思再构于湖上未遂而寝疾以丁未五月二十三日卒於湖山之隣寓得年七十有三配吴氏先君二十二年卒子男一人绍曾克世其美女五人适吴适尹适龙皆望族余幼孙男一欲其继家学命之曰师岐卒之岁腊月窆于秋陂河西岭遵治命也後之八年其嗣子以里之老生胡性仁状君行来请铭余尝恨未识君尚忍固辞抑余闻游之先居烟市通衢往来穷乏者随力赙遗一日有道者来过授以截疟治疡二方用之神效居三岁而去临别谢曰吾为若累多矣然明年若将有大难吾遗若信香遇难焚之吾将复来明年果岁大饥殍者求食食之毙里凶猾诬以杀越人于货公入其词将验屍仓皇焚所遗香道者复至闭一净室而坐已而死者更生行步如飞其祸遂寝开户求道者亦莫之见呜呼传记载与仙遇者盖有之矣然类多长者积善之家岂好善优于天下者仙亦愿之耶将列天上官府者亦皆古忠义之士耶观君当丧乱流离而家独完人肝脑涂地而独考终命庸非天之报施善人而仙遇之余福耶乡人称之曰杏隐当矣宜为铭铭曰

积善之家诞与仙遇遇仙之人厥後允裕如杏隐君活人孔庶既濬其源亦演而注大湖有榜秋陂有阡子子孙孙庆垂以延

罗浮翁墓志铭

呜呼浮翁先生不可作矣复欲求典刑如浮翁淳笃如浮翁敦不倦如浮翁胡可得也初延佑甲寅科兴一时海内之士争自濯磨以効用郡以先生通春秋大义起应诏战艺失利归而学易丁巳在选中时吴文正公典举读其经义叹曰深於易者于禹鼎赋则云学邃而词骚气逸而义正驰骋乎屈宋班扬间赋中高手也至时务策则云学有体用治有本末识时务之俊杰也悉批于卷自是声誉蔼郁静山翁晚节末路赖以怡悦明年会试于京师志未遂当道援例以下第举人保充江西宪掾先生不就惟思授业以淑後进为养亲计而已其海门弟子也必孝弟谨信志学慎独也必格物修身亲贤信友也必正谊後利崇德修慝也问辨讲切岂徒词之末哉故今年之塾館甫定而嗣岁之聘币又交至矣至正辛卯淮甸弄兵郡守丁中宪梁亚中犹聘先生职教郡庠以正人心越明年警报日切自书台移家泮之诗人堂後二年甲午患虚弱之症以卒二月四日也享年六十有九卒之後二十一年代迁世远其子尚观始克状先

生懿行授礼俾志其墓而铭之窃惟弱冠尝拜先生知其平生一二既又与尚观同举於乡好犹兄弟谊不得辞按状先生讳振文字弘毅姓罗氏晚字罗浮人称为浮翁世为安成儒族曾祖某祖某父士琥字西玉号静山俱有隐德先生性孝父母有疾必置小床侍亲侧以觚寒燠饥饫而顺适之卧不解带母彭夫人嗜果与饼岁得修奉尝易以奉之迨二亲之歿也姻交会葬者率数百人娶李氏有妇德朋田着姓也先其君子廿三年卒後合葬於章塘面辰背戌子男三人长尚观贑州龙南教谕次民观县庠训导次正观女二人俱蚤世孙男七人继修继魁皆袭儒业余幼所着有大易拟议十卷四书集大成四十卷诗文杂着五卷呜呼大化之推迁虽参差不可究然近世以来势力之翕赫者往往随时变灭而诗书之泽绵绵延延将替而复振岂天於善类终闭惜而睠顾之耶观之罗氏可验已抑礼尝闻静山翁年高德邵虽怨家子弟亦深教之有寄以银酒爵久而忘取岁晚归之寄者反惊愕叹服其诚一日憩汉江桥有遗雨盖紵丝囊盛楮币六十千者辄命小僮荷而俟遗者至而德之其忠厚类此子孙之食其报岂可涯哉铭曰

积之丰发之约尚裕其後人星其斗山其岳

孙母高昌氏墓志铭

孺人辉和尔氏讳额森德济系出高昌敦武校尉零都县达噜噶齐阿勒呼木之女亚中大夫临江路达噜噶齐哈斯资善大夫海北道监司道拉齐之嫔也初世祖皇帝之下江南也其先与有劳焉簪纓之盛甲于他族零都君以孺人稟性仁厚择南士孙庭兰妻之庭兰之先以科第起家为县令零都称閎闳者首之适孙三年庭兰没年甫二十有五植遗腹矢靡他子既入学择明师奉之尽礼抚同室孤遗如已出经纪家事井井不紊後之三十年屡抱孙矣邑之父老始上其事求旌异以善俗转闻於朝属乱未报而孺人以病终实己亥之岁二月二十八日也死之日族姻隣巷仆妾无不恸哭失声得年五十有九男一人本立妇刘氏孙男二人兆元兆麟女二人越三日权厝于城东经堂之北弗靖故也卜某年某月某日改葬於某本立具状稽顙再拜以铭为请余惟女之归人犹臣之事君从一之义弗可渝也古则然矣今之禄食者果且有取於此乎果且无取於此乎铭曰

维高昌有後倬彼姱节维君子有仪式延其泽于嗟二三士也慙德曷不观此千载星月陵谷有迁斯文不灭

萧母王氏墓志铭

从甥萧权以洪武八年某月某日葬其母夫人于乡之【阙】原涕泣来告曰先母年三十三先父弃世业薄系单人惧其无以自济先夫人节衣缩食勤俭自持处亲族无一间言宾友至者有能诲权以礼谈订经史辄设共具款留之遇隣媪穷乏宁忍饥推食以食孤灯织紵卒夜分乃寐养舅姑以至於葬祭无不用情尽礼虽寇盗冲斥未尝废事移志至正甲辰辟地流江得疾以没权厝于其里日迈月征倏焉一纪始获妥灵之域于里之近龟策习吉念权虽未有树立以显扬其亲然粗不失士检乡人以为子弟矜式皆母力也今幽堂将开而先美无传人

子之罪重矣铭墓之文非舅氏谁托礼尝欲着夫人行义以传後垂训属迁革靡宁弗果矧兹有请可默焉不纪其实耶夫人姓王氏曾祖某祖某父桂芳妣萧氏年未笄归於曲山萧如春俱世族男一人即权女一人蚤夭享年五十有三铭曰

老不可偕嫠焉孀居惟勤惟俭载究载图上以有以终其亲下有以植其孤俯仰奚忤九原有以报其夫可不谓贤者乎呜呼

李母刘氏墓志铭

唐西平忠武王之十七世孙宁孙既葬其母夫人刘氏之後每见余辄戚然道其母平生悲不自胜若无以报罔极者今年夏五余至其舍竹林夜语跋涉世故泛及其私又蹙然歔歔以叹曰宁孙母刘归先君子为继室时大母刘夫人在堂宁孙上有二兄前母朱氏所出母氏事姑尽孝抚诸子诸孙尽恩自闾以内葛裘盐米醴醪饔飩孰冻孰燔孰社孰臠孰凿而老孰斲而农孰时以荐孰胙以烝先子未尝寓目焉饥斯食寒斯衣宾祭斯豆觞共具而已迨宁孙生甫四岁二兄受室而先子弃诸孤母氏悉以家业付二兄主之常曰宁孙方在幼後来成立与否恶乎前知惟天惟祖宗所以笃佑李氏何如耳吾奚纖芥厚薄之私乎拊育均一族姻称贤母者母氏弗外焉至今保姆能谈往事历历然墓草四易矣未有石以纪先美将子是托其母我辞继读前乡贡士孔君济所述李氏世节堂事蹟称夫人年三十而偕老分乖理家有法子孙日就冠婚中更世变黽勉力持至岁丙午夫人壽六十有六矣腊月五日实逢初度阖门四伯余指尊卑以次捧觴上壽环拜盛礼群从之长者有进而言曰是日乡间载清衣冠咸集绳绳蛰蛰堂陞若不能容此高年盛福天所以报夫人四十年贞苦之节也夫人歛容曰我何能几是皆太夫人遗泽所及太夫人盛年孀居抚子侄以成立扶持门户五十年而子孙蒙其成以有今日若夫从一之义家范是遵直饥食渴饮然常行之事耳奚足异哉嗟乎若夫人者可谓加于人一等矣铭其可辞夫人汉安成侯之裔世居安福上城曾祖某祖某父某母某氏归庐陵醪溪李氏则生于【阙】辛丑之十二月卒于洪武己酉之五月享年六十有九越二秋始克葬四年十一月十二日也乡曰永福原曰白鹿子男三人壽孙元孙宁孙女五人壻高方升陈西金刘子节彭立贤汤子敏孙男八人曾孙男二人铭曰

吁嗟嗣母先後一軌孰无町畦视同一体伯奇休徵百世能几逆生於私家政用圯于嗟淑人氏刘嫠李既失所天所从者子何厚何薄哲妇有泚慈孝且贞萃此三美裕後报之彼苍谌只无媿斯文于以代史

夏仲贤墓志铭

夏氏之孤有曰璉者因其塾宾王洵衰絰来见以儒士胡驂所述行状一通稽顙再拜请曰先人不幸今年六月十二日客死青阳璉奉柩来归窆於里之石屋则九月廿二日也痛惟先人辛勤以植家正直以禔身而涉乱日深没没无显于世今虽慎其终矣未得闻士文墓何以绥九京之心而追不子之罪也敢丐志铭于先生余吊而谢之取其状而读之君讳日富字仲贤庐陵长乐里人也曾大父以巽大父廷介考志和妣汤氏昆弟三人君伦次居季伯仲二兄蚤

世君与叔氏抚其幼孤皆巍然成立待同居子壻惠爱均平治家勤入俭出未尝少懈体干修
耸而退让若不胜衣然性蹇直为恭不能伪言有弗循理者辄辨折不辟虽所敬畏亦必微讽
之使免有瑕谪乐江湖善交友北方士大夫喜人质直故亦多君君尤重然诺常训其子曰吾
与其易诺而有负也曷若慎许而言出不食之无咎也璉之侍随於外闻名公硕儒必使踵门
求益人亦称其善教子也洪武七年以次子瑜久在青阳动念往求之既至居三月病未十日
而卒青阳簿聂希喆遣子相璉以归其丧其得于人人莫如此享年五十有七娶韦氏善综理
其家日为兴门男二人长为璉次则瑜也女二人壻王志在貳室次胡某孙男某某嗟夫人之
生世若仲贤者无困拂于前有华耀于後视世之贵富黜终者不为优乎况王胡二君俱信士
言不浮且谓仲贤有子执丧尽礼非庸衆人所及是足见其家教矣宜得铭铭曰

嗟仲贤何拮据惟俭勤秉为则慕陶朱济丰缺守其谦直不讦慈恤孤公应物胜千诺重一默
时之人翕附热艷浮荣耽冕绂宛兮离蔓缠骨泚行人首丘隔谁如君返乡国藏佳原石屋穴
面坤流练萦折裕後昆延世泽我铭幽名永揭

麟原前集卷二

卷三

钦定四库全书

麟原前集卷三元王礼撰

行状

德庆路郭推官行状

公讳某字民则姓郭氏庐陵人也系出汾阳王之第九子金陵府君府君仕于吉因家邑之麻江五世祖某徙葛陂在宋以科第显内附初科诏未下至大三年公游京师集贤院以茂异举皇庆初筮仕济南学正既至即访求硕儒以新学校得张公起岩师表後进延佑科兴张以明经进士魁天下士类益服公之知人已而东昌分宪以公性行温纯问学博洽保充馆阁之职铨曹奉行不力公亦以躡等辞至治间授浚阳路安抚使司高丽军民总管府儒学教授历两考陞将仕佐郎永丰县主簿任未滿丁内艰居丧尽礼吊者悦服服阕或勉之仕则喟然叹曰始也干升斗之禄为养故也自今以往其无意于斯世矣况敢希荣名之宠乎改两浙都转运使长林场司丞竟不赴後选充京城义储仓使公府催迫上道比到官勤谨自持五侯七贵气稟之供入薄而出厚隳私以偿公处之晏如无几微见于辞色迁福安州判官以乡里亲旧所在杜门息交六载如一日州之长王侯德贞廉洁士也无得而少焉後以徵仕郎任兴国经历省臣辟充理问委赴江西求援未报而湖广?遂留豫章朝廷以淮氛滋昏道路壅隔命行省便宜铨注又有德庆推官之命国步险艰而公由是勇退矣礼闻公神情萧散美髭髯孝友根乎天性子弟有片善獎借不离口世虑澹泊而交谊缱绻宾旧过从歌咏倾动于骈俪之文尤敏给使朝廷用举者言真之清要必黼黻皇猷克称其职何至驰驱簿书以老令人有用乖其材之恨哉呜呼恻矣故老于今落落矣公生于【阙】丁亥没于【阙】辛丑享年七十有五父肇庆府君赠从仕郎高安县尹母刘氏李氏俱赠高安县君妻涂氏封宜人壽八十而终子男三人子年子明子礼女一人在室孙四人诸孤以其年腊月葬于里之泉江山五年後余过葛陂公之冢子与余有故幸氛祲之始清慨谱乘之沦落俾状其行以俟求铭于先友之相知者礼惟终慕之孝有不可辞故次第其槩以为之状云前乡贡进士广东道宣慰使司都元帅府照磨王礼状

涧月居士胡君行状

君讳履辉字清翁吉之太和禾溪人也其先五季时由长沙辟地徙于吉派别有三孟为值夏之胡若忠简公铨其後也仲为南城之胡策庆历第六年仕至朝奉大夫衍者其後也季为禾溪之胡分徙黄漕若进士南城丞笈暨居和溪者多其後也曾祖必举字伯俊妣龙氏祖士茂字国秀归附初以豪俊靖邑里人称古涧先生妣刘氏父元永字宗远一字东隐妣萧氏陈氏君初生时大父梦月堕掌中命名曰月比长明敏颖達干蛊用裕公私酬酢轻财倜傥弛张合宜遇事即始见终通变不拘语儒不流于迂语吏不期于刻理较曲直不苟挫于人卓然能自

树立思大其家声居当孔道迎送无虚日不倦力虽後人丰贍富积无远识者恒下之人谓东隐为不死念父没抱不终养之憾事祖母刘尤竭其力寒燠之候滑甘修灑之奉必躬视之母萧氏先卒奉继母无几微不用其极兄弟四人君处其次佩服先训聚居尊礼堂友恭怡怡始终如一季弟履宁实陈氏出也观光京国屡易寒暑而无离忧者知兄左右尽养犹已在膝下也陈年踰八袞遭承国恩赐帛公率昆弟子姓升堂奉觴为壽潘輿莱衣焜煌後先欢洽三世乡人荣之胸次和易爽朗如春风秋月不为崖岸险絶与乡邻处纷难以解衅隙以平里有巡徼从政者必赖以为治焉所居郭家渡旧有徒杠横跨汹涌先世所建君继志修理行者德之若闲林寺重修清福庵崇道观特建混元坛割田树碑立祠奉先以托悠久非求福田利益也中岁以生齿日蕃先庐不足以容乃求地溪东卜筑杜山之下幽蔚夷旷翠合青回储书有楼弹琴有室又辟南斋以聘师训子为先务列置诚斋杨文节公福荣堂记焕章阁学士艮斋谢公儒林精舍记及祖若父墓文诸碑刻之存者于庭复辑録诚斋艮斋文信国公须溪刘太史青山赵先生麟洲龙先生诸名胜与先世往来词翰序述暨忠简公遗帖古涧吟藁尽刻梓以传名曰胡氏流芳集其拳拳诗书门户诒厥孙谋类此晚别字涧月因以名堂示不忘先祖梦兆也搢绅先生喜其名实相副若吴草庐龙麟洲夏果斋虞邵庵而下为词咏歌之者累百篇又作庵于居侧取赵文敏公子昂所书蓬寓二字榜之性酷嗜古书名画精于鉴别暇日与子弟择其尤善者类分而贮之以资玩览花时月夕觴咏怡神乐其余年而时殊事异有足兴慨者矣于是属其子弟语之曰古今治乱相乘验之前史可见承平混一几百年厥今四郊多垒履霜坚冰其可忧者乎吾氏之居此土忠厚传世殆非一日達而在上立乎人之本朝则当抗言极论不避权奸以忠简公为法穷而在下无民社之责则当保障乡曲毋纵反侧以古涧公为法况我里当义山遂水之冲冥顽之斩木揭竿者日相继也乡党宗族之所依祖宗坟墓之所托保庇之责其容可後乎散储蓄聚丁壮絶奸恶滋蔓为官府藩维正今日事也汝曹试思之君今捐馆已十年陵谷之感何限而令子屹然砥柱中流使乡里按堵如故是岂偶然也哉君娶岳氏宋进士衍之五世孙也子男四人长志楫初以军功授巡检次志安继兄履坦後次志道志德继弟履常履宁後女二长适刘次适岳孙男三奎焕倬公生乙未二月九日歿於至正丁酉四月八日葬於所居之後呜呼以君之才之识使当贤智驰驱不足之日得效一官任一職岂不绰绰乎有足观者而竟齎志以歿为人才世道惜者能不恨恨于斯乎礼之里违和溪一舍而遥知君家世旧矣又尝与君之子游益得君平生梗槩故序述其行俾得藉手以请铭焉光幽发潜仁人君子必有哀而赐之者矣谨状

李教授主敬行状

曾祖长翁

祖崇甫

父翔飞怀集教官

妣刘氏

君讳主一字主敬姓李氏庐陵朋田人唐西北忠武王晟生岭南节度使宪宪生宜春府君游游家宜春至孙服应南唐三经科始迁庐陵朋田累徵不仕赐号三经处士盖自宜春徙居吉者衆朋田则处士之系也吴文正公题其家乘曰西平十五子南土百千孙墨蹟具在世业儒由科第起家者累累有焉君少负奇才俊气登祝融历长沙窥九疑慕圣贤之遗风考载记之往迹一时名士鲁樵云巩志道贯子素燮元浦杨伯谦辈深器重之邂逅湘潭倾情输胆挥觞落笔明日传诵得声吴楚间岂过情哉尤为广西元帅章公所敬举充阳朔校官不就後试吏宣城存心及物上下宜之适丁外艰後复归湘潭子弟从者益衆方养晦待时而世事有可慨矣壬辰还乡奉母避地既而母夫人以疾终犹能葬祭尽礼於奔窜之隙人以为难乱定卜筑枫林之间以老学者称之曰枫隐先生登山临水耕道猎德若将终身焉已酉春会明廷遣使求贤罗山络泽无远弗至咸又以君为举首後郡守王侯君泽以吉为江右名郡非得闻望老成不足师表学校遂力起君为郡博士在職寬敏屡以公委至京遂感痰暈之症既愈复作卒於家洪武六年十一月廿六日也享年六十娶胡氏男一人汝善女二人继胡氏男二人欧生归生女一人壻安成周某越三日诸孤以君祔葬祖塋之侧违所居近百步同邑王礼於君为斯文契既往哭之其子涕泣请书其行因念君平生劬学思自见於当世遭时多艰賫志以歿死之日家无以为葬伤哉贫也然论其为人非寻常可及而到君事大父极其敬顺大父临终抚其顶曰孝哉顺孙吾必陰报汝克昌於後君亲丧未除二弟沦胥以逝教养从子切於己子今皆成立重然诺一以意许知已生死不相负经指授者槩可观输忠犹恐弗尽自今观之复求如君晨星霜木矣岂不重可叹哉有集曰秋山樵唱为文随事说理稳稳有至味诗歌发扬清亮寘之高岑间殆伯仲也艺之末者余尝取而传之世躬行之实不无望於当世立言君子焉姑述其行以授其孤俾得藉手以请云谨状

教授夏道存行状

曾祖元巽吉水县学教谕

祖雷亨故不仕

父吉先故不仕

妣萧氏

君讳霖字道存吉水人也先世居金陵宋建炎中始祖泽以刑部司门郎从孟太后南迁至吉水因家焉世业儒在宋有父子相继入胄监者在元有父子同中进士科者故里有联魁坊君幼颖拔异群儿卓有远志读书尝至夜分父母忧其劳勸止之伺母夫人既寝窃灯烛入帐披吟不辍稍长侍亲往教亲有所适即检摄同辈莫敢嬉戲如亲未出人已奇之二亲之歿也祭葬尽礼金谓夏氏有子延佑癸亥从兄仲善以易经举於乡君益励志于学思并驱齐驾遂从季父明德先生受易大义季父亟称於衆曰吾家科第又有人矣所居泮水经门而桥横其西因名其居曰西桥流水之间日与名胜讲习其中蜚声籍甚秘书卿達公兼善篆其顔御史贡公泰交序其事一时乡之先達如解中正马成已王与耕輩皆相与莫逆读其程试之文光明

而俊逸暢達而紆余莫不以世科期之然試于私輒在前列大比之歲又往往屢黜於有司其命也夫天歷己巳從兄再舉及第改會稽尹君由會稽入姑蘇過廣陵遡大江以游乎吳楚之交於是四方慕夏氏之易學自安豐自姑熟來從者有焉君亦自負所蘊期於晚成熟知宇宙慘黷而世事日非矣喪亂以來頻年奔走衣食之不给而未嘗阿附以取容敖惰以取辱惟待人一誠故雖暴夫悍卒亦知敬服偽陳之在九江趨者日衆或諷君以進君曰吾雖不能有為于昔豈不能有守於今耶遂擇忠襄文節二楊公之里卜筑以老焉於時隣曲親朋齒德相近者得九人每遇良辰美景必迭為賓主飲酒賦詩以為樂名曰真率會好事者繪為九老圖大夫士家莫不欣羨蓋山林恬退之趣君於是專之矣故亦自号退庵老人云既而天命者定文事事興設科取士無異前代廣東江西以較藝聘者無虛歲省憲長貳之崇儒者時因行人問安否自是從游日衆而世故又有不得而辭者矣貳守楊侯弘道聘之潁宮太守徐公彥中荐於省部辭之辭之不獲則受鄉郡教授以歸領職以來易佻達為謹厚起倦厭為勤敏稍稍无愧庠廬時朝廷方尚鄉飲之禮君與博雅君子考之經傳所載參之歷代所行酌古準今不膠不陋由是冠帶濟濟有嚴有泰觀者嘆曰郡庠非教授太守獨能行此曠典者乎越三月得痰疾交游問視言笑自若一夕夢至家即動歸與謂子彝曰吾平生未了者惟吾父母改葬未安耳汝曹毋忘吾志言訖就寢憊然而逝實洪武八年六月十四日也享年六十有六沒之日太守率僚屬往臨治喪命載還其里太守而下及士友送祭于城南者數百人莫不痛哭流涕舟發而後返觀者榮之越數日諸孤權殯其柩于里之夏徑明年春彝兄弟具槨求禮狀其行每一執筆不覺潛焉出涕追惟較藝五羊忝同馳驅鄉飲議禮忝同揚確一話言一動容显显犹在心目而九京不可作動隔歲時能無感於中者乎知己晨星相繼淪謝前年狀李君主敬善行君謂有此可無銘矣曾幾何時復述君生平惡得不动後死者之悲也君盛時未效于用事業未显然為性寬厚口不論人是非與人言必依于仁義待學者嚮嚮忘倦遇有關於風教者必反覆極論使听者感動常誨子弟曰作文作詩無補於世虽工何益徒費紙墨耳又曰文者德行之表德行之不足而名能文者亦偽焉耳使隣里鄉党常有斯人与居後生氣質豈不潛改而默化而不可復得矣若談經則欲探伊洛之微妙為文則喜效韓歐之春容詩賦尤追古人鄉先生劉公桂翁評之曰道存之詩琢清貯澹凝幽拔奇不苟簡一語飄乎如輕雪之度風冷乎如寒泉之落澗澹乎如古壘洗之不可雜衆器也永嘉先生李公孝光亦曰予讀庠陵夏君所為古賦詩和粹雄蔚浸追古之作者今其藁之存者有荷亭集越游集金灘集馬田集庄西集振文集尋梅集養正集辭之溫厚衍裕要亦類其人焉配蕭氏宋殿中侍御史定基諸孫子男五人已有能繼其學者曰彝曰寅曰貢曰謨幼者未名女二人孫男四人從兄之子曰瓚英年俊發蚤試於時實君教也今以監察御史謫居鳳陽歲時周繼忧形於色有甚于己子凜凜乎孝友篤行君子之遺風也是為狀

曠作楫行狀

君諱某字某姓曠氏庠陵西里人也其先在安成高洲為着姓五世祖某徙庠陵宣溪蕃衍好善富埒封君焉至君九歲而孤母夫人鞠養訓誨駸駸有成人意象迨長激印周密恨不及事其父事季父盡孝道待族姻以厚處里閭以和見賓友以敬應門接物重輕淹速適宜不輕為然諾母敢嫚侮邑長多藉其视听為公平喜鋤強梗徐徐析以理咸宛舌無能盡一辭隣邑有猾民刁詬告相雄長植党詐欺事關節以法律罔無辜為生涯蔓於庠陵君曰蠱賊入境矣良

植有不被害者乎集饗訖而尽除之济其事者於我乎取由是逃责四逸境内靖安君力也居闲无事缮亭榭蒔花竹奉潘輿怡愉其间音乐之奉饗膳之珍虽力足以备养亦可谓左右无违者矣辟斋阁藏书籍常教其子曰懵于书者流于俗耽于书者沦于迂不俗不迂斯善学矣或者谓为知言至正壬辰兵衅日开淮寇攻掠郡邑君倾貲以助军储里之石门群恶啸聚左道惑民亦厚赏给募骁壮躡其穴乡邻以宁又领府檄纠衆数百人往援永新凡扞御尽力且知方者皆其平生裒【音怀】诚秉忠之验也乙未八月十有一日乃以疾没於家於戲陵迁雾塞之际正赖英隽以驱驰黎萌庶其有济而止于此岂不深可痛惜哉君生戊申十二月十二日享年四十有八配永新张氏簪缨世族也继室中顺大夫翰林直学士曾德裕之女三娶文氏则信国公从孙也男一人曰怀女二人壻杨某王某皆士族孙男二人诸孤权厝於药溪之原後之一纪某年月日始谋葬于某所怀以礼其父执也求状其行以请铭於搢绅先生賁其幽竈礼故述所知者俾得藉手往拜云

王与京行状

庐陵西北乡多王氏多祖金地长者长者在南唐时以仁厚存心泽物不倦尝舍宅为寺乡称长者子孙蕃衍日盛在宋最贤者泸溪先生庭珪也二十二世孙有讳彧者字与京生皇庆丙子六岁而孤与弟蒞俱赖大父抚育迄用有成既弱冠堂构数楹兄弟朋友时觴咏其间以为乐本斋王侯字其顔曰怡偲与京嗜学虽浮屠老子之宗医药卜筮之伎靡不毕究本斋帅广东檄为潮州儒学学録以母老辞弗就明年有母之丧哀慕靡届祭葬以礼既而慨然曰人本乎祖谱谍之弗修尚得谓水木本原之思乎谋及季父用贤参访栋溪连岭茅堂分宜石分诸崇卑亲远了然黑白遂锺梓以章图系承旨邵庵虞公为之序既又慨然曰人生所幸者有後有後而不使亲炙名胜以成其材德犹之无也于是作斋三间以为藏修游息之所以致博雅闻望之士种竹蒔兰焚香煮茗琴瑟在御图史在前以雪竹名其斋则学士曼硕揭公笔也意谓雪以清其神竹以虚其心子弟之於学也其庶几乎于时士之能诗者相与咏歌申斋桂隐二刘先生俱序其事高州贰守冯君子羽亦造雪竹而为之记焉迨元之季与京屡试艺有司弗利四溟尘昏即仗义募勇擐甲执殳身先戎马间以殄贼为志谓功业可指取有孰知事有大谬不然乃阵亡于安成实至正丙申九月十三日也噫於今二十二年矣其子志伸痛念厥考齎志以歿无坏土以寄春秋展省之感然永伤数求予状其行以传余悲与京卓犖有志而逢时之不淑以至於斯也不忍违志伸之请嗟乎世之有其材有其志而无其逢者岂独一与京哉曾大父逢丙字仲父大父展生字正叔父继宗字用昭母程氏妻萧氏弟蒞字仲芳男一人善继述即志伸也女一人淑慧适萧惟臣是为状

刘宗海行状

先妣刘夫人之族侄曰宗海庐陵永福人也君生三岁而丧母既冠然内伤迫服齐斩三年事继母尤恭顺迨丁外艰葬祭尽礼赋性刚直卓尔自树非其义不屈念先庐之在中洲湫隘弗足容乃营构於溪南之雄美冈峻栋夷庭甲於乡族临川郡侯杨公益隶书于堂曰海峯美其屹乎波靡之中也生聚于斯聘师海子为先务待诸子极严切左右奉命惟谨不敢少盪小有失虽对客廷辱不宥从学之隙即令干蛊不使有几微纨绮骄惰意象处家事虽琐尾亦井井

有法尤善生殖尝业铁炉於金牛大冶煽役者常千人由是高赀厚积渐拟虞任犹长松百尺虽不自觉而蓬蒿之仰羨於下者衆矣天历己巳岁旱明年道殣相望君为糜粥以济饥殍存活者衆又运菽粟于淮归以贷其不能粿者稔则收其直不计其息笃宗族之亲明疏戚之系以宋潮州守城山王公孟孙所撰谱序请於翰林承旨欧阳文公玄题辞於谱钁梓以授族之人其尚义类如此初有举君都水监从事君不屑晚值兵祸延蔓江右君率民义保障乡井或劝上功大府庶异日一资半级可觐君曰从政而不能忠以报国廉以律已公以泽民往往获譴有之但得朝野宁谧子孙淳厚传家不絶诗书之泽足矣焉用仕既而元之国事日益非矣君亦攜家避地流转无虚月然视乡之蹠血玉成砮者远矣非前知之明能自脱耶壬寅之岁天兵收辑郡邑民间始复故业乙巳正月负刍残孽出没墟里君不幸殁於家得年六十有六娶萧氏有贤行相夫持家足为壺范子男五人天佑文佑保佑元佑科佑俱克植立不隳其家天佑先君一年卒女五人壻萧西有旷作敬杨子言萧会同王文达孙男十三人曾孙男三人以【阙】年【阙】月【阙】日葬君於【阙】越十有四年诸孤不忘先美俾状其行余惟刘氏

自南唐驸马丞亮之四世孙昉徙永福于今有年数矣非世族乎宗海复振於中微为乡闾所称慕有过人者故家子弟无论学术所到苟能如君戮力赁殖转迁有无以利其家则陶朱必屡散以得声司马不抱恨而立传况土国者力有以赎又足全天伦之乐此余诵靖节人生在勤勤则不匮之句深有慕於君之立身而痛恨子弟无志量者齿於游民也礼於宗海有兄弟之好死生契濶悲怆何极恶得不取其槩而状之宗海君字也而讳则海云

麟原前集卷三

卷四

钦定四库全书

麟原前集卷四 元 王礼 撰序

赠伯通甫序

雩都监邑伯君既上之三月政通民宜誉洽远迩頼府俾贡方物于京师余来兹邑闻分府揔戎于此者曰使监邑在职则必民事之不我瀆也市井之人曰使监邑在职则必力役之可均也田野之民曰使监邑在职则必粟米诛求不襍然而至也及闻其将返跃然以喜交焉以问若子弟契濶于父兄予窃异夫君所以获乎上下有若此者时其归也亟往访焉语实情真藹乎其厚知其得此于人有由矣退考其私杜门自守请谒无迹凡有不得其平白于公者君究诘得实即令两辞具对务尽其情曲者立罪之略夫按牒曹无所为市豪民有悖官府者诬史胥者即召语之曰汝有冒宪罔尚何辞汝母耶费军储若干某备孔庙圯坏某修各懽然奉命无拒色梅獠侵境援师云集君酬应适宜恬无侮拂身先士卒攻守不懈昼忘餐夜忘寐视公犹私皆余所目击者昔张敬夫尝叹世之从政号为能者以察为明以刻为公以不恤为能任而号为贤者以姑息为惠以纵弛为寛以摸棱为善处适以贾怨基祸伯君明不苛察公不褊刻以能恤其民惠不姑息寛不纵弛而善处乎事其过人也远矣虽然邑之佐有史史者承上而通乎下者也而其辈每相比焉余见其掩人之明而蔽人之聪者富矣伯君致审于斯庶絶鲜终之议苟报政不异始至则必有勒金后载信史将无愧循吏于古矣余也乐道人之善故叙所闻见以为从政者劝以俟夫举贤才者之采择云

赠张仲温序

兵兴以来郡有凶嘯必分府从便宜以治之任重事烦非咸得其人不足以集事至正十二年蔡穎道抚寇頼远近震沸郡守尚书公以判府王侯讨之既平留侯分府雩都抚安反侧凡上流州邑军旅事无大小得悉制之置史一人任簿书期会其骫骳不事事者应揔府或爽其意待属邑或乖其宜上缘兹而速谤下因之而召殃惧亦有焉及张君仲温之莅斯役也练達明敏周旋捭阖大者咨谋小者立决以已之能承上之贤时虽纷纶而事无不集者矣余视数年间揔府词讼之科十无一二所急先者钱谷甲兵而已然幕佐者几人案牒者几人史之员外设者又几人智效谋勇效力宜其醇醪从容鲜有败事乃若分府之为史上缺佐政以提其纲下无共任以分其忧祸福之枢机治乱之橐龠岂不诚重且难哉张君为之三年如一日可谓能胜其任矣既代其徒黄辅曾贤念游从感离索求余文以张之其谊有可尚者予言虽不文亦窃叹君之难能而强叙其概以别云某年 月 日王某序

赠刘桂材序

十七年春袁寇陆梁于吉甯郡守虑唇齿之势日募士练卒以备而经用弗支乃属其僚友而语之曰计将安出有议于列者曰楮币滞壅咎原于商厥今岭海之醴经于章贡以達隣郡者舳舻相衔若收其什一偿以楮币诚养士之权宜也守是其计于是择廉干即各隘以知其多寡之数而上于府余访旧雩阳维舟峡口前尉冯君久戍兹土寔兼斯役而府史刘君桂材督焉冯以余久别斗酒相劳饮酣不觉慨然叹息语余曰琐才守兹峡五年矣渔樵与友鹿豕与游知我者谓我心忧今又重椎醴之禁少有逋荡罪不旋踵自刘君来监斯役也奉法严待物恕乐易周密知人艰苦对云山烟水风檣沙鸟时有句陶写其胸次又常若恨余之不?时久淹于此余亦感其相知少慰于寂寞也然监者率三月一易代将至矣而余无以赠之子为我叙其事使得藉手以别嗟乎余闻刘君为故家才子久矣今覩其质濯濯乎玉树之临清风也观其才恢恢乎游刃之有余地也察其志殆将卑以自牧思成其大就其深以不坠其家声者若人也恨相遇之晚虽无冯君请犹将云云以致余意况闻命矣其敢有爱于言乎刘君勉之余之期子也远

赠刘桂材诗序

甯府史刘桂材会盐赋于雩峡三月得代去冯尉得渊徵予文赠之矣後又三月代者且去儒生杨维中辑士君子赠咏诗若干篇寄之复索余序之辞之弗获则问之曰桂材何以得此于人人哉惟中曰斯人也交君子敬且和待小人严且惠其奉法也恪不挟势以骄其赋民也公不苟利以刻前乎桂材未尝无人求一日之思如桂材无有也後乎桂材未尝无人求一言之誉如桂材无有也好德之诚由中播外乌得以幸致哉余闻而叹曰诗不云乎泾以渭浊湜湜其沚桂材之谓矣传曰人之有善若已有之诸君子有焉

赠杨维中诗序

白下杨生惟中馆授雩都峡戍官冯德渊所扁舟沿洄常常而见之一日出所吟示余欲闻评泊观其卷中如客添江外岁人改镜中顏羈愁老恨备至若古人常道者如烟中疎密树桥外两三家得之真景渐近自然如倚松看子落隔竹听泉流又高人闲趣超然物外瞋失林间树凉添塞下秋亦清楚可爱他如行路难遣兴等作皆非余子所能及因喟然叹曰生寄迹山巔水涯非有名师胜友以相与而刻苦自修犹能如此使其得词林尊宿而亲炙之其所就又奚止如今所观乎必且有大过人者矣虽然生惓惓于余盖欲求益者也余可无一言以对生之心耶诗自真情实景便非凡俗然情虽真而不高景已实而犹浊亦非吟之善者也生以余言思之必有得于景趣之内得于景趣之外矣

远烟空翠亭诗後序

右远烟空翠亭诗若干首参政全公与其宾从咏监郡一轩公投老之胜也一轩公昔监章贡得坝上为游观之地及参政公牧兹郡游而乐之纳爽气于山间揽秀色于江上朝岚夕霏引素縑青不可殫状遂字其亭曰远烟空翠诚一郡之胜概也然以余观之林泉之胜遇而乐之者非难专而有之者为难盖遇而乐之者人专而有之者天也不见夫昔之游此者乎画戟昼

森綉筵时肆携谢傅之名妓领桓温之词客飞觴赋咏明白传诵詎非文章太守一时之盛哉今焉奉将天讨川屯野次忧先天下任重事严圉视曩者临眺之美为陈迹为旧梦矣而坝上依其如昨风月主人耆艾豫康此天厚之非若一游一豫之遇者也若乃易而视之使鹤怨猿惊岂公之心也哉庐陵王礼用序其诗後

雪洞图诗序

十二年淮孽蔓延江右平章教化公奉旨南征天未矜民兵威始奋而年弗克永于是行中书以都事吴公领其军受任以来有张无弛由清江而上如长兴诸怙险跋扈不轨者或肆伐或附致达于庐陵公之力也行省擢陞员外舆论黜之公所乘战舰皜白晃朗顾谓宾从曰犹雪洞也由是咸称雪洞将军舟名雪洞亦犹斋名画舫云耳或曰公为斯名欲人以寒苦为心卧薪尝胆意也盖阳和之气易流于骄逸寒苦之性必至于坚忍昔田单攻狄鲁仲達谓其在即墨织蓐杖锄为士卒倡所以破燕今有夜邑之奉淄上之娱黄金横带而骋乎其间未易胜狄此能以寒苦为心与不能者之异也故曰孤臣孽子操心危虑患深故達余应之曰是或一道也然天下之理生机伏于肃杀方冬寒气严凝则来春动植必至蕃育岁膺温和雪霜不降则品物不畅其生惟人亦然罚一人千万人惧所杀者少而所生者衆是罚乃生地也寒谷而春贞下而元雪也者翳万物之大德而一岁之成功也欵是故采薇遣戍也曰今我来思雨雪霏霏出车劳还也曰今我来思雨雪载涂古人咏戍役之功必归于雪公之志无亦寓至仁于至惨睹岁功以思戎功之成也乎已而范明理来章贡一具道吾庐陵百姓所以留公者因忆去岁寇由安成永新卷土至城下微公力战郡城有不为墟者乎宜斯人感之深也又数日范出雪洞图徵言为之展玩而叹曰雪洞者寓言也今乃形似之凿矣况公事业又岂画史所能彷彿哉因书答或人辞于图後俾覽者相继咏歌以祈戎功之有成也

送马时宪还维扬诗序

西域马君时宪以胄监弟子员举进士为翰林编修官志不屑也南游九江泛彭蠡踰梅关拜外父宓公于南雄回棹章贡访赵苏诸老遗迹因翱翔而弭节焉性重默无泛交迹絶权贵之门衆以是奇之一日闻有笑笑道人者何笠披纸衣击筇行歌于市憇江东雷冈亭飞舞而上马祖岩歌声若金石悲壮激越林木为动田翁樵子弃业而衆观意其散仙也怪而察焉则时宪耳噫其果于忘世若楚狂接輿者耶抑犹豪杰不偶之士雄才莫施辄佯狂诡其迹轻世肆志以泄愤懣无聊之气耶矧燕赵素多慷慨悲歌之士安知不犹有曩之风烈耶余有以知时宪倜傥不羈之情矣既而道里无虞将还东淮之侨所余友冯咏索士大夫诗歌送之而属余以序余言何足为君赠哉第于时宪不能不为当世臧于荐贤者兴举而不能先之叹也马君行矣见今时任方叔召虎之事者为我恳切谏之曰生民涂炭极矣圣君如此谁忍负之

贺顥守海公拜参政诗後序

诗若干首顥府佐属曹掾贺大参海公拜命之作也公以朝臣出守章贡政严盗弭邦域完固事闻于京天子嘉之念顥之为郡遥揔闽粤数千里之冲要寔为雄藩于是即授中奉大夫江

西等处行中书省参知政事兼贛州路提管府達魯噶齐兼管内劝农防御使以镇护之仍赐内府织文光禄上尊以示倦倦注倚诚内朝之宠渥外廷之荣耀睹兹盛美有不舞蹈咏謡也哉虽然春云蔼空繁星丽汉使人耳之神怡目之心豁固诸贤爱敬之至情然公大人也位尊则任重继兹以往一号令一设施国体之大系焉非郡国钱谷甲兵庶务比也凡左右先後者计有所当用婉辞以进之议有所未安顿首以请之使大人治绩愈章义闻愈着以无负天子美命庸非爱敬之弥至者乎咸曰唯唯遂摛其说于群言之左为後序

赠通守王公祈雨诗序

天下之事有适然遇之于天者幸也初非有可必之道也惟其屡试而不移既久而愈验则其信于天者非偶然矣贛通守王公祈年于雩阳也前三四年余尝过之睹士类喜雨之什而序之矣然犹以为是适然耳其後凡祷莫不孚应今年夏不雨公蹙然曰爽报非我忧不雨则无禾深可忧也即具香币徧走群望俄而风云随兴甘雨竟日既沾既足近悦远安然後知公之所以信于天者非幸也有可必之道也若夫适然之感一遇之已耳未尝有至再至三者至于再三已非可以幸致况至于五六至于八九而无或一爽者乎公之大过人者于斯乎卜矣然尝观之信于天者每不谐于人不能不致疑于有物夫以公之连年讨贼功亦茂矣而爵不过初命之大夫无以慰国尔忘家之心而弃城全躯之臣秉钧衡列台铉比比有焉噫人无不至惟天不容伪彼谐于人者又果能一信于天乎信于天者数数然也则其不谐于人者无足虑矣朱子有言不求人知而求天知公之心也友人吴伯渊得诸贤颂咏献于公而徵予序余故表公之所以信于天者以告夫庶民小子云

送雩都冯县尉序

雩都尉冯君德渊既代贛府委戍雩峡又五年屡状求代久始得请去一日府史吴自得刘桂材李君茂等咸集语及君之为人莫不称叹或曰君之防戍也保甲役丁更休迭用者有警约期毕至无一迹敢後舟楫往来验诘无他不使稽滞人咸德之或曰水陆通衢过者纷若君无贵贱小大无敢慢以故来者曰冯君冯宰率懽然有顷而去其未及盃酒殷勤辄慊然终日将校骑卒络绎无虚日君酬应尽情各相安戒飭毋譁以拂君意民按堵如故或曰君平生敬畏虑谴谪及躬将貽前人羞栗栗如奉盈如履险故善于其职而有令闻或曰聯事者横而多慾取下峻法不近人情君忧其蔓已也力求退退踰月聯事者以賂败其知几有如此者言人人殊而为美则一余不能尽记也已而君赴行省听调庶人在官者俱来求文依依不舍因询其行事皆与前言契最後府史诸君又持巨轴合辞来请嘻冯君其所谓平易近民者耶将存心爱物于人有所济者耶抑无恶无斲以永终誉者耶自是脱下僚而陞显要宜矣余奚言哉虽然畴昔诸君之谈公论也公论焉可废乎余辑之为序

赠会昌常侯方壺序

湘江赖惟贤侨寓雩山之阳时过从宴语偶及今之为政者惟贤作而叹曰若吾州常侯真百一者也曩全公牧贛时于侯敬爱不解常语左右曰古有建功絕域垂声来世者今伊迺洪省

音耗宵如欲单舸中流往规侦之谁足办者咸曰非侯莫可使者于是?十八滩选僮徒峙粮用遥遥驰千余里如山陰道中四顾凄断而壮肝烈胆无少□栗必達使命及官会昌也廉正自持嘘枯起萎虽深山长谷愚夫蠢妇咸安信之若父母然招降符下受任弗辞凡怙险不轨道者理谕诚动转移其非心不兵而解秋毫无所利若安远若信丰若会昌若瑞金石城以至循梅遐壤闻风从顺者砦三百有奇迨府委往镇寧都则蒸庶怨咨遮道犹赤子乍离襁褓无所安其身必止旆尼轅始翕然以定此其槩也他非枚举可尽余耳熟其言尝恨有官君子不能皆侯不能不使人寤叹也其後惟贤将还其乡求余文着侯行事余不能辞也姑序前所闻俾得藉手以事其贤大夫而余也犹将撫四方纬绩昂首信眉陈于绣衣玉节进退人才者之侧则常侯在所不可略云

游罗田岩序

雩都邑南山行五里有岩曰罗田自濂溪周子来游来歌名闻于後至正乙未余留兹邑数月欲一往未果丁酉重来忧患中念不及此明年夏允匡以使命抵掌思至其地司征宗楚故家才子友谊尤厚欣然?航领客以渡步至砦近松陰可爱班荆且焉少息峭壁环抱若狮若象若牛马然入谷清凉袭肌循石径梯梯而上洞口豁豁深窈邃若堂奥益以人力佛宫幽敞中有石鼓扣之隆隆外闻折而西五十余步有濂溪书院僧以祀西方之教而周程之像寘其隅又折而北四十余步仰镌濂溪闻有山岩即去寻亦跻云外入松陰虽然未是洞中景且异人间名利心二十八字于其顏其趾石渠九曲则邑人孙氏之先凿以娱客渠旁泓渟崖溜为小沼佳木异竹树垂陰相?于是序齿列坐命少者从者挹沼注渠流觴而宴用前诗首句分韵赋者六人余一字则聯句成之于时有苦思者有行吟者箕踞而饮者披腹而卧者点笔石角者高情逸韵虽晋贤无以大过惜乎无画史彷彿之诗章既就僧茶亦熟归客于舍子安洗爵揖饮拈题襍咏期客于醉亦狂士也既彻巡檐而东乃履危磴跻絶顶万山纷其如叶江湖极目伤心问僧所谓虎穴安在则云榛塞不可诣矣因记岳武穆至斯岩尝有诗云手携竹杖访黄龙旧穴空遗虎子踪云鎖断崖无覓处半山松竹撼西风恨山间无净壁可书以示来者歌罢黯然不能不为异代颇牧之思也已而余景度山嘉惠濡翰题同游名氏于石壁有言于列曰有宇宙即有斯岩至周子而名斯彰其後游者何可胜纪俱无称可叹人生清远游实难在平世尚思知己乖晤矧战争未息胜迹名流畅情邂逅岂可得耶复欲重集参差多矣异时回思斯游恍若隔世昔人俯仰之间为之兴怀良有以也盍序游岩之乐使九疑阳华名称于次山西山石城誉显于子厚亦千载佳话也予不得辞遂着所历如此是日游者余同郡梁材允匡严玄子安豫章龚昂宗楚汝南陈璠嘉惠暨允匡犹子助予扫苔引渠行酒磨墨则生徒刘长安楫师刘元海书之报功也至正十八年四月八日庐陵王某序

伯顏子中诗集序

子中既断髮自废为民忠愤邑鬱仰屋浩叹付之无可奈何而心不能自平时时以其慷慨之情憔悴之色一寓于诗又记其旧作辑为一卷俾予序之余三复而叹曰美哉颯颯乎殆有唐之正音而阳明之气也夫文之在天地间二气之为也盖阳明之气在天为日月星辰在人为刚直为朴厚为岂弟君子其于物也为金为玉为麟为凤为龙为虎为後凋木在地为原为阜

为冈陵发为文章也英华俊伟明白正大如春阳如海运神妙变化而光彩不可掩抑陰晦之气在天为雨雪为云雾在人为谗佞为残忍其于物也为鈆为石为梟为乌为虺为狐为葭莩在地为汜为巷为洼藪为沮洳得之于文也浅澁尘浊晦昧骯骯如寒萤光如焦穀芽读之无足快人意者则是气之为也然二气升降无常而人之气质可变而况于文乎自科举来致力程试之文者虽一诗歌一尺牋往往如吃是小技之末且未能变况其大者乎由是观之子中天赋高学力至其过人也远矣虽然诗之为道似易而实难言近指远者天下之至言也先辈有云诗如镜中灯水中盐谓之真不可谓非真亦不可盖所咏在此而意见于彼言有尽思无穷非风人所以感物者乎子中与余同举于乡知其业三百篇者日与上下论议故以余嗜好之偏陈之子中今无民社之责将翔于青原白鹄之间肆其力于文字则余也葛巾野服陪乎杖履之末尚取新作玩绎之东野之拜有日矣始书此以志读稿岁月云时戊戌日南至也

嘉林高氏族谱序

先圣王之勤民也井牧以食之比闾以居之庠序以教之德行以举之使之安其田里服其教训出长入师无转徙无游宦故族党昭穆秩然其不紊自里选废而井地坏小人失业也或受廛为滕国之氓君子出位也或留滞于桐乡之爱同源分派人异世疎问其所自三世希不失矣呜呼此有孝弟之心者所以油然而谱牒也而况名贤之後乎安城高氏谓自韩王琼以下历历可考迁其近地嘉林则如心????也如心以里老生所为谱序示余载真宗御制韩王之赞曰冠佩俨然肃以生敬气貌毅然静而能胜邦家之光社稷之镇澶渊之功齐名终慙文信国公题其家云澶渊却敌功臣裔元佑帝垂大母家及安城之有高家并犹鲁国之有顔氏巷若然则为簪纓世族信不诬矣抑余愿有言焉凡在斯谱者思吾身名贤之後则必仁义存心而不事于锼薄诗书淑身而不流于庸俗畊桑以殖业而不为游末之民使人见之而起敬曰此高韩王後也信乎合抱之木千金之子非步仞之丘三家之市所有也斯为不辱其先矣若夫视礼法为虚文议问学为迂濶而诿曰此先训也则非余所敢知如心作而谢曰吾家子云老不晓事敢不敬共朝夕以无忘先王之戒词余也?乡曲之爱与如心邂逅于岑南见其崎岖兵乱犹能以谱牒为事既勉其归复叙其谱而不能不致王道不明民志不一之憾于後世云

僊馆春集序

至正十八年秋有若南霁云之求援贺兰者事已无可奈何寄迹岭南真仙观观在岩谷间上有神女祠相传秦避世而迁者谷中巨石磊落如狮如象如虎豹蹲者如龟出暴如蟾蜍如笋立者或字之曰步蟾曰书林碧萝苍蘚间石刻犹可辨有因其高下凿而级之乘其坡琢而席之以为憩息之所泉??络石趾啮树根隐见而下为瀑溅溅鸣水为乐看云之朝眺月之夕往来啸傲其中隱然如散仙而忘其为人间世也明年春末值雨余霁後嘉木沃若可爱幽禽下上微哢生香时来飞尘不到正月既望坛前杏桃盛开嘉客咸集因觞咏以为乐用傍花随柳过前川为韵半酣章或就或不就复扫苔展席树下幽兴愈畅不知日之将夕子中慨然谓予曰乡也与子跻层崖历絶谷出入茅苇烟雾间跋涉数百里衔枚夜渡惟刀剑朔朔有声晓睇神州青山一髮红尘莽莽泪堕马首壮志视马伏波何让今乃垂翅饮恨于此忘形尔汝陶情杯酒聊自遣耳非子孰有知吾心者乎不知明年今日与子何处抑驰驱河洛之间輶轂之下

有不回思岭南之迹者乎况昔之肥遁君子登临于斯也乌知後來有同其趣然求遗风余响已漠然云关岫幌之外矣千载之下有如我者乎不弛情而遐思者乎子序溪壑之姿讌游之兴俾诗继其後亦佳致也余遂叙其槩而志之曰伯顏子中四举再魁于江西为分省都事勤于王事者也余则庐陵王礼忝任帅幕与子中同年而同志者也高恕如心胡坦文奎皆斯文之彦刘厚尚德始兴教谕李敬仲考信丰令尹同寓是山适出城而归亦赋诗者先辈富州太守梅南刘中孚皆礼同郡也慕吾徒而共乐者里人李国明陈思诚羽士则有故而他适後十日命李敬书于壁俾来者寓目焉

麟原前集卷四

卷五

钦定四库全书

麟原前集卷五 元 王礼 撰序

送吴莘乐迁葬序

仆十年前举于乡永丰丞吴君校艺湖广还至九江闻仆在选中而喜曰非幸致也仆由是感其相知其後有四方之役不见者辄三四年而音闻则嗣丧乱平忽遇于雩阳执手劳苦恍若梦寐连床夜话世态之难国步之感勤勤忠告泛及其私于是又感其相厚既留旬日思抵永丰省其先府君墓谋归窆于义山之阳嗟乎?于君有深省矣古语有之求忠臣于孝子之门盖言忠孝非二致也乃今观之益信初君之仕永丰也体圣上之仁子育黎庶抑暴起萎臣之忠也仕而迎养子道之常回首故山白云伊迓乌知时殊里絕先人魂魄有不得思沛哉迨君之离永丰也生民之祸日烈赍残舍毀间以身免虽龙骧之莹马鬣之塚不以怨恶开则以金玉累异乡杯土抑且奈之何哉而父兄之诏其子弟者则曰县丞汝父母也先塚在斯邑者春秋可忘祭扫之义乎酋长之戒其部曲者亦曰县丞我父母也先塚在斯邑者朝夕可忘省视之勤乎违之七年矣而松楸蔽芾蔚如甘棠人心天理之不蚀岂偶然者哉夫纳忠于君而获报于亲君子之孝也君今往省哉忻穉喜感旧谈新饭酒酒浇翁仲犹昨死生契濶既慰且安发引江行特易易耳世谓吴君起家为名进士从政为古循吏校艺为明有司或莫知其纯孝者故仆因其是行也着所闻以自儆且以为当世士君子劝焉絳维渐开酌酒举钱而侑之以歌曲曰若有人兮邑中黔堂有弦兮户无兼金溟渤 埃兮高岸以沉南山有丘兮其木孔陰狐兔削迹兮鸾凤来吟种德必获兮良哉此心歌罢抗手别去

魏松壑吟藁集序

诗大序曰在心为志发言为诗传曰志之所至诗亦至焉三代古诗何莫非其志之所至也五言起于苏李其离别赠答中情繾綣蔼然词气之表下至晋隋陆机之论诗则曰缘情而绮丽而文中子亦云诗者民之情性也故诗无情性不得名诗其卓然可得于後世者皆其善言情性者也奈何世道日降温柔敦厚之教无闻遂启邵子删後无诗之叹盖不求其本而夸奇鬬靡者病之也古人托物比兴其鸟兽草木之名皆取人所同知者庶几咏歌有足感发何尝采掇珍异如丹砂空青金膏水碧山海经所未载博物志所不録皆左抽右撷取青媲白令人乍见如入武库骇神荡目不可名状徐而味之求其纏绵要眇如山阳之笛依依不能去心何可得也嗟乎安得起吾庐陵刘先生九京之下与论风雅之妙哉古燕魏松壑翩翩佳公子也早有能诗声凡可悲可愤可乐可感辄形讴吟未尝探赜摭怪而语必不可俗余读之尽卷快意快意使其不以崎岖风尘汨其中所诣殆不止此抑文章者士之末也余于松壑尚有所加敬焉夫名师胜友辅己之药石也尤宜亲近庶几变化气质讲切问学其或器器耻于自下则贤者日远矣松壑资稟如此而视斯文之友如骨肉人亦孰不倾困倒廩而竭情焉将见鏃砺括

羽之益以成其德奚独驰骋乎翰墨之林而已哉余也归欤青原之下杜门读书以娱其晚尚取四方名胜之作萃而刻之则松壑在所不可少云

雩阳孙母辉和尔氏贞节序

易称有夫妇而後有父子有君臣谓人伦莫能或之先也圣人删诗念夫妇以经斯父子君臣之伦无不得其正揭栢舟冠变风其意顾不深远哉嗟夫予于雩都孙母之贞节有不得不暴之天下矣孙母辉和尔氏而讳则额森德济也父谔尔根为雩都县達噜噶齐贤邑土孙庭兰以其子妻之归孙三年庭兰歿年甫二十有五誓守遗腹靡他默祈熊祥庶庭兰死犹不死後果得丈夫子荣宗是也鞠字恩勤日深岁积逮从学受室卓然能自树立则母年已五十余矣于是里社长老聚而言曰是贞节妇也不白于公旌异之其何以励俗遂上其事于县县令受其词而察之得其实复上其事于府府公受其词下而察之得其实又上其事于行省省臣闻之于朝将表其门适以事变寝己亥春余自岭南还雩见荣宗??哀疚则其母亡矣一日泫然谓余曰本立未生先父弃代赖母氏载育载训以有今日其贞白之节行道之人犹知之旌淑有令遭乱而止本立德薄才浅无可自见于世以显扬其亲今母氏音容不复接矣罔极莫报而语食自若于天地间尚得为人子乎思得四方能言之士载诸咏歌庶有闻于後不孝之愿也先生以为何如请述其槩余遂志之曰兵兴以来父子君臣之间有愧于孙母者衆矣尚德君子三复斯文知斯人之特行嘉其子之孝思岂无慨然兴怀而咏叹之者

送郑子高还徽州序

至正辛卯古歙郑君子高来省季父雩阳尹明年江淮绎骚跬步如在絶域遂侨寓雩邑荏苒十年今兹舟楫始通子高率其族属之寓者东还故乡余闻为子高慨然人生忧患惟涉世乱离而沦落异乡者可念有欲归而力不能自归者多矣力能归而诿曰无父母兄弟或白髮倚门而不归者何限久饥之先塚尚有能动心乎哉今子高在乡无定省撓其怀在外有家室慰其思亦复何所不可而慊焉深恨终养之不待虽泉流世隔瞻慕愈切子高乎其使余感也将见过家上塚断垣古木皆异时卣角嬉游处岂无旁徨而兴叹父母亲友斗酒劳苦必有嘉子高不忘其先不弃其乡以戒子弟者嗟乎鲁无君子斯焉取斯过紫阳夫子之祠可无媿矣然一去一留交情之变苟非言志曷畅离怀举饯诸贤列赋宠别属礼序其首简故着其概如此云

送李师昌序

太史公传日者以为古之贤人不居朝廷必在卜医之中而世之仕宦者相引以势相导以利枉主法猎农民以官为威以法为机求利逆暴辟无异于操白刃以刼人者也视君子处卑隐以辟衆而以义置数十百钱者岂不深可愧哉予尝奇其言凡卜筮方药之士未尝敢以易心视之惧隐君子或寄迹于斯也然亦罕见其人焉今年秋辟地白沙吾党李师昌者集生授业余力为人推五行药衆症无不奇中视他术相去远甚家贫亲老复欲遨游公乡间以给甘旨若斯人者其太史之所録也乎抑师昌以古木为标榜木而名古余惧其材大难为用矣虽然

杞梓连抱而朽数尺良工不弃况木之古者阅历风霜不知其几使出而遇司马其容久乎医卜间耶师昌行矣与人臣言依于忠与人子言依于孝见从政有如前所云者谕之以命而药其病可也

陈子泰诗藁序

余闻辨于味而後可以言诗信也今夫适于口者若醯非不酸也止于酸而已若醢非不醢也止于醢而已以充饥者或辍焉知其醢酸之外醇美膏腴有所乏耳苟有物焉既充乎饥又适于口岂不饕餮爽快乎人哉江西自德机范先生用太白风格一变旧习流动开合春容条畅音向节奏咸赴以合类皆和平之音于是学者翕然从之遂无复涛怒电蹴鳌掀鲸吼鑿空擢壁峥嵘擲戟之态然求其一聯一句之间涵瀟永有无穷之思得至足之味使人不知手之舞之足之蹈之则眇见焉泰和陈通子泰故家子弟之淳愿者也为诗业进士遭乱感时伤事发于咏歌刘君子高又从而维之抑扬浏亮甚非琐琐者所能及也自是少加以思将见韵外之致景外之趣超诣沉郁如蓝田日暖良玉生烟可望而不可致之目睫之前斯可名家矣若然醇美醢酸之味有不备者欤子泰示余诗藁欲闻所益于余最厚故乐题其简端云

赠陈省掾序

盖余于省郎陈君之完城窃叹其有大过人者也士方读书衡门于古今事未惬意者恒奋袂扼腕抵掌顿足恨不置身其间以少展尺寸及用于世或才不足以称其位气不足以赴其志使人致疑于穷经幸而施为稍异于流俗又以未達国体任重而蹶异流俗矣達国体矣卓卓然古人于今世足为邦国重万物吐气矣又或偏于独见懈于末路嗟乎才难如此于今谁与共论当世事哉君之在永新也或曰规画有方训练有法或曰恩义感激得士卒心或曰雍容暇豫时以碁自娱茫乎莫测其涯涘以是观之非其才足以称其气足以赴者欤非穷经果足致用欤非通達国体者欤非居今之世复见古之人欤宜乎有如主敬虽崎岖兵乱间无一瓦之覆以为家而惓惓执鞭事君者盖亦有见也士之颂君者礼尝序之矣主敬又得若干为一卷君何以得此于人人哉虽然士之属望于君不永新而止矧永新犹有未奠枕者乎孙子谓兵闻拙速未覩巧之久也吴子则以二重一信为胜之主民之斯命者尚其念之

送汤辅德广州蒙古字学録序

昔我世祖皇帝奄有区夏以辽金及遐方诸国各有字书而本朝尚缺故特命国师创制蒙古字颁之四方期以顺言達事而已于是内则翰林院以总其教外则蒙古教授以董其学可谓备一代制度矣比者江西提举官推广上意辟习于兹事者增置谕録以羽翼之由是外弟汤辅德沿檄録广州蒙古字学将行别予宣溪之上或谓辅德簪缨世家阶庭才子不明经举进士顾乃业右学以徼进不几近耶予语之曰子亦知夫国字之功乎郑夹漈谓梵音行于中国而吾夫子之经不能过跋提河一步者以字不以声也国书因声之自然而使无字之声悉成有声之字推之于远岂小补哉辅德之是役也迹之化民可使岭海以南诵其语者莫不鼓舞于王言诞敷之下远之事君则经筵達帝聪发挥尊主庇民之妙未有不由于此也尚何愧于

科第乎矧余力学文固将并行而不倍也既以解或人复叙次是语以为辅德赴广州蒙古字学録序

萧伯循诗序

始余有安远之役道双江谒府长伯循过余于旅邸因见其诗後以王事鞅掌邈不相关五六年矣去岁还庐陵遁迹曲溪之上伯循复以诗来访相对如梦寐词翰之妙非复畴昔深使余喜也今年余寓东昌伯循之里也又尽见其感时怀古咏物抒情登覧酬赠饯别等作徐而读之大篇春容短章峭洁流丽而无矜持疏放而有兴趣凡意所欲言无不尽達于笔下如时花吐艷过者属目如春禽调吭闻者快耳此岂沾沾録録者所可企及哉虽然刘梦得有云心之精微发而为文文之神妙咏而为诗司空表圣亦曰文之难而诗尤难二贤深于诗道者也味斯言也诗果可以易视耶伯循尝诵诗三百矣试举一二得于余心者谈之常棣之于兄弟伐木之于朋友蓼莪罔极之感东山体下之心伯兮之思其君子旄丘之责其隣国小宛之相戒谷风之相怨燕燕恩爱之情黄鸟哀痛之恨何其曲尽人情微婉恳至後千百载能言之士莫或及之何哉噫有三代人物而後三代之词章可觀也人品不古若而欲词章轶乎秦汉之表岂理也哉学者步趋乎圣贤涵养其气质则诗之本立矣本立则其言藹如得乎性情之正不期高远而自高远矣伯循思其难务其本致其思而使之精养其气而使之平充其学而使之洽异时视东昌谈诗之日犹今日视双江始见之时则伯循殆将超等夷而名家矣勉旃伯循朝满夕除潢潦也沿委而遡夫源其江汉之流乎

胡涧翁乐府序

文语不可以入诗而词语又自与诗别曾苍山尝谓词曲必词语婉变曲折乃与名体称世欲畅意者气使豪放语直俳伶辈饰妇衣作社舞耳其不苟句者刻镂缀簇求字工殆宫粧木偶人形存而神不运余深以为知言自花间集後雅而不俚丽而不浮合中有开急处能缓用事而不为事用叙实而不至塞滯惟清真为然少游少晏次之宋季诸贤至斯事所诣尤至姑即乡国论吾家松竹居士暨胡古潭彭巽吾皆词林之雄也国初太原元裕之以此擅名其後涿郡卢处道河南张仲美韵度俱非寻常可及亲友胡善乐以其季父涧翁词稿示余无前二者之失而得诸老之遗纏绵依约语意深到令人不能释手既而谓余曰往者季父词稿司马昂夫尝序之矣钁梓未完而兵变尽废捃拾记忆存十一于千百俟力稍舒仍托工人寿之子为序所以顾惟浅陋奚足以窥曹刘之墙第念胡氏自宋以来诗书阅阅雄长当时涧翁于古潭孙行克传弓冶不坠家声又能傲睨凡流得其礼接甚登龙门尚有承平王孙故态今观其美制可谓无愧古潭矣因视松竹清风绍其遗向者其抑无愧于涧翁也乎因序其稿归之并以识余之不武云耳

送王録判补宪掾序

至正十五年正月江西河东道肃政廉访使司辟吉安路録判王君叔琰掌宪牒合城士民怛然失色留之不可来谕于予曰兵火凋瘵之余天以録判惠我遗黎公而能慈而勇利必兴害

必除革吏弊若监督而堤决也恤民隐若寒煦而饥饫也总府知其才公委日至必求其情断于理与工容悦者复异政府数月善誉翕然今为上位所夺去势不得留计将安出余解之曰王君居是职则合郡蒙福而止赞治宪幕则吉安四州五邑与列郡之民咸蒙其赐乌得以寡妨衆哉然余因君之行而窃愿有言焉夫宪司朝廷之耳目而书吏又宪司之耳目也当今时弊可动心骇目可扼腕抵掌何限起而救之政在今日识时俊杰岂昧先务之当急乎风俗颓败忽礼让而崇骄侈人纪人纲其谁与立一宜先各郡有官君子之贤十不一二不次超迁犹惧弗劝二宜先人民鲜少牛畜殆尽东作方兴田必荒莱百姓不给何以裕国三宜先楮弊通行官民利赖窒而不流自上坏之物价翔踊民不聊生四宜先忠义之士国尔忘家杀身不悔无贵贱无小大必有以旌异之则人心激五宜先奸暴纵横弱肉强食上下党结政以贿成岑范久踈无所忌憚六宜先惟侯世臣之裔与国同休戚虽位卑政剧犹惓惓抚民如子矧今赞风纪之司立清要之地有不举先务以新庶政者乎将见薳稂莠以扶嘉植涣冰雪而回春阳则深山长谷之民必举手加额曰宪幕有贤其将复覩唐虞之治于是来者慰悦请书其语为君赠余虽未识君然得其为人矣故敢献刍蕘之愚云

吴伯渊吟稿序

余儿时从师学诗辱教之曰吾之道本乎性情寓乎景物其妙在于有所感发苟无得于斯不名为诗因举古诗优游不迫意在言外者每夜讽咏数语久之真觉淘去尘俗神思清远于是令录三百篇中可兴可怨者及离骚而下苏李汉魏等作沉潜诵玩参以盛唐诸名家而止常曰诗在山巅水涯人情物态故纸上踵袭非诗暇日率子弟徜徉临眺仰掇俯拾无不可诵然後戒以语忌俗意忌陈调忌卑味忌短小者不可使多难者不可使近得之悠然挹之渊然而诗在是矣其後年益上思干禄以养亲竭力为举子业终岁不一吟者有年然旧闻隐隐在耳梦寐犹未忘也近见一二学者喜铺张而乏变化尚朴厚而无兴趣多或未精短或未畅安得起是翁九京之下与共论哉临川吴君伯渊以其诗示余有春容而无急迫有蕴藉而无斲珣有情景而无典故真可与言诗矣由是邇而求之而盛唐而骚选而三百优柔涵泳之久且将有得于诗教温然为成德奚啻小技之精而已哉余之期君也远故以所得于师者竭焉使三复斯言有助我之欢则非吴下阿蒙矣用序其稿俟良会之再卜之

送杨子牧九江谒吴廉使序

凡游都会之地者非有析圭儋爵之想则必贸迁废举之徒否则挟其一技一能以自售舍是三者亦无因而至矣今有漫游之士无三者之志而有思贤之心求俶傥瑰玮之君子一见以自励衆人讶之余独奇焉非王谢家子弟有此一往隼气哉前宪使吴公以雄辞直道屹立乎邦土离析之际困踣不回万物吐气不负乎学不愧其先礼也愿为执鞭久矣而衣食于奔走志弗之遂蜀杨樵子牧故宋参知政事公栋之裔孙其尊父则余氏出也别余将游九江问其志则曰曩侍亲尉崇仁时尝一拜宪使公今二十余年矣怀贤之切尝夜梦之思少立下风获闻崇论宏议岂非平生快事哉余闻窃惊叹焉公一退土耳其有声利之及乎人而欣慕之者惓惓弗置此岂偶然之故耶系人心者必有在矣而子牧卓越之见殊于寻常余犹为簪纓世族之有贤子弟喜也夫以余慕公之素而依违于日迈月征之余不得奋飞以奉教于左右今

于杨之往也能不重竦望之情哉虽然九江今都会之地也子之往也异乎三者之志矣抑适沧海者人必示之以其珠入崑山者人必衒之以其玉珠玉在侧得无歆动于中乎子牧作而曰樵归之日倘辱大人先生咳唾之珠玉志愿足矣他则非所知也相视一笑而别

録事司典史谢宏用美解序

典史司县幕佐也持案牘之权与官吏相可否其职任之系不轻然率由吏老将至而始任焉故好兴事舞文法乃其常敦笃浑涵之意什不一二也苟有之则人陰受其赐者多矣岂必有建明施設而後为贤哉吾郡録事典史司谢宏用之考满也城西诸君子谓礼曰谢君佐政三年矣醇谨而无锲薄也惓惓而无操切也奉法遵职不察察以为明也同寅协恭不断断以为任也知録事张公之贤而相之而民莫之知也吾子可无赠言以寄吾党之情也乎礼复之曰吾得其人久矣彼有所受之也内附初宏用之王大父昌元以故宋儒臣逮事世祖皇帝念二帝三王之治莫备于书进而献之陈说大义上嘉纳焉授吏部尚书于是朝廷议礼制度咸俾与闻当时诸老乐谈其事谓隐然与箕子陈洪范者同科眉山杨衡州于吏部公有乡里亲戚之旧尝为余诵之夫观人必本之父兄师友宏用敦笃浑涵度越时辈庸非先世之儒术饰吏事耶使仕优益学发挥吏部公所以事君者以临其民而世济其美岂不益有咏叹君子忠厚之泽于方来哉

麟原前集卷五

卷六

<集部,别集类,金至元,麟原文集

钦定四库全书

麟原前集卷六 元 王礼 撰记

重建濂溪书院记

太虚之化絪縕升降於两间发育万物莫不各有固然之理而仁义礼智之性君臣父子昆弟夫妇朋友之伦则其最大者焉其或明或晦於斯世者系乎人焉耳尧舜禹汤文武周孔之道至孟氏没而其传不属濂溪周元公生於千有余载之後奋自南服不阶师傅超然独诣以上承洙泗垂絕之绪下启河洛未发之言其功顾不伟且大欤观太极图通书等作根柢领要有以阐夫太极陰阳五行之奥使学者知由中正仁义而主静以为之本决道义文辞禄利之取舍以振起秦汉以来俗学之卑陋此濂溪之功天下咸知尊而慕之章贡之有濂溪书院则非偶然者矣先生为南安司理时?之兴国宰程公珦假倅南安视先生气貌非常人令二子师之即明道伊川也迨通判?州二程犹往来在门政乐育英材时也河洛之学实源於此去之数世之下其神其灵未必不飞扬陟降於空同之阳章贡之滙於是表章遗迹以淑学者谁曰非宜爰自宋淳佑戊申提刑翟公繁剏濂溪书院於二水之东门庀殿堂翼翼秩秩有教有养州序未能或之先也朔望惟提刑谒拜称提刑书院在元悉仍旧贯兵燹以来莽为邱墟赣令崔侯天锡以世族为政有声念周程讲道之所不可废也遂请於郡而谋新之凡为礼殿十二楹崇三寻一尺有五寸广四筵有二尺深如广而去其六尺道立堂十二楹崇三仞有五寸广四筵二尺有五寸深视广而去其六尺有五寸仪门之楹如堂之数崇不及七尺有五寸广四筵有一尺深如崇之数灵星门三各二楹崇二仞有五尺广一筵有三尺左右为庀皆十楹崇二仞有七寸广十筵深视广而去其九堂之西为道国元公祠八楹堂之前东西为诸生肄业之所典教之居列於学侧繚以崇墉甃砌丹堊炳然焕然肖像俨如筵豆有序濬池种莲环植松竹启牖於洪武二年三月毕工是年九月率诸生行舍菜礼告成噫侯可谓识政治之本矣前鄉贡进士金友德尝为书院山长亦先後贊襄之命儒士赵敬来请记以昭久远凡学於斯者想当时师友气象而实用其力推其致君泽民之术达之天下将见书院之盛与睢岳嵩庐为五岂不愈有可尚者耶用书以告其邦之人士使知自勉焉

重修安福县学记

皇上临御之初聿兴文治思复唐虞三代之盛乃诏中外大小百司之臣崇学校明教化以基之於时海内郡县翕然向风而庐陵文献之邦奉宣德意尤恐或後其属安福县长姜君明慨悯是邑久为外暴所据今虽溃靡然欲化俗以复初宜建学为先遂谋及判簿潘君枢斩刈蓬荆爰剏礼殿时经始烦剧公私赤立他则未遑也迨侯君志健继为政始起明伦堂贰令约尔

珠又立仪门皆洪武初元时也四年冬天党孙君以文学清才起为斯邑令其下车也既抚字其民人即惓惓学校为念於是构材鸠工东西两庑各为十楹设七十二贤位次仪门东西各增两楹为师生讲肄之斋左曰日新右曰时习堂之前东为廊六楹中祠濂洛道统之贤西为廊六楹中祠乡国忠节之士殿堂仪门盖甃丹垩凡前政所未备者今皆奂然一新之守御千户夏侯机汤侯禄知崇先圣之道咸匡辅焉七年仲冬始克竣事一时缙绅耆旧来观其成僉谓学校缮修之役曩赖以经费者今无所资矣兴作惟此时为难宜勒珉纪实以示远遂推学之士龙钦具本未来请记窃尝谓教化实为治之本唐虞三道教民之法班班可考当是时民之由乎礼义免於刑罚者衆是以治隆於上俗美乎下後世道缺学废宜乎苟伪之风成而雍熙之治不能以复见当在宋也累诏天下郡邑兴设学校其後作兴风厉之至驯至民间书院义塾日增月益不可枚举要皆教养之具备而後俊造之实成故能庶几乎三代之治孙君学古者也首以学校为务其知政治之本哉真不负朝廷育才之心也哉虽然邑长之心勤矣学於斯者使能澡雪涵养以底於成异日膺民社之寄进显於朝近之踵有宋之休明远之佐雍熙之盛治以无愧建学初意顾不伟欤孙君名铎字文振是役也县丞赵礼主簿汤本洎教谕欧阳兰训导龙钦罗观俱相其成者专董其工则儒生赵宜厚云

画苑记

欧阳子云物常聚於所好而常得於有力之强好之而无力虽近且易有不能致之故予虽有所酷好而制於无力怅然以止及见苏文忠公可寓意於物不可留意於物之语於所好虽得之则喜失之亦不以愠意皆有数存乎其间同邑彭君志高示余以其所辑画苑人物林壑泉石烟云鸟兽鱼虫草木之异态一举目而得之类皆名工俊士之笔非寻常画史之所能及虽其嗜好同於予予则不能致而徒羨之者有所制也故予之画本常在於岷峨巫峡天台海门江湖之间得之不必以力而有力者亦不能夺时艰以来过东西家如适千里惟重人间长画老去恨空闻之感而已於彭君所辑得不争先睹之为快哉虽然法书名画皆士君子之雅尚也君之於画采擷裒积有若苑者焉继今堙壘沈鼎颓趺仆碣求其余欵坠刻於寂寞之涯使天下闻碑名蹟举集几案览者徐展绡帙而嘉竄之润篆籀之光辉映星斗尚太古之遗风可挹也岂不愈可快耶予嘉彭君不象犀珠玉之好而雅尚清致又羨其远且难者悉能致之而非予所及然而聚散之相寻赏玩之何极慕尚之专者亦不可囿而滞也彭君以为何如题其後以记

遂初堂记

清江刘公非先生之孙某主簿永新因家邑之三井遂占籍焉迨四世生齿繁盛分处西门之外水牕头五世有名士曰友益是为水牕先生元初代还邑毁伯仲就邑北舍东别业以居父子兄弟自为师友鄉隣美之尤博洽於史尝着通监纲目书法大行於世有孙十三人而文贯长生於戊申之嘉平水牕喜其同己生之岁月命之曰同壬辰兵乱阖门奔窜隣境间左相煽肆虐弱巢强居有年数矣乱定文贯白於公三诉於宪府凶暴伏辜卒复旧业於是相率弟侄聚庐托处而再造之功侔於剏始矣一时士友咸称咏之提举云阳李公一初为书遂初堂而序之文贯复欲礼有以记之既辞弗获则慨然曰为子孙守成於承平之日易恢复於丧乱之

後难恢复於丧乱类非有志者不能也惟祖宗经营朔业全付我有家今乃有於强暴使祖宗魂魄依依无所栖依庸非为子孙之责乎责之所在虽有登天之难蛇虎之毒水火之厄所不敢避奋然直前无所顾虑卧薪尝胆思偿吾祖宗之所付必使旧物咸复其初而後吾之志始遂而吾之责始塞嗟乎此岂靡靡億億懦无立志者所能致哉若文贯非所谓士尚志欤非所谓克负荷者欤姑自永新一邑言之先畴遗构为强暴侵夺者何限而子孙能如文贯者亦罕矣观其恢复虽家之与国大小则殊而慷慨激烈气干云霄隐然与刘文叔披图拨乱之志同科殆未易与俗人语也文贯方盛时抱负经济思少效尺寸於当世志与时违崎岖风尘以老假令生唐世得效一官於谏议有不移孝为忠扬眉吐气国尔忘家者乎何至使人有神尧以一旅取天下而子孙不能以天下之叹噫吾於是有感矣恶得不为斯堂记之

雪斋记

新安孙君彦能字其读书之所曰雪斋予闻而异之而莫知其意之所寓既而问之其友或曰孙氏之先有苦学而映雪以诵者君不忘昔人之清苦故名其斋以自励或曰昔有学於程门者刻苦忘倦退而户外雪尺君慕其人结斋而题其顔庶常目在之而有发也彦能笑曰是臆辞也非吾意也予昔者游息之宇成而天适雪如瑶林如玉城如水晶域光彩璀璨望之目眩对之神竦即之髮森而骨寒虚室生白如身在蓬岛非人间世一时爱而悦之今虽有年数矣此景尝往来於怀是以志吾斋况雪之德有五而世亦罕能知焉无尘清也皓皓一色纯也盛陰乃降时也胚胎稔岁和也不常为人玩高也清以洗心纯以一性时以适道和以利用高以砥行雪独非吾之良友耶予得其语而思之自与彦能为友於今三年其为人也嗜乐不同流俗惟琴书自娱善吟善摸隶书与人交未尝以贫富穷达异态污隆随遇不胶於物藹然熙然无崖?町畦然风致自不可凡不少诡随由此观之彦能盖深有得於雪之助也然则斋名以雪君子有不宜之者乎是为记

吉安府重修经历司记

郡府自汉以来守皆有佐长史赞务司马参军名虽不同而为佐一也晋桓冲为刺史命处士刘麟之为长史麟之不肯屈冲亲廷迎之孔休源为晋安王长史王深相倚仗尝於斋中别施一榻云此是孔长史坐人莫预焉由是长史甚见礼重与郡守相可否相唯诺相羽翼而政治以成後世易名经历始别为司在府之左更化以来庐陵复新郡治而司则仍旧洪武元年会稽宋君某以经历长其司钱塘郝君某以知事赞其长俱宦族俱以儒术饰吏治未期月时和民辑上下翕然於是甃盖绘饰灿烂绚丽登斯堂者心开目明郡守王侯见而乐之顾谓僚佐曰署宇之新过客顾瞻徘徊而不能去居斯宇者能新厥德以新其政人有不仰望者乎咸曰诺命王礼记其成以俟维新之治云

雪隐记

嗜其业乐其趣精神心术与之为一而不可须臾离者谓其隐於斯可也而奚庸迹之计哉是故夔隐於韶弃隐於稷鬲隐於鱼盐轮扁隐於斲轮陶朱隐於废举皆逃身其中而自得其趣

岂必入山之深入林之密而後谓之隐哉入山之深入林之密而得名隐则与木石居与鹿豕游者滔滔皆是也奚独止称其作者之七人作者止称其七人则必得其精神心术之微而非以迹论也宜春朱侯志德美风仪善谈论尤工写竹梅於是字其游息之所曰雪隐轩人亦称以雪隐或曰雪可隐乎予曰子求其粗而未究其精者也盖雪非竹梅无以着其清竹梅非雪亦无以增其韵志德朝而竹梅与吾心术相谋夕而竹梅与吾精神相接梦魂栩栩又尝邂逅六出天葩於潇湘之滨罗浮之野其清韵何如哉逃名爵而归於竹梅逃竹梅而归於雪盖得其趣外之趣而其隐也益清絕矣抑予闻李伯时嗜画马一日往见法云禅师师语之曰君後日必为神骏讽其画观音像以离之盖知其心术精神之注乎马也予观志德精神心术与竹梅为一有竹梅之清操雪趣固在其中矣殆将见竹梅犹见志德见志德犹见清水寒露之在玉壶庸非雪隐云乎哉志德叹曰子可谓知雪隐者矣请书以笔予轩於是乎记

草庵记

噫嘻草庵欲记之久矣然迟迟而未耐者有所感也方子英盛年壮志不屑屑穷章句遨游公卿间类功业可指取有迨夫岁月不贷华髮渐生乃遡南安之上游访前人之遗迹於是踰庾关登韶石以望苍梧下曲江而观乎昌乐之洸弭节於羊城以图南焉已而省府怜其才俾佐治保昌持以勤俭济以恢弘若可以展其平生梯梯而升以绳祖武孰知日月几何而风尘眯目世事日非矣尚忆戊戌予以鞅掌留滞雄城四郊回禄光焰烛天城中暗室如昼子英泫然语予曰杨氏簪纓之传至於先人始无以?其後今幸跻攀分寸以似以续而世变若此君子之泽其殆斩於斯乎使含垢忍耻二三其德尚何面目上祖宗邱墓乎遂相向痛哭予亦不能禁也其後别去不相闻者已二三年有南来者谓子英诛茅为屋左琴右书日明先王之道以待学者而自号草庵道人予闻而奇之於今又十年而子英亦且老矣无复可用於世矣嗟乎贵戚之臣世禄之家匹休垂裕者不少於时宜草庵而不草庵子英以区区邑幕之宾乃能始终一致俛仰宇宙间可无媿矣今年秋余以程士过凌江之驿求所谓草庵而一诣焉至则花卉後先鬱有幽趣而弦歌之洋洋盈耳又未尝不为子英喜也虽然予与子英俱駸駸乎桑榆之域矣已迈之年回首瞬息後此不过一二十年客耳方来光景又奚足控搏耶曷若返乎青原白鹭之间相与角巾鹿裘耕闲钓寂娱孙会友以乐余齿子英曰诺吾将归矣请书以记草庵遂着畴昔之意如此盖子英之祖母於予为从姑故相望拳切异於常情云

曾氏祠堂记

祠堂建於郡玄妙观何居曾氏子本中为老子徒悯其先人无主祭者作也曾氏世居邑之膏泽本中幼失恃遇忌日悲不自胜迨长归父骨烟涛千里之外世难而家丧时平而身老於是建祠於观以祀其先捐田於祠以永其祀而谒记於予嗟乎孝思终慕者几何人哉执笔於斯庶无愧矣因谓本中曰世之饫膏粱艷文绣乐轩盖堂榭之安荣蒙先业而有者衆矣水木原本之弗思春秋享祀之或懈视本中出类离伦游方之外犹凜焉宗祀忽诸之惧岂不赧然愧汗也哉本中曰古今絕续之感虽贤圣不能免为此者姑以少慰吾心云耳虽然本中之志则善矣抑予观王侯将相施田宅於老佛之宫以祈悠永者往往而有一再传之後小失其忌典大忘其像设祠之建改为收储之場田之入悉供醴鲜之具於斯时也其将若之何本中悄然

以悲而莫予对也则又解之曰反哺跪乳报本之恩禽兽犹然君不忘其本而为斯举後之人忍忘其本而废斯举乎将见一饭之顷必戒其徒曰此某师托先之余而吾与子之所共食体前人报本之心勿替引之可也又必戒其徒曰吾於此或怠焉有废焉人将曰彼师奉先之意且弗能守况他人乎将檀施慕善之念日荒矣吾教何由而兴乎本中跃然喜曰若子之言庶无隳我之志也请书之将琢词於石以示後之人遂为记

石城县重修城池记

至正十有七年予留雩阳王侯幙中见有上徐君兴复石城县治城池图状称其秉心廉正宣力周至安辑余民招附外境厥声籍甚闻之喜而不寐是冬石城儒生温晋老来致其邑父兄子弟之情求文勒石温之言曰石城之为邑尚矣南唐保定十年割?化县石城场置县於?州宋建炎间改?为赣?化为宁都石城则仍其旧云郡独僻远壤地褊小民俗谨畏南东亘闽北界盱江西抵宁都由保定迄今五百余岁其间城池修坏无可徵者内附国朝以来四海晏然无复外患文崇武弛城复隍平至正十一年淮寇犯江右由抚破宁都至於石城城无可守官民荡析焚劫几尽奸变愚从隣仇里怨比比然矣其确乎保有鄉曲守正者惟蓝田之黄洪石之廖濯龙之潘龙头之蔡唐台之魏数氏耳於是邑人刘杰暨其侄权余壽余必安熊曼卿等倡义谋复县治既平或顺或强匪居匪康乃陟其冈域民之良凭二险以居焉十六年秋郡守海公分府王侯审知徐君家本石城地之形势人之情伪必尽知之俾以府史领兵招谕其怙险怀疑者入其境画策袭下鄉之左坑围破之焚伪万户府获其印殲其丑闻风而下者七十砦至县按兵亲诣各所推诚布公开谕之曰尔曹往岁不审惑於妖言今知其非则宜速改其所以因循不悛者惧不免於诛乎今朝廷布旷恩太守施仁政转祸为福机不可失予与若等旧同鄉井敢忘忠告谓予不信请以身质衆皆感泣归顺者六十余砦为良复业君乃顾谓耆旧之人曰邑有城邑犹家之有垣墙扃鐃也高其垣墙固其扃鐃奸心何由而兴今是邑有克复之名而无其实非实墉实壑使斯民聚庐托处岂忧深思远者咸曰唯於是度广袤较崇卑具楨干储粮食立工程严惩劝剏始於是年腊月毕工於明年九月周围若千里高厚若干丈仰瞻言言俯瞰沉沉楼櫓翬飞四十余所君曰城苟完矣公廨将若之何又自捐良材百余章为倡学校仓库相继具兴躬率官民入此城处耄安倪怀寝恬语嘻向之狐兔穴通市棘荆翳沃壤者屹楼阁之连连霭桑麻之旆旆使我祖父而上数百年养生送死於兹土者不废其治谋徐君力也忍忘之耶愿一言纪岁月以示後之人予闻而叹曰韩城之完诗人美燕虎牢不城春秋责郑矧君上有保障之托下有桑梓之敬哉迹其行事可谓难矣君名行今以劳陞是邑主簿总制机务协赞其役者摄邑某某是为记

种学楼记

萧君凤冈筑楼於义山之陰字之曰种学其友尹又新既为之辞复徵予记之予闻其语而思之不无怵然有感者矣夫种学之说本於学殖诸君易经训之菑畚者抑尝究其种之之法乎二帝三王之道载於经学之五谷也杨墨申韩百家者流学之莠稗也不慎择而种之虽终岁勤动复何益矣予少之时远览傍蒐玩常嗜奇方寸之地无所不种及日至之时维莠骄骄而已尔於是赋远游涉洙泗周游齐鲁之郊得嘉种而还竭力播种汲汲焉惟恐其後时也惺惺

焉惟恐其乱苗也不幸而八月其获虽我稼之未同而衆且妄推其有秋也至如萧君其种也先乎我可谓能服勤穡事然不厄於水旱则困於螟蝗矧频年以来虽不惰之农亦舍耒改业而工商求朝树而夕陰矣惟无他技能如予者思天下之饥犹已不敢以水旱辍耕而望烝民之粒孰知万山之间君犹一翁二季凭高眺远竭力斯事不弃二三十年不获之壤弊弊而种之嗟乎如予与君其不貽改业者之笑几希而犹自信如此也虽然水旱之後地力息久则利倍但患种之秕耳予视君所种实坚实好苟舍旧而新是图则天必悯君之勤而使之受厥明赐矣异时有餽其香邦家之光击鼓以报田祖则予也青鞋布袜经邱寻壑往贺於曲江之上与种学老农取斯语诵之未必不掀髯一笑也

义塚记

义塚者何西域氏旅茔也营之者谁吉安中宪大夫达噜噶齐也於是可观德矣於是可知混一之盛矣何也西域之於中夏言语嗜欲殊焉虽汉唐以来婚媾有之然各怀旧族不能杂处他土顾安有生西域而葬江南者惟我皇元肇基龙朔翔业垂统之际西域与有劳焉泊於世祖皇帝四海为家声教渐被无此疆彼界朔南名利之相往来适千里者如在户庭之万里者如出隣家於是西域之仕於中朝学於南夏乐江湖而忘郷国者衆矣岁久家成日暮途远尚何屑屑首邱之义乎呜呼一视同仁未有盛於今日也至正辛卯公以海北广东监宪简在帝心选守名郡实监吉安明年淮寇蔓延赖公仁勇廉明戡定劳来所以父母斯民至矣又以余力买地一方於水之东西域客死於此皆葬焉筑堂三间以享以祀俾特穆尔布色董其後而世守之庶无他族逼处魂魄相安於九京也郡之耆老叹於里巷曰传称亲亲而仁民仁民而爱物推是心也将掩骼埋胔如恐弗及况士大夫之墓有不封崇之乎饥饿於我土地者有不惠利之乎父兄诏其子弟曰吾侪小人服尽情尽相视途人疾而不持丧而不救坏土莫让甚若仇敌闻贤太守之风将不胜其愧悔矣呜呼民德归厚其在斯举也夫是不可以不记

麟原前集卷六

卷七

钦定四库全书

麟原前集卷七 元 王礼 撰记

雩都沈县尹祠堂记

三代御天下之贤也取之有其道用之称其才当是时大者靖共岂弟信道不回小者和顺正直执德惟谨君臣之义有死无贰下逮秦汉先王之道几息然人心尚醇鲁地归楚也曾几何时即不肯易节於汉非高帝示羽头彼岂有愧礼义之国哉田横於齐人也一隅之主耳及横歿二客自杀五百人亦自杀何其同心同德视死如归有如此者唐宋以来守节死义之士亦屡见焉我元有天下也取人多涂用人一律然国家涵煦几百年报本之思虽齐民不敢废况析人珪儋人爵者乎至正十三年淮孽蔓延江右效死勿去者李江州一人耳弃其守土死与寇力战不敌死屈体折节求免弗获死等耳而荣辱异不知所决择何哉兵部全公之牧赣也以忠义固人心以公正为民望故壙壑独完思欲风厉有官君子以报国素矣夏四月雩都县尹沈侯野仙死於兴国防戍之地仲子绍节死焉家僮二人死焉公闻其骂贼壮而哀之遣吏吊其家率属候其丧为文祭之立庙祠之举官其冢子绍忠以世之於是赣人以为荣奋而从之也轻南唐後主时有淮人李雄悯国城重围奋力往救阵於溧阳与宋师遇父子俱歿李氏讫亡不沾褒赠容斋洪氏每痛惜其无传夫舍生取义者其理正其心安即无憾矣传不传非所计也以今较昔沈侯之遇兵部公岂不诚幸矣乎予知其慰於九京也十五年来雩都绍忠袭官已二年邑人感侯死事欲祠祀之绍忠曰昔我父虽尹兹土然未久而歿生未有以利乎民可以死而有累乎民哉自创祠三间於东南城隅设像以祀买田岁入粟十石贍祠事请记以示後予辞之辞之弗获遂志思古之意以成沈侯之仁以慰绍忠之心以着兵部公激劝之美若沈侯大节之详则有兵部公所制庙碑在侯字宗仁绍兴人

赣州路重修城北黄籙坛记

老氏之教有坛安所稽乎古者祀郊庙则坛祀社稷则坛唐祖老子为玄元皇帝宜其教之有坛也曷为而屋之其犹祀帝於明堂以人礼事之亲之也赣城北有黄籙坛而咸称曰下坛何也城内坛者三为斯民祈禳之地尚矣顺流上中下别之斯在下也此何以独兴昔紫阳张真人治妖 於梅关尝此焉信宿仙真之所过化意必有陰佑而默相之者谁与新之真常冲静大师周君常静暨其侣孔君道清也成之何时费将焉取我元至顺三年里民刘英可礼请二人主坛事二人尽祷祀之诚兼岐黄之术所活既衆人益信之乃竭平日錙铢之积以供兴作无求於人於是事神有殿燕居有舍井厨庖廊靡不完缮实至正八年也然则孰主张是太守正议伯都呼丹通守宣威哈都尔也求文於石者何欲来者知兴废在人勿替引之可也噫使凡有名教之责者能如孔周之用心其道有不昌矣乎

城南园池记

凡营第宅於州里者占临眺之美什五六具园池之胜什四三并而得之者什有一二焉然好事之士鲜能遇之往往夺於高訾富贾之流辱於委琐握觚之目则犹絶伦卓行不遇知己岂不负其平生奇气哉金川黄某磊落士也卜筑得园池临眺之胜欲予有以记之问其概则曰弊庐久毁矣早夜以思年将半百而寸禄未沾吾志自期於古人吾遇乃不如今人城南可以隐而阖庐庇风雨曾不如桑土之绸缪者乎吾园广袤数十余亩倚其池虽结驷连轸可以径度荆草屋数间其中东以贮妻孥西以待知友无櫛栌节棹之华有竹苞松茂之固以峯峦为障图以云雾为屏幙左经右史彼琴此奕暇则艺树课蔬学尸乡翁从濠梁叟客至山肴野?随意觴酌谈笑竟日醉或鼓腹而歌歌曰我园我池其甘维菲其鲜维鲤衍我嘉宾如兄如弟於胥乐兮又歌曰中园有璧兮池有石杠伫立以视兮或潜或洋花之朝月之夕池上乎翱翔诚愼愼施施不知其不可也予闻而喜曰善黄君之乐斯胜也曩君家於驿近斋阁清幽玩好满案滋兰臯治蒲石士大夫往还者辄倒屣迎留引满举白尽欢与世之拥妇儿屏间窥者异故赋咏传诵矧结庐城南又所谓并而得之者胜概有以助发其伟怀名流有以品?其清致则地若□而幽景若窈而邃予岂惟羨君之得所将贺园池今日之遭矣兵乱以来予避地南荒惟恐山之不深林之不密清江碧嶂之间无谢公屐者余十年矣他日停楫东臯或造其胜尚当为君一一咏之

石坡记

古郢王君彦昭仕於江右也语庐陵王子曰吾舍於石坡之下日履 确以游以眺汉水汤汤其趾一瞬千里而石坡俨然泰华之仪刑矫然庐霍之秀拔友石益久熟察而爱之物无故触之而物自坏或迁之不轻动以为墉墙倚柱堤防也外暴不为患膩滑离离而色不一嘘之云蒸而雾温叩之羽振而徵应用之砥砺则剑戟銛鋭中蘊玉而人莫之知吾性乐焉因之以自号子以为可不可也王子闻而叹曰天下之物苟适於用者皆可敬也而况於石乎况於石坡之产乎柳子谓楚之南少人而多石乌知石之德岂庸衆人所及哉物无故触之而物自坏刚也或迁之不轻动重也以为墉墙倚柱堤防外暴不为患忠也膩滑离离而色不一文也嘘之云蒸而雾湿润也叩之羽振而徵应直也用之砥砺而剑戟銛鋭利物也中蘊玉而人莫之知谦也之八者君子或未备恶得以石视石耶盖刚而不润则流於燥重而不直则流於滯忠而不利物则流於朴文而不谦则流於矜兹焉兼尽其美庸非才全德备者哉或曰水沫为石柔而刚也或曰石乃气之核阳而陰也王君乐石坡之为德而身体之予知其寬猛之适中矣夫当蒸黎涂炭之极慨念何使非民急起而救之翕然致善政之称於谈者之口是石坡方由王氏知名天下尚何可不可之难哉诗不云乎惟其有之是以似之即石坡以观其人君子有不知所敬者乎昔米芾见奇石喜曰此足以当吾拜予於石坡亦云王君笑曰子辩矣子辩矣请事斯语以为进德之助予故记之俾知君之所以号

具庆堂记

至正壬辰吾邑郭一鲁充洪省行人之职监司康公异视之知其二亲耆艾善养无违为书具

庆表其事亲之堂亦可谓荣矣後之九年崎岖兵乱栋宇化为飞烟而亲之具庆自若也一鲁将谋新之繇章贡访予雩水之上语及具庆喜动眉睫徵予文记之予闻而叹曰具庆之乐岂易致哉谓其系於天者固也予窃以为亦存乎人焉上焉其亲下焉其子无所愧负而後天之厚於我者始不孤矣天下亲之具庆滔滔皆是也其间有而乐之者几何人哉得天为至厚而於人有未尽虽有具庆如无有也今郭氏之堂严君德庆推官与宜人涂氏朋壽一百五十岁矣齐眉偕老鹤髮童顏笑语雍容儿孙环膝此天隲佑之隆非偶然者而德庆知止足之分杖屨邱壑抚青松以怡顏娛白云於无心视彼日暮途远倒行逆施有迳庭矣庸非保有厥庆亦系於其亲者乎一鲁兄弟馨膳洁飧承顏候色夙夜匪懈惟志之从以适亲心有家庭之誉无子弟之过又有以成具庆之乐鄉人望庠起敬起慕嗟乎予少之时未尝少离乎亲侧人固有羨其具庆者矣其後有四方之徵欲躋攀分寸为父母荣也定省之疎甘旨之缺间亦有焉由今而思荣不盖愧矣闻一鲁具庆之乐不自知涕泗之交颐也古人有云孝子爱日又曰为人子者愿为人兄不愿为人弟知此有不惕然於具庆之日者乎郭氏能全斯乐予故着其父子间意而深羨之亦以志吾之过云耳

诗礼庭记

诗礼庭者麻江郭氏之古堂也郭氏莫显於唐令公第七子尝佐庐陵庐陵有郭氏自兹始当在宋也有通五经指要三举於鄉号盘轩翁者爰构斯堂於时藏修於时游息於时诒谋他族所莫及也翁三子七孙其孙字洪德者恭俭慈厚显用於时予既识之知其有闻於家教矣伯氏懋德邃於易学惜乎未及识其子复过予雩阳举止雍容谈笑又信其不产於三家市也一日请於予曰吾氏自先宋以来莫不兢兢焉诗礼淑身者以曾大父家训在闔门数百指聚庐托处兵乱以来悉为煨烬惟诗礼庭岿然独存意者天之佑之善余之泽或未艾也昨谋於季父将翼以傍舍新之庶几勿替引之意也愿记其概可乎因为言曰诗礼之教圣人数数然言之不厌盖深致其意焉耳平日雅言执守者诗礼也示门人为学亦曰兴於诗立於礼也至於过庭之训二者初不与易於此见圣人心胸公平广大人知未尝私其子予以伯鱼所闻论之未尝不厚其子也盘翁取以榜其庭使子孙尝目在之用意頗不深远哉游斯庭者忝乎如闻我祖教诏之叹息肃乎如覩圣人独立之仪刑顧瞻之顷必慨然而兴曰温柔敦厚诗教也反求吾身其有一毫弗似否乎恭俭庄敬礼教也反求吾身其有一息或戾否乎慎思之笃行之将见易直子谅和平老成达於政而能言进退揖让周旋酬酢会於理而能立还不负诒谋之盛心远不愧垂教之本意岂非吾愿望哉舍是予无以助子矣复谢曰善哉敢不服之无斁以无忘先生忠告之赐於是忘其浅陋援笔以为记

游洞岩记

予儿时闻郡城士女仲春多游青原洞岩有畅叙之乐稍长尝至青原惟洞岩未始有一迹庚子秋与亲友龙同翁子元辟地明德江口李家步万载黄鍾鍾英同邸暇日鍾英子元约游洞岩观值夏儒生胡章文焕臧梦良尚弼偕行予二儿亦在侍经邱寻壑萦紆而入得遗墓榛莽瓦砾间令人兴尘世转堪哀之叹仙童道予至东岩循谷至尾石壁峭立罅罅有若掩关状相传唐贞元年中吉郡阎使君案自表入道暨得戎昱代隐岩下久之石渐合其家人犹见门内桃

花半树不复可得入泉??自巔而下自藤萝垂瀑中类龙须俗号龙须草泉可咽不可 味甘而烈絕顶有玉华坛乃曾仙化处有棋枰药臼微雨未往观西洞清幽通净居寺钓台下水所谓六仙者阎君前有谢仙後有彭刘曾皆无名曾此山道童而杨仙师在东山者亦与传者云昔天师尝定天下名山三百六十以应天度此居其三百三十五焉观有徐楷记自宝壽改名朱陵其後忠简胡公铨丁大中丞公忧服除与兄蓬山居士筑栢舍於洞岩从名儒萧楚讲学观门殊庭丛书阁多忠简与周文忠公题匾其解牛庵壁题云省庵居士周子充澹庵老人胡邦衡同欵朱陵饭蔬食歆茗听鸟弄甚适乾道庶子启前志忠简又诗云夜久岩壑寂默坐祠宇岩瓦响松落子磬声风入檐月晴添涧净云散露峰尖对景发遐想莫肩梅与阎属和赋咏满壁今皆烟飞影灭诸老声光无所窥寻矣少焉出山坡外有碾涡磨室乃羽士侨所肃客烹茗因得洞岩初集中有唐戎昱送阎使君入道诗云闻道桃源志尘心忽自悲予当游宦日君是去官时金汞封仙骨灵津咽玉池受传三籙备起坐五云随洞里花常发人间鬓易衰他年会相访莫作烂柯棋又一律云庐陵太守近隳官月帙初朝五帝坛风过鬼神迎受籙夜深龙虎卫烧丹水溶入镜纖埃静玉液添瓶漱齿寒莫遣桃花迷客路千山万水访君难与荒幻之说往往合约山朱涣有齐天乐云白云封断仙岩路重重洞门深窈翠竹笼烟芥崖溅瀑古木陰森回抱坛空石老鎖一片莓苔几丛莎草试把桃源较量风景是谁好乘鸾人去已久只今惟有鹤飞猿啸树拥青幢泉敲玉佩疑是羣仙重到尘氛可笑久志慕丹台梦思蓬岛愿把真游细参梨与枣鹤田李珣诗云苔径入东西苍崖不可梯磻分泉脉远云护石棱低瑶草春烟湿桃花客路迷阎君成道後谁复此幽栖予曾伯祖衡州史君南山翁季雍亦有句云神仙所迹人难诘宇宙初开孰与谋最後须溪刘先生依同年萧献可於虎溪与巽吾彭元逊亦有登览之句刘诗云古木荒烟闔又开洞门无鎖有谁推瀑泉未受徐凝浣石壁犹留叔夜来黯黯苍苔开宝宇高高华盖化人台日斜钟动山门雨不见林僮放鹤回又云洞府由来自有真緑扉半闔劣容身山中黄石避逃我城郭令威憔悴人桑海何如麻谷水桃蹊只是正元春道家藏室书何在风雨荒祠认垫巾彭次韵云五百年间石壁开偶然约候不须推古今乱世神仙出风雨空山客子来六士飄飄专洞壑三华离使拥萧台御风更上千山顶又见乖龙抱耳回又云从来疎懒任吾真自省三生见在身石室旧书应待我半山长啸更留人白云下抱苍崖雨野草时通洞府春城郭遗民今老矣史君应复识纶巾阅之尽卷子元作而叹曰昔之游此者名流多矣非藉歌咏何以畅一时之雅怀为异日之佳话况兹游实濯濯文翰之侣盍赋诗以纪斯会於是用江山留胜迹我辈复登临为韵分赋卷成人藏一通一通授羽士鹤臯草楼予故纪其概以见一时游心方外仰止先贤之意云

友庆堂记

安成王尚宾遣其子孜致辞庐陵王礼曰某世家临川唐同光间有为吉州刺史因家焉名其里曰金溪示不忘始迁故地先祖崆峒先生周显德中赴召读史官之弗就赐号孝友居士諫官杨公徽之榜其燕居曰孝友其後辟地城居既靖大父兄弟复谋归金溪之里曰是初徙之止基也屋庐尚足庇风雨忍委而去之乎更字其堂曰友庆赵文敏公书之程文宪公记之兵兴以来堂毁记逸侨居郡城又十年矣慨念始也思自树立期不坠家声孰知命与时离竟沉困卑位无所成名今焉老将至而耄及之复奚能为仍诛茅金溪为待宾课孙之地复以友庆二字揭之楣间庶来者体先祖友于之心荣立家门志愿足矣窃闻古以文辞自娱者率能成

人之美斯志未有以诏後敢控於执事礼以荒蹇辞久而不获其知友王季?又日贊於側於是因季?复之曰高明祖父以友庆易孝友者非忘孝也友者孝之成也人之於亲生事葬祭之外无所用其情惟起处笑语是思杯棬手泽有所不忍以及一草一木之爱皆孝也而与我同亲之遗体者乃有?墙操戈之怨则生事葬祭之尽情皆伪焉而已耳果得名为人子乎鞠子不哀紵臂不恤死者复生生者有不愧乎夫非为兄弟而友也至友而後孝之道始成古之人友其兄笃其庆或於世三十年八百验之予则以为友与庆同出异名有其友斯庆存焉庆非在友之外也尝观兄兄弟弟之家怡愉雍睦声孚气感而父子夫妇长幼朋友无不各尽其分是已由乎吉祥之中其何庆如之彼或等同气於途人视手足如胡越则情谊乖戾外务旁观祚薄门衰再世希不失矣王氏兄弟不忘其同出而友焉王氏子孙又不忘前人之友而友焉将数世之长如一日友未有已其庆焉有涯哉一家仁一国兴仁此感彼化是庆又将被於鄉国之远矣登友庆之堂思友庆之理其不戚戚於心也夫尚宾闻之喜而叹曰旨哉言乎使来者诵斯文而油然孝弟生於心君之赐也敢不拜嘉酌而赋抑之六章曰无言不酌无德不报季?醉而赋杖杜之二章曰岂无他人不如我同姓礼喜其有味於予言而相悦以有成也遂为之记

吉安路重修司狱司记

至正十二年夏庐陵守臣既复其境土实墉实壑且守且攻其明年寇势日平庶司咸竭力兴废以还旧观於是摄司狱王君存义掾史李君德彦周览圜宇上落旁通户牖摧败而器物之废者过半矣相顾慨然曰责可辞乎遂倡而修理之自春涉冬克底於成丹雘炳炳有如改作德彦谓予曰子抑知前司狱薛公之居此乎在职九年狱求其情必不可枉非辜以阿上一介无取於人虽屡空恬如也至元三年以俸积刱建弼教堂暨於门庑而内外囚舍之废者葺之复广司狱劝田为五十三石以备囚粮之不给者其用力勤而存心厚矣去年寇退舍毁碑仆鞠为荒隅即今日葺之之难知刱者之不易庸忍薛公之美无徵於来世哉子为我志於石嗟乎古者治道隆替验之囹圄之实虚故刑措不用乃三代极盛之时王政之成也狱之所系大矣任是职者岂徒然哉德彦始以宪司书往赴辟於此至是果能钦恤为心经营丧乱之余且切切焉前政之美不传是惧其用心与力可谓无愧厥职矣後之典狱者得於见闻惕然兴念官以薛公为师吏以李君为法刑期无刑即一郡之三代也推而放之他郡岂非国家盛美之事哉薛公讳居敬晋宁人李君名宗圣豫章人存义则吾郡尚义之家倾私帑助公室者是为记

麟原前集卷七

卷八

钦定四库全书

麟原前集卷八 元 王礼 撰表

郑氏孝义门表

门名孝义者何朝家旌淑之令典也浦江郑氏有之而他不得者何郑有孝义之实也余读揭文安公孝友传见郑绮事亲孝父以非罪系狱绮欲见不得以头触圜扉出血上书请以代郡守钱端礼伟之为直其事母张氏未疾绮保持若婴儿虽奏圃必抱就之三十年不懈其四世孙德珪友其弟德璋甚至怨家倾德璋以死罪逮送扬州德珪以诡计先往当之德璋比至兄已死狱市中矣未尝不深美其孝友萃於一门与古君子同科故至於今十世同?无有私财内外翕然一遵先训宜乎名公硕士播之声歌着之纪述达之邦国天下洋洋盈耳粲乎简编以垂耀於後然余犹以为是理之固然也秉彝好德人心所同孝义同根於是心有不喜谈而乐道哉至若养祈泉而井涌葬禱霁而雪消马待齐而茹草犬各雏而均哺然後知孝义之感达之於天而天应之求之於地而地应之被之禽兽而禽兽化至德通贯岂惟感召同类而已哉及观其家范朔望家长率衆谒祠堂毕出坐堂上男女分立堂下令子弟一人唱听唱以儆衆耳一人诵於侧曰子道孝养妻道顺正兄必爱弟幼必敬长毋徇私欲以妨公义毋听妇言以伤和气毋为非横以干天刑毋耽麴蘖以乱厥性有一於此既殒尔德复隳尔胤胜兹训辞实系兴废言之再三尔宜深戒於时会揖而男女各堂以序会膳议所当为各趋其事而矜不能冬夏有衣履之给婚葬有礼物之助宗族之无归者生有义宅以居养之死有义祠以烝尝之乡隣之无後者生有义廩以赈给之死有义塚以安厝之凡数十条焯焯前贤之遗意继承其良规防范其流弊念虑详密而规模宏远又未尝不叹夫天之报施善人必使其有贤子孙世世守之勿替有引故一堂雍穆有如此者然观世之清门旧族又有彼友而此不恭下顺而上弗睦见利达则忌之见清修则污之若是者抑独何心余又窃疑夫郑公之乡必其山川之美风气之聚有以助之故後之人同心同德无有榛梗如是其远不然何为非他族所能及也嗟乎嗟乎浦江之郑诚有足敬者矣过其门孰不曰此尧舜之民也此邹鲁之俗也为其子孙者可不以此自待自厚也哉郑君仲纖温厚君子也视余以其家集披閱数四起敬起慕遂饰鄙陋之辞缀其卷末以为孝义门表盖表其异於他氏而亦因以自儆发云

真定张氏乐丘表

洪武庚申前承事郎广东道宣慰使司都元帅府都事张翀即其所居之右营乐丘焉一日与其友庐陵王某往观之谓曰人生屈伸聚散犹昼夜犹梦觉谁能免此存顺歿宁均托於是吾平生动静惟子能悉片辞为我表之庶及我之见也庸非友朋之高义乎某辞弗获则以所见所闻所传闻叙之张氏真定赵州栢乡右族也上世多闻人廩仕曾祖嘉议大夫户部尚书荣祖承务郎集庆路上元县尹仁父承事郎言安路万安县税课大使彦祥封真定路赵州判官

母王氏封宜人翀字鹏举幼随父宦游於吉时世父皓任吉安路总管喜其穎拔遣入郡庠从名师後以儒生推择为吉州水吏陞补隆兴路掾检举积年无所稽决旧牒凡数十白诸省府之长尽去其籍革絶虚文站赤旧遇马死站户辄赂提领之属迁延不补使枵上之驿络绎受困君搜弊问罪马政一新御史过而悦之大加称獎壬辰红巾逼江右省委隆兴治中潘景中繕城墉潘粹无所措一夕髭髮尽白总管安谦召君与谋君曰事急矣陶瓮何及凡寺观街衢及县司各处条石移以起城借民库砖足之而城以完迁补吉安掾时寇初?城市煨烬达噜噶齐丁中宪?舟东岸总管梁亚中屯戍大洲墉壑堕寘民无与守府长危之君知真常永兴二观之丰裕召而谕之曰有城斯有民有民斯有观唇齿相依者也今城渐完其上守铺百五十所敢以累二观将真常免战舰之修永兴免户役之累以优此劳二观风从翕然以就其次修葺仓库官舍设置险要防御近逆境者免秋粮罢军需赈饥劝分停不急之务皆君赞襄力也至若权谋机变虽古智能之士无以大过初丁中宪忧寇蔓而兵少命典史陈德威劝义士募丁壮以备荆时省掾陈允中自长沙辟难至永新民共推之遂典一州兵务义士有惮德威严切赂允中之佐吴以吾罪德威迟慢军情擒寘於狱丁公求而弗获颇衔之委君榜散其兵权允中觉遣其妻之弟额森迺於龙福以羈君君匿於断岸榛莽避其锋厚赏募民乘其後也先被禽於是德威囚释而以吾就罪丁公又命进士龙元同摄万安尹龙验屍邓林刘季安遣客刺之领衆白尹事闻委君驰驿调泰和州尹达正道讨之达以粗能自守辞君单舸自诣万安因所识求见季安诡示以按龙泉官典失守檄季安为酒飧宴懽如平生时参政全普庵萨里留頼遣宁都州尹杨钧州判兰生领衆五百驻皂口意在季安而未敢入季安亦疑之君啖以甘言且曰二人吾友旧也愿借季安一荈二亩侑懽媛一人吾往与接殷勤覩之驿舫留此季安以二价从我因得其情矣遂至皂口与杨兰相劳苦饮酣披腹心出全公擒伪尹特勒宗从旁目及焉明日回邑中令勒宗语季安我不欲数露形迹向晚大尹可来商之夙戒烝徒曰刘尹至吾舟烛灭即离岸发櫓矣至昏季安从数人至君请尹登舟而约其从谓谋不可不密也已而烛灭舟开顺流如箭瞬息抵快阁矣達侯闻之惊倒万安归正全公闻而叹曰吾遣二人领五百衆以往乃不如鹏举一人使我得一二如鹏举者何所不济乎迨君之掾广东帅府也首掌边关於石门口盘诘私鹺官卖文引致粮五万余石招安连桂二州及南海三山官窑反侧又典选法衰老待次者湔除豪富叠注者追改愬讼咸归歌謡载道本道宪使伯嘉努暨帅府官荐剡交上至正十九年入京授前职考满宪使布扎尔布哈复荐於朝君慨然曰海内兵兴征伐之权自方伯出其能久乎吾父母年高侨居於吉定省久踈子职缺矣乃间道归覲怡愉色养孰知悦亲之志长而待养之日短明年连丁内外艰然三牲之奉五鼎之祭亦不愧人子矣既而筑室庐陵城西以老占园林之胜而字其堂曰知止君子莫不高其志云嗟夫若都事君者其亦罕见也乎智足以牢笼百态而所守也正才足以应酬万变而所见者远有拯民济物之心而不逢其时有烛奸揅弊之策而不尽其用然而进?不失其宜恬澹以保其节仰有以光乎前俯有以启乎後亦可谓卓犖不常者矣昔人旷達之怀固有以自铭其墓今君乐丘成而属笔於某其亦知某之刚直言足取信於後世欵是为表

卷九

<集部,别集类,金至元,麟原文集

钦定四库全书

麟原前集卷九 元 王礼 撰传

静春先生传

刘先生清之字子澄吉州庐陵人也年五岁读李瀚蒙求至龚遂观农文翁兴学诵不絶口父母因语之曰此二君子教人读书畊田也人事不过耕学耳自是读书勤甚比长受业於兄劬学自修孝友诚笃质直好善心广气和强敏有立专以仪刑先哲为事博极书传不端科举之习绍兴二十七年第进士授袁州宜春簿未上丁外艰服除改严州建德簿欲应博学宏词科及见新安朱公熹即尽焚所业慨然义理之学罢官严陵亟至东莱吕公祖谦书院讲论经义留数月乃去广汉张公栻守严陵时未识先生而深知其为人其後书问往复神交而心契矣盖先生天资既高复与二三君子游故所造日益超诣其学以力行为本不事空言燕居端坐非繙閱经史则省察心情见义如渴无所顾虑与人交推诚?恻语约理尽见有亲者必勉以孝敬见有子者必勉以教子见初仕者必勉以事君泽民为志闻人善乐道不已闻人过惨然如痛在己训诱後进惟恐失一士继任瑞州高安丞抚州宜黄宰俱有善政龚茂良周必大荐於孝宗召对首论民困兵骄大臣?托小臣苟媮数事又言用人四事一曰辨贤否二曰正名寔三曰使才能四曰听换授称旨除太常簿后谢诸公有如怀禄希世将恐初心之遂亡倘或献谀取容何待知己之不厚未几复丁内艰服阕倅鄂州岁满归自武昌日与学者杨炎正黄豹李如圭等三十人於槐陰精舍更相问辨以观其识向閱时既久凡去私进德之方修身应物之道彙集得百余篇名曰槐陰问答时诸司荐知常州允请得除拟奏事略曰今日之俗惟知得而忘义诏令一下仕者曰增秩乎士曰免举乎兵曰受赏乎民曰蠲租乎有则欣然奉承否虽良法美意利国而使人视之如无也盖为治之道有政有教理义人心所同谓今世明於理义者难其人不亦诬乎今当精择百官求明於理义者为监司为学官为守令为将帅则风俗知义上下一心陛下又与大臣端本清源所以仪刑万邦者不出於他而举出於礼义将以绍复大业斯无难矣未上又改衡州当路忌之讽言者论罢差主管云台观宁宗嗣位越月即起知袁州而病已革矣初先生贄晦翁以书其略曰王承告其子毗学之所入者浅体之所安者深闲习礼学不如式瞻仪刑讽诵文辞不如亲承音旨清之读此未尝不慨然太息也学之於人切矣宜乎父子至情丁宁而不敢忽也始清之读语得元佑诸老之说以为世徒有此书耳他日有告以今时诸君子所发明者时坐不安席欲起而从之已而不能则有三焉体弱不能徒行贫无仆马不可以适远一也位卑身贱有在上者则不可攀而求之二也世道之衰屈身於势利者不怪一从学士真儒考德而问业则曰是好名者三也未云今二三君子之中不幸已死者则无可言幸而执事者在有可见之便其又奚说语曰经师易遇人师难遭愿以素丝之质附近朱蓝伏惟海之晦翁复书曰执事盛年壮气清节直道发轫雅途既有志於当世而悦

学好问勤勤有加又将有意古人为己之学及其没也晦翁为文哭之曰子澄以乐易之资躬笃行之行立志高雅信道坚深处家庭则孝弟达闻交朋友则信义昭着居闲则讲道着书有以乐衆人之所不乐从宦则养民善俗独能忧衆人之所不忧至於收恤宗党而接引後來盖孜孜焉无不用其至若其乐人之善矜人之恶又汲汲焉惟恐不尽其诚故贤者与之游常幸其有思齐闻过之益不贤者与之处常病其有明污招过之差然世之贤者少而不贤者多是以子澄得誉寡而蒙毁衆道不得行於一州而齎志以歿是可不为深悲而痛恨也耶覽斯文先生平生大节可见矣享年五十七学者称为静春先生云呜呼山川风气之通塞固亦各有时哉何其生才前後丰啬之异也由周以来至於宋千五百余年矣庐陵始有欧阳子为一代儒宗厥後节义文学之士炳炳琅琅层见而叠出於是四方谈忠节之邦文章之藪必归庐陵然当伊洛之学盛行先生身体力行以与朱吕数君子上下论议故庐陵道学得齿诸任自刘氏始而近时邑人士子鲜有知者岂先生爵位不大显於世故尊而信之者有不若慕忠节文章者之衆欤抑至道难闻师从者少故其传有幸不幸欤窃尝叹夫由宋而上遡唐与汉世之相去若此其久也而庐陵未有一名世之士出乎其间将时尚不同虽有之而好者鲜遂因以无闻欤至若道学之正如日丽天无异尚者世之相去又若此其近也乃罕有知先生之名识先生之学者其亦可叹也夫其亦可感也夫

於菟夜儿传

兵兴荆楚沔为藪户口十余万富积宝货男子从征戍家居者率妇女奴婢而巳有皮工蔡姓者出奸计缝虎皮为衣手足着铜距长二寸许遇夜匍匐而行若真虎也踰垣墙破门关妇人女子悉骇怖窜逸惟害己是忧虽奇货重宝尽失惴惴不敢视以为神虎一郡相谓曰今之财物悖致也其天降罚因是孽而丧耶不然何出入不常莫能逐也蔡由是日富尽弃其有於床下凡三岁不败邻有袁氏者家惟妾三人一日刺豕蔡市肉不得怒夜蒙虎皮入其室衆妾匿顷之其一妾谓其二人曰恐虎去而不畏者踵後入吾室将尽吾有也吾冒死以覘之缓急汝吾助遂潜往伺於室之奥俄而虎复入人立四顾取虎所不取者妾抱持之大瞰虎挟其面蹀其胫妾察有异抱持愈谨呼二妾二妾呼四隣四隣集蔡忧弗免褪其皮逃去腰以下未及褪也妾以皮闻之官官命大索得之掘蔡弃室得虎皮半截验之合籍其家坐其孥梟其首於是君子曰世之肆贪暴以戕害人者盖白昼之於菟者也蒙其皮为奸於昏夜者彼知戮之身为於菟於白昼而弗知己者又将谁戮耶殆袁妾之未遇耳世之畏威俯伏宁齧粉其身而不思除其奸者何智力不妾妇若也嗟夫

戇直夫传

戇直夫者泰和白沙翠竹里人也返徐挂墓剑不以死倍吾心刺广酌贪泉不以饮易吾洁皆其先世同姓之显者至宋科第尤甚升於学者二十二人举於乡者五十有七荐於漕者三奏於礼部及精究科贤良科者九而特科恩封世赏拜爵者又三十有四人盛哉丞相文信国公跋其宗谱可验厥後中微夫之大父幼孤辛勤敏给与时转货訾以裕其家性宇光霁时扶筇携孙寻芳洲渚间悠然自乐人称为芳洲居士大父既歿夫年日长知问学为箕裘所从皆一时名士业渐成方思自効而元之国事日益非矣於时举义者争欲致夫幕下夫知大厦之倾

非一木可支即拂袖归隐杜门求志乱定由吴楚涉淮泗以观黄河泰华之高深过燕赵齐鲁之墟访贤杰遗迹遇悲歌慷慨之士辄狂吟豪饮以泄胸中之磊块迨还辟故址理闲田蔬果有畦姜芎有区葺屋乎清池之上修竹之间有子二人服劳奉养家事悉不及夫惟娱孙适意而已乡人招饮率倾其座人初视其貌若愚至论事说理是谓是非谓非能正人之曲又似直者焉於是相谓曰古之愚也直非斯人之谓欤遂目之为慇直夫夫欣然领之谓其知己一日诣疎放翁求传其事念夫识量有过人者故为论次其概云赞曰汉高帝谓王陵少慇武帝谓汲黯甚慇而陵黯所树立卒厝国家於太山磐石之安皆社稷之臣也人之慇乌可少哉史鱼病命其子曰吾在卫朝不能进蘧伯玉退弥子瑕是为臣不能正其君他日置屍牖下於我毕矣灵公吊而闻之进伯玉而退子瑕尼父善其以屍諫故能忠感其君而称之曰直人之直又可少哉世之从俗富贵昵訾栗斯呶嚅嚅囁如脂如韦者虽累千百缓急可倚仗乎尼父谓忠臣之諫君有五义焉而二曰慇諫四曰直諫是慇直诚事君之大节矣使是得一命以展所蕴岂不庶几古人之万一而顾混迹流俗以老嘻

赞

王公君直画像赞【有序】

顓貳守奉议王公荣忠分府雩阳之六年有议欲归公会府者雩之人皇皇惧不得私而有之也则无所窥寻其声光於是合力建生祠於南城之隅设像祝其壽又各绘其容於家犹子弟不忘朝夕见父母之顔色也紫阳道士萧养素尤敬爱公是时绘者无虑百余家而养素是幅端重俊伟鸾翔虎踞见之者宛然如侍公侧也养素谓予曰数年前红巾由宜黄?宁都是邑将为墟矣赖公力战复之民有耕凿之利事育之乐繄谁赐耶其後分府於此筑城浚池比城完而寇至者几万非公则杀其父兄虏其妇女有其帑积毁其栋宇又安有今日哉公於雩民德泽在其心传於其子孙永永且不忘也非祠与像斯民无以寄甘棠之爱公果何事於此乎余曰顔鲁公倅吉时民未尝立祠公去後民始祠之至於今不废胡忠简在新州岂有惠利斯民者而新州人祠之是其秉彝好德之不可揜又不系利泽之在民否也矧公於雩人生死骨肉其以蜀人事张益州者事公固宜然予闻民不可与虑始而可与乐成使当日城完而寇不至彼且德之乎哉将劳民之叹无已也今日官府劳民於兵势所不免患未至则功不形得无有忘大德思小怨者乎养素恍然曰若然非人也长虑却顾者必不尔也噫斯举奚足为我公报哉第欲藏之後人使数世之下为政者或闻公之贤拜公之像耻为齷齪污下而有企其齐焉之思则实斯民子孙之福予嘉养素言不忘本皆民情之真又喜公之有以获此於雩人也遂为之赞曰

其忧民也有元次山之忠其破贼也有贺拔胜之略其温然於君子也风日之暄妍其厉然於小人也雷霆之交作识物情於深微济世变以恢廓倘效用而绣衣将动摇乎山岳则今之彷彿於紫气之关殆後之炳焕乎凌烟之阁者耶

二直赞

达观氏胡临江系儒世变扶义惟奸妖是诛频年贤劳民因无虞一隳防守毙於袁丑妻严闻而自沈匹夫匹妇自致不朽世禄希荣顺降恐後夫骨未寒心拟他媾表兹二直彼也顔厚吁嗟义人吁嗟节妇

麟原前集卷九

卷十

钦定四库全书

麟原前集卷十 元 王礼 撰题

题芳宇弟系思卷

右诗文一卷乃王裕伯叔亲友为裕而作也裕歿之明年其父芳宇每见此纸辄堕泪因喟然叹曰吾若火之则影迹絶日远日忘又不能愬然以忍不若命工人装缉以为卷时舒时卷诵其诗读其文犹见斯子於几席之侧而吾孙他日稍能识字亦因此可得其父之平生而彷彿其性情也则是卷岂不足以系其父其子之思乎遂标其上曰系思而欲予志其後嗟乎父子之天古今所重一体故也见其有寸善则欣然以喜微过则戚焉以悲况於裕也有羣玉之誉无嘉宾之咎恶得不系人无涯之思也哉予犹及芳宇之大父履斋翁垂老有子之恻抱孙割甘以娱末路卒赖芳宇以终其身以亢其门今芳宇复踵祖武蚤失佳儿固人情所不堪然穉孙未及二龄已知拾寸莛点唾学书是必冥冥之中有相之道诗书之泽未艾祖宗之佑弥深孤孽之达於此乎卜之虽然予也於裕自不能无感於中者矣初喜其往教又悼其亡至是三秉笔焉则大耋之嗟又岂远於芳宇矣乎裕字启後有诗三四十首皆可观并存於後云

题龙云瑞双鸡图

儿时闻尔之鸣矍然而起噫今老矣右时夜将唱
使墙下桑陰而多见此非王道之始耶右伏雌抱雏

题王仲齐所藏小景

小桥流水或後或先疎林平屿或断或连熹微兮似邮亭之夕照缥缈兮疑仙馆之晨烟不知何处有此景亦欲往买二顷田噫我知之矣其王氏之辋川也耶

题龙头

乘风云上天平地三尺水四序以之调三农为之喜海内望龙头於嗟今老矣

题鷹熊图

鸷鸟之秋高抟击与猛兽之山居冬蛰非动物之杰然者乎然拟之智过万人之英勇冠一世之雄若张良韩信则霄壤不侔矣画工托物以喻人其寓笔於彼以归美乎此也欤亦意匠经营之善也

题无诤沅兰湘竹图

得????公一幅如此悬之高阁如行沅湘满目幽致翛然意足复何用隙地丈尺艺兰种竹哉

题兰

擷衆芳而周流兮纷总总其萧艾遵澧浦以回轅兮微幽兰吾奚佩

题蜻蜓螳螂卷

飘乎上也非点水伏乎下也非捕蝉如化而生如蛻而仙淡墨所至不自知其所以然此云巢之笔入於神而出於天也耶

题子猷泛剡图

兴到舟行兴尽辙改倘屑屑乎主人岂高风於千载

题竹林七贤轰饮图

书戒沉?诗美温克诸贤旷達之怀何用尔邪抑诸贤高致衆人未识而画史姑托之豪饮耶希贤笑此有不废事者哉孔硕藏之可与友朋同此趣未可使儿孙湛此乐

题古木修篁图

风月襟怀潇洒者千寻之竹雪霜骨格傲兀者百围之木托根卷石共此幽独自常情观之喜翰墨淋漓之娱目以余观之殆犹荀陈之相遇千载之下令人仰高风而慕遐躅也

题鍾馗像

尊吾瞻视俨吾衣冠正心以正一家则上下莫不一於正而相安复何有邪气奸其间又奚事乎灵怪呵卫於門闌昌黎五鬼不足慮进士且返終南山

题万竹图

东昌李志高之父竹所翁性嗜竹尝得万竹图一见心醉赏玩以怡情有年於兹矣翁既没志高复命工人完理悬於中堂饮食起处不离其侧谢君子方称扬其孝思既而复徵予言吾想志高见竹之乘风而轩举也若翁之起坐而欠伸也见竹之雨雪而偃也犹翁之隐几而卧也见竹萌锦箨之环列也若诸孙彩衣之绕乎翁膝也盖他人视画竹也志高视竹亲也其昔人思其嗜乐之所致欤余为题其上使後之登斯堂者观万竹之图诵王谢之文有以知志高之

为人

跋

跋王与定所藏先府君贤翁遗训

吾邑王氏多祖金地长者而栋溪之传谱系尤着枫墅一?又自栋溪而别也尝闻其父兄之教子弟之率有典有则诗礼是宗未尝不想慕而起敬昨过其里惕然渊明长沙之感遂停车驰任而往访焉遂识与文与定伯仲以及子侄羣从雍雍乎故家之遗风卓卓乎膺门之伟识又不特子春相知之旧而已也既而与定视予以其先府君遗训无非举辛勤孝友务本尚义戒其子孙为之掩卷以叹人之高明祖父孰无诒谋善後之心然垂训非难守训为难故不羨朔始於前而羨继承於後今其伯仲所自立可谓无忝先训矣後來者益务封殖其德则天之报施善人将振耀於乡国岂独宗党之荣哉诗不云乎岂无他人不如我同姓有志者尚其勉之

跋张文忠公帖

右诸公但思至公血诚以报国政自不必谢仆仆亦不敢受诸公之谢也养浩覆凡三十字张文忠公示初科诸进士免谢帖也钦惟仁宗皇帝銳意文治举百年之坠典设科宾兴思尽得天下儒者用之尝曰使其中得一人如范仲淹朕志愿足矣於是慎简德望学术之臣俾司文衡而公时在焉进士及第谢座主礼也公之卓行疑其近私批报之帖辞严谊正如此某尝求我朝科目得人之盛无如延佑首榜圣继神传累朝参错中外闻望之重如张起岩郭孝基文章之懿如马祖常许有壬欧阳玄黄潛政事之美如汪泽民杨景行千文传辈不可枚举大者深厚忠贞小者精白卓犖所以黼藻皇猷裨益治道者初科之士为多虽曰一时光岳之气鍾为英杰沛然莫之能御然亦仁庙切於求贤之念上格天心当时硕德元老足以风厉後进所致也呜呼於时四十五年矣杨先生之子显始出是帖以示某某语之曰此先生药石之训也杨君其宝之友旧过临时出以展玩使由科第发身者能铭之心则必自奋以报乎上职校艺者观之必无美庄之论其於治道岂小补云遂识其卷末归之杨君以为皇元科目故事

跋李氏族谱後

西平李氏自唐至今三百余年二十余世而子孙蕃衍愈远愈光皆前闻人立德立功之余泽也噫盛哉其孙尚敬父子犹惓惓有望於立言君子发挥先美何也其意固欲来者知之克励克绍以无忝其先烈云尔李氏子孙其亦自贵望也哉吾於是乎有感

跋欧阳圭斋所作赵宜厚若愚字说後

存心宜厚处世若愚是谓八字之符终身佩服而有余至若陈言之缕缕岂子所望於予乎

跋中洲刘氏族谱後

中洲刘氏於某为母族自安成运使绍之曾孙曰常昉居永福子孙诗礼淑身安於乡里重於从政乡称善家有孙曰跃将继警轩宗海先志荐修宗谱徵序其意须惟某也笔已老矣序何能为然观从曾大父潮州府君序其谱曰族之有谱尚矣古存其义而隐其名谱名肇於汉晋盛於隋唐然多以门阀相高得古义鲜盍思别生分类之训肇於书不如同父同族之叹载於诗二礼有同姓异姓之述春秋传言文昭武穆周公祚胤之详是皆使人子孙不忘其初而知尊卑踈戚之叙某虽欲复出一喙岂有加於此哉刘氏修谱者所当知也又观欧阳文公之序斯谱深幸胜国时江南未遭兵燹故冠盖之族往往治其家谱不知者以为一家私事知者以为升平之气象可观於此今刘氏子孙重修於今日其将复覩唐虞之治也乎姑书此於後以记观谱之岁月云尔

跋欧阳建寅所藏先世二诰

建寅所藏先世二诰乃宋治平二年所赠欧阳文忠公祖偃太师中书令曾祖郴中书令之宠命也文忠以立朝之姱节盖世之雄文所以黼黻王度仪范百僚真大廷之柱石也故上之褒显其先若此礼亦宜之建寅乃其诸孙收而有之珍藏什袭不啻南金大贝之重崎岖兵乱间辄囊以自随而他亦不暇顾孰知九江一变仅以身免此诰亦散於飘风自是戚戚於怀广询博访日征月迈近始得於金陵蒋氏向非建寅惓惓系念前朝旧物能复归欧阳氏哉窃尝以簪纓之後上之当思如文忠立身扬名以显祖考次之当如建寅保先代之遗美守君子之余泽不然何以自异於蚩蚩之氓欤噫大贤之後多寂寞故家乔木可感者多覽卷三叹

跋马融忠经後

右忠经十八章东观马融所制以配孝经者也夫孝之与忠人之大闲而百行之元也违斯二者何以灵万物而立两间哉昔者孔圣以曾参尽孝因言其道遂为经而忠则未之及然有曰事父孝故忠可移於君是则君亲之分殊故忠孝之名异而义则一也融始拟圣而作此亦有益於名教使人人得其说而遵之施於有政岂不大有可观余既得朱文公及吴文正公所判定孝经锓梓今又得此文虽未敢便列之经然亦托工人以壽其传诚欲学者玩绎二书之旨庶几处而为孝子出而为忠臣则於国家化民成俗之意岂不深有所助发云

跋越国公鍾紹京像後

呜呼自古女祸之败人家国可胜道哉於斯时也有能转危为安真英特之士也嗣圣间韦庶人与武三思升御床博戏中宗从傍典筹唐之国事将日非矣迨临淄王入诛韦氏刘幽求预参大策翊赞圣储震殄元恶以存唐室厥功茂矣於时苑总监任左金吾内屯田使鍾紹京以户奴丁夫之衆亦与有劳皆可谓社稷之臣也何可及哉孰知功大难容奸邪构怨幽求初流封州再贬睦州死於道路而紹京亦左迁果州礼从越国公之远孙煥获拜遗像因叹当时如刘如鍾者几何人哉而朝廷未知大用为可惜也因题其像之後以致余之不满云

跋栋头王氏谱後

往余先君子梅洲翁尝修族谱图系以名贤所为诸祖墓志铭等作具载先世自唐仲舒观察江西子孙因家焉亦以为自金地长者曾伯祖南安教授府君有序谓往在章贡尝与居七里镇者通谱而茅堂栋头亦皆族也礼後驱驰鞅掌於岭南有王同知者从事幕中询之七里之族也迨归章贡邀余至其家视余谱牒栋头之谱乃亦有焉遂以归我行李虽偏仄惟栋头宣溪之谱不敢後抵家问谱於族人无一存者私窃自喜将谋重刊庶几後之人观谱而知序之亲疎观记述而知家之閥閥则必有感叹兴起不肯自同於污贱乃为同姓之匪人久假不归诿曰沦丧使前闻人累世之所树立没没无徵其亦可悼也夫今栋头族子志仲能保先谱及家传因获观吾家潮州府君及南安教授跋语感慨系之谨题所闻於此以志余过归以复大年兄何如也

跋王子春名字说後

礼近留枫墅子春所有一日之闻辱以其先府君及二守冯公子羽所为志仲说泊刘君云章子春字说示余余閱之尽叹其言皆可服膺而勿失父之於子也欲其志於学以求其伸之道冯公戒其母以富贵利达得志为伸当知所以为志刘君则以人物同得天地之心以生天地之心在乾坤曰元在四时曰春在人则仁是也士之希圣贤者必曰求仁日用之间无一事而天地之心不存即无物而非春矣皆药石之训也虽然用功之要未有以告之不凡泛言乎窃闻之格言求仁当自诚敬入先儒尝曰无妄之谓诚不欺其次也故无妄初九之象曰无妄之往得志也孔圣答仲弓之问仁以出门如见大宾使民如承大祭则在邦家无怨至是非吾志之伸乎子春勉之与物为春实自兹始

跋小溪郭氏隐居记後

予观士之怀材抱艺而隐也或迹有麋鹿而心慕乎轩冕之荣或始居林壑而终簪乎鵷行之列出处宁无可异者哉此双清者之为难得也西昌郭君与谅隐居小溪之高田其林壑之美禽鱼之乐树畜之遂则仪曹刘君国録萧君濯濯文翰以黼黻之矣谅之言曰予无才与艺之足以用世也高曾以来世居斯土耕食凿饮使乡称善人足矣恶敢有所傲於当世哉与之语质朴冲澹无一毫纷华外慕其表里如一者矣岂不尚有古人之风乎

跋刘复之鸡肋集

复之诗眼前景意中句而深稳有至味如王谢家子弟风流闲雅不失王孙故态如山农野老班荆而坐谈桑麻话衷曲语语笃实可听有诗如此何相见之晚耶吾家靖州府君有鸡肋集三卷今君亦以是名诗谦辞也谓食之无得固不可谓不足以当尊拳愈不可姑藏之必有尝鼎脔而知熊掌者

麟原前集卷十

卷十一

钦定四库全书

麟原前集卷十一 元 王礼 撰说

易字子让说

大江之南有士王礼字曰子尚以字行於世几四十年矣一日慨然曰君子不欲多尚人吾奚以尚为哉字之有改古有之也叔向而又云叔誉子产而又云子美矧礼之於让其义孔協让之与尚又声相近而易易易字子让让谦德也顾名思义独不有益於予乎客有闻而诮之曰子少之时内师周孔外涉孙吴济经以权脱儒之迂壮志诚可尚矣迨夫事与志违时势则然既不易其守胡字之迂且子所让者何焉子让曰今夫丰服美屋厚味姣色世之所欲也尽吾智力以求焉未必不获其一二而甘让之况其外者乎其外者无厌之性功名之累也古人有一国之让有天下之让况其功名之琐琐乎客曰吾子大让如慢小让如伪推而至於天下让让之至也终亦有不可让者乎曰有天爵良贵之在我者不能推以与人也不能推以与人岂予之靳哉彼无待於予之让而亦非予所能让虽让不屑予之有者多也客笑曰果子於人也让乎抑人於子也让乎予无以答遂次第斯语为子让字说

贺子亨字说

贺君嘉会以乡先生之命易字子亨而问其说於某某闻而叹曰先生之意微矣谓其以亨嘉期人者浅也盖君子之修於身施於事见於言必识亨之意而後可何也亨者阳德之极盛者也於时为朱明於卦为离於人为君子今夫人之为人也储精毓秀继善成性其光明正大之体与天地曷尝少异私欲汨之窒壅塞蔽明者暗大者小於是君子小人判焉知养善端扩之使火然泉达反身而诚万物皆备则其为善也孰御君子之修於身也若此可不谓亨欤由是处事接物宜厚宜薄宜隆宜污宜弛宜张宜舍宜趋如破竹如决堤无凝滞齟齬左之宜之右之有之其施於事也若此可不谓亨欤以至论议古今盛衰得失曲尽人情作为文章咏物叙事莫不折旋恣肆辞達理顺探幽造微冥会蹟到君子之言至於亨如此则其文不可胜用矣窃观世之人性凿情昏厚薄易置道不行於妻子吐辞如吃幽澁险譎至不可解若是者尚足与语亨之微义哉先儒言之亨者嘉之会也亨乎亨乎其君子成德之时乎贺君为人光明易直无崖岸隔限真韩子所为青天白日奴隶皆知其清明者诗文尤流动可快而读於是益信先生所以字贺君者为有徵云

王生伯温字说

枫墅王与文甫恂恂仁厚君子也一日道书台入郡过焉以予同宗之老命子姓羣从出拜就中长孙温其如玉可爱既而谓予曰是孙与予同生良月名之祖良年几志学而未有字觐锡

之字而惠之辞使有所持循以为进修之地实徼福之厚也礼辞不获於是揆名之良以伯温为其字进而告之曰诗称温温恭人维德之基而孔门高弟弟子之称圣人亦以温为首迹之事父远之事君皆在於和顏悦色柔言巽入而不可以粗暴所谓涵养气质者政在於此故一言之善或可弭睚眦之怨一仪之恭或可得行世之名执事贵於温恭饮酒贵於温克一动一静之间顾名思义岂不大有益於人哉大父老人之所以期尔者至矣伯温其勉之诗云无念尔祖聿修厥德是为说

吴彦琚彦瑀字说

居所二子既冠矣求字於予因念近世富家子弟类不能涵养德性以合乎中和亦由古礼废失学者未能讲而行之之过也於是字其伯曰彦琚仲曰彦瑀二子拜而受之复求其字之说庶几闻古礼之彷彿遵而行之不犹贤於求之野乎予喜其慕上之意笃则为之言曰古之君子无故玉不去身其下车也以佩玉为度其制上有折珩下有双璜而冲牙则悬双璜之中皆贯以组绶上系於珩又设组左右斜牵之使得因珩之抑扬而冲牙与璜自相击触然於二组相交之处用玼珠於其间交纳而拘扞之谓之琚瑀故毛传有云佩有琚瑀所以纳间谓纳衆玉珩璜上下之间以制其行步之声也然则有疾徐疏数之节有角徵宫羽之应趋以采齐行以肆夏所以比於乐周旋中规折旋中矩所以比於礼皆琚瑀之功也果奚适而非道耶春秋传曰改步改玉步有不同则玉声随异矣由此观之涵养德性固有在於佩玉之功而佩玉之和又有在於琚瑀之力向无琚瑀其间以管辖之则组绶下垂者有不放荡震掉而冲牙之韵且失之矣何取佩玉之美哉二子诚即吾说而绎思之吾知其能择地而蹈矣有不为美士之归乎勉之勉之无负嘉名之锡遂笔之以为字说云

刘仲恂字说

禾州刘君子衡宏达士也余获交有年数矣其子实相接於邑庠尤密与之语靡靡可听既冠字曰仲恂欲闻其义於余余以蹢躅之踪未有以告之兹行语及诺责愧负深矣於是告之曰说文谓恂信心也圣人於乡党恂恂释者以为信寔之貌大学传言恂栗释者又以为战惧故韵书或以为严谨或以为温恭要皆信寔之形之外者也予尝以谓士君子之所以异於人者必有其基也基者何信实之谓也人能信实无往而不恂恂矣有谦退无浮夸有持重无浅?若人也吾知其可大受也人至於圣神极矣然功未有不基於恂恂之信实苟无恂恂信实之资则虽有贲育之勇仪秦之辨良平之智犹五味之本非甘五色之先无素未必有所就於天下也是恂恂虽乡党所当先而信实为德蛮貊之邦行矣仲恂勉之吾告子者若是而已顾名思义他日所至到其可涯哉何俟於予言是为记

吴良贵字说

人之生也得陰阳之气以成形健顺之理以为性故有人心道心之殊理义道心之所崇富贵人心之所切仁义忠信天之所赋乃良贵也人不得而贱之故也公卿大夫人之所予非良贵也人亦得而夺之故也是以閭巷之人见夫旗旄扬飞车骑赫奕冠裳之辉煌宫室之壮丽莫

不咨嗟而羡慕此知有富贵而不知有理义者也学士大夫则知有理义矣国家用之则安富尊荣子弟从之则孝弟忠信然亦有为贵富所移以其所轻弃其所重则惑之甚者也予尝谓人能知在我者有得於天之良贵其贵无匹於天下非人所能夺亦非人所能贱千驷万鍾有弗顾也三公九卿有弗屑也况肯昧其轻重以此而易彼哉孔圣谓有无声之乐无体之礼予亦以为良贵者乃无爵之贵而天下之贵莫能或之先也此所谓天爵而非人爵所宜及矣学者可不审其轻重之辨与予友吴良贵故家才子有志於学其将效用於今时也有日矣故推其字之义作是说以贻之

刘仲桓字说

刘生健字仲桓问字之说於予冀以私淑其身可与共学者也於是告之曰子亦闻诗书言桓之义乎鲁颂之辞曰桓桓於征狄彼东南牧誓之辞曰尚桓桓如虎如罴殆皆美其武勇之意云耳然武勇之为德岂独军旅为然哉凡事莫不皆然士之进德修业类非委靡柔懦者所能成而发强刚毅之资必能有以造夫道之极故知仁非勇无以终之为事之力者人亦往往谓其不武观大武之六章颂武王武功之成以桓名篇意可见矣易曰天行健君子以自强不息噫君子之於学也可不以自强为务也哉虽然若仲桓天资予知其无愧也使之书笔势矫然有奋拔有骨力使之琴指法苍然有发扬有蹈厉是皆自强之功也一艺且然况其远者大者乎健存之中斯桓见乎外矣传不云乎士何事曰尚志人一己百人十己千亦自强之道也仲桓懋哉懋哉

嘉善字说

嘉善名衷姓刘氏少事笔砚即聪慧过人迨长为郡府书佐练达明敏牍无留滞又喜从士大夫游乐闻经术尝问其字之说於予予爱其恂恂谨愿於是进而告之曰惟皇上帝降衷於下民厥有恒性说者谓衷善也人受天地之中以为性故在人之性亦善今子名衷而字则嘉善宜矣虽然善固善也而嘉亦善焉将子之行已处事必求无往而不善然後为能尽人之道乎易曰善不积不足以成名是吾之善贵乎积也传曰在止於至善物物之止在乎善也庄周以天下之所尊者富贵壽善也举善而与富贵壽同称则善亦诚可尊矣吾子知善之可尊又知善之当积物之当止昼之所为夜必思之诚善耶抑未善耶改其未善以从其善积之止之有不善人君子之归乎懋之哉顾諟天之明明吾善以复其初也

顾达道字说

顾侯文质之戍镇庐陵也疏通聪察右文下士閱武之暇惟教子为先务有子曰和谦重谨厚尝从顏先生於郡斋於予有一日之雅别数年矣比者过门神完而气清言深而虑远以予尝有闻於濂洛之学俾说其字达道之说嗟乎达道良友也予敬爱於言乎和也者天下之達道此子思子发明羣圣心法之中欲人喜怒哀乐发皆中节则道之见於用者无过不及矣然道而谓之達者何也以其古今人物所共由故也使其在古可行而在今有所不行在已可行而在物有所不行则不得谓之达矣是道也岂由外至哉亦率吾性中之理而已矣斯理也天命

之性也人率之道也有体用动静而非两事也故周子亦曰中也者和也中节也天下之达道也虽然达道始於五典推而极之皆无乖戾其功用可胜言哉达道其勉之

叔庆字说

故人刘君子琚既歿之後见梦於其叔子观曰吾字汝以叔庆观受而遵行之非冥冥之中深知子弟之能立足为家之庆乎於今十又余年矣而叔庆承家以来銳於志敏於事膺門御侮如霜隼摩天之不可羈临机应变如转圜决渠之不可缓户役之譴何身任其责而弗辞上以安其兄下以友其弟亦可谓难也已矣予尝谓善觐人国之盛衰者以人才而善观人家之兴废者以子弟子弟?缩委靡非家之福也孟子曰自反而缩虽千万人吾往矣自反而不缩虽褐寬博吾不憚焉但视理之在我者直与否耳浩然之气焉可馁哉易曰积善之家必有余庆盖积善者集义也事事合理之谓也非?让不较甘於罢软者也洪范六三德曰强弗友刚克而六极一曰弱吾观人以此而自观亦以此予观叔也非刘氏之庆乎虽然尊卑长幼之分不可紊也贫富穷达之机不可测也吾於家庭之间上下秩然安分寡欲和气藹如则庆在於中矣诗曰岂弟君子干禄岂弟庆岂自天降者哉尝读甫田之诗以千斯仓万斯箱为曾孙之庆皇矣之诗又以因心则友则友其兄为周室之庆叔庆於是兼得之矣故於其请字之义也作是说以貽之

麟原前集卷十一

卷十二

钦定四库全书

麟原前集卷十二 元 王礼 撰哀辞

王公敏哀辞【有序】

公敏讳颖梅岗王氏之佳子弟也生於永和其父予隐之貳馆在焉幼聪慧读书辄能记忆稍长下笔清丽可爱愈损抑期进年踰弱冠念山东多鱼盐漆丝之利遂求陶朱积着之理端木废举之术因赋远游以观邹鲁圣贤之高踪燕赵豪杰之遗烈其志诚可尚也既而白云在望定省情深方乐彩衣之娱俄有玉楼之召父子天性予隐其能已於摧恻之情乎虽然公敏有弟足以终其养有後足以嗣其传可无憾也况修短随化终期於尽堂上之戚亦宜释矣士友谓古之顺於父母足以解人子之忧则称扬其子弟之美以传之後或亦足以解严君之忧遂相率文翰以哀之礼又乌得不有以慰其亲之心乎辞曰

璜沉佩委兮瑶气揜而无光蕙枯兰殒兮谁与惜此幽芳所谓伊人兮阶庭之良俦幽明其相继兮行道犹为之惨伤亲之望子兮其意孔长抚重服之逆就兮增老泪之浪浪明昔丧於西河兮或者谓其不明嗟彭颜之前赋兮又何怨乎彼苍衆万之生不可齐兮终同尽而茫茫吾闻目不瞑於卒养兮夫岂无乎季方存而亲者靡滞系於怀兮已逝亦随化而飘扬冀解弢而堕袂兮托遗响於九章

高州通守冯公哀辞

呜呼冯公之没也礼既哭之忽忽累日目忘所视手忘所持足忘所适非独予思之切也士类慨乡国之无人其眷眷不忘犹余也九原不可作百身不可赎则欲论次其平生庶几来者足徵每欲援笔辄怀抱作恶歔歔黯然以止噫可终无言而已耶公咏新人也父子自为师友延佑科兴治春秋破去百家传注发大义数十逆素王之志於千载之後庚申乡试考官以义与胡氏小异将斥之圭斋欧阳公得所赋科斗文字以蟾兔问答大惊赏曰大华峯尖忽见秋隼未足以喻奇俊以示麟洲龙公公时主试亦叹曰空中起五凤楼若天造神设奇哉亟擢之由是名动远近试礼部又以不专主胡传斥癸亥再贡亦必用己意参先儒会试阳燧赋尤冠伦凡为文耻同衆见虽肯綮盘错皆委折条达无难言者既及第丞汉阳遇事视理曲直虽权要不避老奸宿黠侧目之大府知其才委同岳阳兴国分修省署公亲领官直与物对给不劳一民视二郡任富民司出纳者费半而功倍迁鄂省照磨往海北与二司议盐茶法衆皆悦服布赦恩於澧鼎辰沅靖思播所至无留滞悉却馈赆未一月而返帅臣敬礼称叹曰使乎使乎可谓不辱君命矣鼎有猾吏姊归巨商夫死无嗣更有其赀财十万历十三年冬巡率指为外帑省委督郡官遂直其事瘦其人虽积金不顾尹上犹有郑巡检龙泉尉者皆以伪楮事诬人枝开蔓引领吏卒近百人出入数郡民窜田芜绵数十年不絶公涖政七日尽涤除之後以肮脏

不获乎上因事白而名益彰提学湖广士耻名浮贰守高凉徭不豪植盖仁而不为姑息义而不为矫激故与人言必信谋必忠乐善疾恶是是非非直言不为吐茹诈者险者不敢迹公庭而疏通坦夷之士日密侄甥之无怙恃者育而昏之所识穷乏者必有拯焉水窗刘先生着通监纲目书法公携诣京师而表章之遂大行於世呜呼公之文学政事行义人所共知而今犹缕缕及此者感知己之难遇而无所寄其情也犹记兵火之後公还新居斋阁显敞园池映带禽鱼飞跃顾而乐之谓礼曰来者不可知故旧悬隔在亡无谁语者幸吾庐尚存子时来谈笑其中以慰衰老又尝语其子曰周仲衡王子尚熊伯颢三人吾畏友也每聽其文令人豁然以喜汝善事之嗟乎自今以往善焉而无可与识也疑焉而无可与质也言何由而知其要德何由而知其奥也有过西州门之恸有经眠食地之感而已也公讳翼翁字子羽生壬辰年六十三与兄子将先生颢颢科第参政许公有壬字其堂曰双桂云余序其概而哀之以词词曰嗟至士之徂谢兮超虚蹶空挟飞仙而为曹生无所累其衷兮返太初以游遨风为车霞为盖兮芙蓉之冠云锦之袍閔下土之难平兮叩帝阍而永号豺虎锯牙啄善人兮冥冥磔之焉所逃顾乱浊而鲜欢兮灵剌剌乎崑仑之高忧逍遥以自适兮我何为乎心怛怛

启後侄哀辞

噫嘻惨哉秀而不实宣父深叹予於启後侄恶乎不为之?伤也启後年甫弱冠为学知方容止辞气雍容和缓蔼然王谢家意象尝谓家庭似此虽多奚厌三年三月以毒证殒於萧氏之馆衰老归自郡城惟见新塚皋如恶乎不为之?伤也耶既往临之日迈月征犹显显心目不能自释遂为词以哀之庶以慰斯子於九京亦以慰其亲桑榆之日也词曰

朝暾烜其离海兮陰霾勃勃以翳之嘉木蓊其增楸兮风挟電以瘁之修短数固有定兮予遐歔歔而不自禁磨牙吮血闻於脱命之叟兮宜惊骨而折心地下顷箴呻嚶兮怜生者之影单莫之为而为者天兮亦何用此控抐知子目不瞑於仰事兮亦悬情乎破镜之分牵衣之幼幸堂上身其康强兮独者自古而多壽

反招魂

反招魂为罗浮翁作也翁盛年步蟾宫有子尚观亦克踵武晚为诸侯宾客白髭红頰陶然自适处乱日如平世不以毫髮世故经心吾意或者其散仙也一日无病而逝嫺旧悲其永隔或譌招魂以归之王礼闻而非之曰真诰言古圣贤忠义忼慨之士无不列天上官府安知翁不挟飞仙往来於无为之表而以超出险浊之世为快者乎嗟咨涕洟以招之滑其魂矣非出世见也於是反招魂之词词曰君母招魂天地之性人为贵些气凝而来涣则銳些星辰河岳幽明更邇些昔步蟾宫出凡类些嫦娥望予撰轡折夫丹桂些游戏人间岁复岁些下方不可以久住日兴替些人化为兽龙变蜉蝣些朽骨如山蚁穴蔓紫些紫骝文鞚粉黛扬声些兼螯臠若蔗?冽馨些困苦乞奴饥鬼伶俜些华屋层台饰帷束组些沉薰兰膏不知寒暑些立人檐户卒无抔土些白刃差差弱食强取些负乘扬扬冠履易所些君母招魂翁岂能与并处些网罟日密物耗民悴些狐啸狸号?奔满地些君母招魂翁何乐乎斯际些嗟今之人瘠世肥予些不有阳譴必陰诛些谁如是翁经训菑畲些苦淡如甘槩不踰些君子之泽有可怜些似而不

似犹斩其传些谁如是翁有子有孙些子孙既多又贤且能些君母招魂翁死犹存些一屈一伸知去来些生全其灵逝也必有所为些蓬瀛清安何不可归些回视下界有足悲些于嗟魂兮四方上下胡为乎招之些冯虚御空升降飞扬些无天可阶无施可行些自然之门无为之乡些返吾太初大且刚些从天不老凋三光些於嗟魂兮母为听彼巫阳些

张氏五子字辞

族弟有倩曰张伯玉果断有为承家润屋五丈夫子森森彳彳出就外传秀眉清目求字请辞因以自勗我思圣门问仁孔淑其答子张五行联属今以命子錫尔景福人之为人筋骸检束心能主一容则严肃处事待人罔有倾覆孟曰士恭守此忠告恢弘大度君子之腹器量褊窄致尤取辱於人有容人亦悦服次曰士寬无尔局促身立於信犹车有毂无毂奚行失信斯恶季路无盟片言折狱仲曰士信言贵可复经纶务勤并力为戮学在敏求机贵神速少有怠忽功迟势?次曰士敏匪解夜夙仁者之泽如水渗漉利济存心施於孤独或饮食之或分金粟季曰士惠陰功可卜五者之义譬之竹木人资户用无间伯叔恭而信寬兼备乃足非谓敏惠各专一曲以是求仁仁道愈熟会尔宾亲招尔近局时出行之远迤和睦懋哉懋哉予辞可读

纫兰轩辞

纫兰轩者吾庐陵太守汤公曩居临濠所葺也?物洁芳兴寄高远有溪逸岩遁之趣庐陵王某慕其清风为作纫兰之辞辞曰

謇吾好此奇服兮集菲菲於衆芳采芰荷以为衣兮被薜荔以为裳惟?兰之为佩兮忱古人之所孰无滋而有刈兮树九畹於沅湘年既深而日茂兮玉茁芽之琳琅岂蕝幽之长处兮占托根乎帝之乡曰嘉卉之闻世兮待重丽之大明纫之以佩不负其香不纫於佩於兰何伤纚纚兰寔君子之良扬廷彙征邦家之光

云屋辞【有引】

云屋上人受业白下大云院简默静重真方外士又於院事有所兴作不愧佛者与予相好也作云屋辞以贻之且邀能文事者共赋焉辞曰

陰阳聚兮油油出山川兮被於九州其仁如尧兮覆我下土谷我氓兮有年以雨云之归兮密奕宿我檐兮依其屋极友方外之无心兮於焉憩息万物自遂兮繫予何力有华者懷云分半间号为云屋何日而还漱有蝮兮林有虺与尔遯思兮无有後难云屋兮云屋山中兮多福世汹汹以劳生兮吾将从子於桥之陰於涧之曲

陆氏四子字辞

客有过予诵陆侯之贤曰兹非岂弟君子干禄岂弟者乎既又及其子弟之美曰兹非维其有

之是以似之乎於是历举其名若字属予为之说予应之曰字之有说未古也古者冠而字之三加皆有祝字之辞祈以成人之礼也予请仿其辞以绎其义亦犹行古之道欤客曰唯唯爰叙以辞曰

有形有名品彙皆然人炙万物字以表贤约情尊性毋使或偏顾名思义犹佩韦弦咨尔伯经理贵持循智贵流转经则守常权则通变人之大经三纲五典入孝出弟尧舜非远咨尔伯阳乾坤清明万象开张阳德君子纯粹善良郊麟藪凤惟时之祥自强不息无怠无荒咨尔伯瞻顒顒敬慎威仪褫身过者属目泰华嶙峋争快先覩卿云景星望而弗畏茂誉曷腾咨尔伯凝道在吾躬学以聚之弗积於己用奚由施凝道之端实本於学俛焉尽力德修罔觉嗟嗟四子陆氏之英必振其宗必洪厥声吴有伯言才兼文武唐有敬舆参决可否将相之门必复其初无念尔祖以培庆余

麟原前集卷十二

麟原后集卷一

<集部,别集类,金至元,麟原文集

钦定四库全书

麟原後集卷一 元 王礼 撰序

白云图诗序

嘉兴王君可及之丞永宁也政清事简时娱情翰墨形诸咏歌率多怀亲之作古鄙贰令张君宗顔为作白云图县之官署以寛其离忧而徵言於余余其将何以辅仁哉昔狄仁杰授并州法曹而亲在河阳及登太行反顾白云孤飞曰吾亲舍其下於是仕宦而思亲者千载以为美谈噫吾意梁公於斯时也身縻爵禄而心切定省怀哉怀哉极目天末其思亲也当何如哉卒之勲业昭於时声称垂於後赫赫在人耳目如昨日由此观之士君子之含悲茹辛离亲戚弃坟墓以效用於当时者志必有在非徒干升斗之禄而已也今王君以儒术起家作宰岩邑偕偕朝夕违亲於二千里之外衣冠枕簟之适其宜羶芻滫髓之备其养者皆不得以躬眠如何勿思虽然忠孝一理也能忠於君者即孝之移故莅官不敬曾子以为非孝可及勉乎哉异日使国人称愿曰幸哉王氏有子如此庸非孝之大者乎远迩之士得於见闻者咸因图以咏其孝思余故序其概以为劝云

白沙吴氏族谱序

大传曰亲亲故尊祖尊祖故敬宗敬宗故睦族说者曰人爱其父母则必推其生我父母者祖也又推求其生我祖者则曾祖也尊其所自来故敬宗敬宗故睦族穷困者收而养之不知学者收而教之此宗子法也所以管摄天下人心厚风俗使人不忘本耳今宗法既废士大夫家亦惟明谱系辨昭穆以广亲亲之道而已尝观虞夏商周禘郊祖宗其推而上之报本或至於数十世之上推而下之广骨肉之恩至於无穷故周公兼制天下其称兄弟之国者十有五人称姬姓之国者四十人皆爵命之使传国於後世当其时也有分封之荣有锡财之厚未有专享前人之泽者也桀郤胥原狐续庆伯降在阜隸叔向亦以为晋忧今之欲明谱系表世族者可不以古人之心为心乎西昌白沙之吴源於禾川其为显族也旧矣名贤之序其谱者衆矣远孙茂卿又合禾川之谱而重修之此尊祖敬宗之心也茂卿崎岖兵乱间垂三十年一还故里卓尔有立以无忝所生族姓之在俘虏者悉收完之此叔向之忧也穷乏之不能自振者因可利而利之亦成周分锡之惠也易墓祀祖无间於闔族之间不遗乎数世之上非三代报本追远之遗意乎茂卿不有古人之心也哉虽然在其族者苟能以茂卿之心为心谨其身亢其宗吴氏有不复兴矣乎某於吴婣戚也故序其後以规

魏德基诗稿序

古者风俗淳美民情和厚故发於声诗虽下至闾阎畎亩羈夫愁妇无不由乎衷素当歌而歌当怨而怨其言皆足以动人是故高者黄河太华低者寒泉絶谷大者钧天广乐小者幽琴遗响遇之而神怡聆之而兴逸非若後世摹仿步骤仰探乎风云月露之滋华俯掇乎草木鱼虫之品类及玩而味之求其戚戚於我心者未之有焉何也发之者非其真心也嗟乎安得能吟之士与之诵诗三百以涵养其性情之本哉钱唐魏德基以清才茂誉出仕於时司征於吾里之永和其为人也一介不取予冰有时而让其清蘂有时而畏其苦进思忠君而退思报母若是非其本之既立者乎故其为诗也随意之所欲言而非衆之所能言无摹仿无蹈袭异於世之爱惜情思者远甚使因吾说而推之涵泳乎国风雅颂以为之本沈浸乎汉魏晋唐以为之佐岂不愈有过人者哉德基数以诗视余余既得其诗且慕其为人方将采之以观而余友夏彦琛又以序请余故序其稿如此而深以诗之大成者望於德基焉

赠刘学云序

古称王谢家子弟盖风气自与常人殊其阶庭之间闻父兄谈经订史评论人物商略世事以至医药卜筮衆技之说莫不入耳注心视龔龔之士复异吾庐陵须溪刘大博从子云西先生经济之外杂学尤博洽晚以利济为心富蓄良方嗣子学云以前人心为心多所记忆余友李壽朋尝患疽腰脇学云用药治之拔毒去死肌不数日奏功而不伐善因记学云尝与予谈其尊父以煖木杖赠虞阁老篇章往复前辈风流依约可见今又因其一技之善而知其他美之得於阶庭者有未易窥其涯涘也或曰昔人以主痈疽讥宣父子於学云何与之深耶余曰否否是疾也豪杰之士怀忠抱愤往往有之不遇良医饮恨以没使学云生於楚汉争雄之际而范亚父得一遇之则亚父之生死未可知而楚之存亡未可决可谓其一技而少之哉苏子曰增不死项羽不亡当时苟有良医能续一贤之命脉则一贤能续一国之命脉世称上医医国殆此之谓歟壽朋德之而徵言以报予故着故家子弟之所以异於人而非世俗之以医名者比也学云一字龙渊云

送王玄石序

余观古昔英伟特达之士其乘时立功虽事之至难至重揽为己任而不辞迨夫机会既殊察微知变则一切弃而去之如委蛻此非识趣之高深谋远计过人者哉鸱夷子之寄迹五湖留侯之从赤松子游可谓晚节末路能自全者矣当斯时也想其视富贵如聚沫视功名事业如石之蘊火擊焉而暂发其来也适然其去也脱然岂有几微迟留顾惜意哉袁之古萍有簪纓之裔曰王氏往余举於乡其族玄石为江西行省知印邂逅鍾陵逆旅知其意气奋发志於功名者也後乘时积官至理问人服其能而风尘瀕洞不相见者二十余年矣近岁乃闻有以地理之术称於吾郡询之玄石也其貌苍然其鬢皤然而胸中耿耿者尚在也嗟夫谢圭组之荣乐林泉之趣其登山临水悠然遐瞩不过寄其泛五湖从赤松之兴耳时之人岂真知玄石哉今年夏留余溪上踰月将归古萍赆以言者浮於货顾何补於玄石而犹若有望於余者余故叹其识趣之高同符古人因序以赠虽然秋高气清尚当携一筇与子履羣玉之峰以观乎旷邈?嶠之融结也子姑往

石门隐居序

予旧闻汶原王氏在宋有胄监弟子员曰梅边先生忠义孝友人也诵其文想其人恨不同时执鞭焉後尝过其里树林蓊蔼云烟相滋蔚乎在望知故家乔木尚无恙也又恨阶庭兰玉未尝挹其清风虽欲访断简遗编以证文献其道无由近留郡城始识其诸孙子琛温乎其容蔼乎其言令人益慕其先内附初帅帅师至安成多子琛之才俾籍民为军而授之长子琛曰下里丧乱之余民存者半若复驱之从戎则田卒污莱闾井为虚推所自来咎将有归矣吾可贪一日之浮荣而使一乡受实祸乎於是力请於帅愿输貲以助军储以寢籍民之论里中今日耕食凿饮长子老孙弗离土宇有不德子琛者哉洪武八年筑室於故址既成命其子曰室幸苟完持家诒谋在汝而已石门马峰先母有丘焉其下山崇而水清境幽而趣远别营环堵之宅吾将佚老乎其中既又擷其景之胜者有八而赋咏之士友相率遂歌以扬隐居之美而徵余序之予观子琛志行才业使效用於今世岂无可观顾乃崇恬退之风以利其乡人笃孝友之实而绳其祖武若斯人者吾见亦罕矣又恶得爱於一言哉遂为序其槩而复歌之歌曰石门兮崇崇我所思兮在於马峰缙山瀑泻兮夏沔桃源花炫兮春融啓逸思兮樵夕唱发深省兮寺曙之钟山雪霁兮岁又冬密赛北岭兮有梅有松何所独无佳趣兮我奚逐乎尘踪于嗟轩冕兮戕子之躬彼咸闻夫宠之门兮孰知余之所从揽胜取适兮隐居以从容离世之士兮逸民之风

夏???刘氏族谱序

民之初生得姓受氏以来不知历几百世显之极者其後必微微之极者其後必显宗法既废谱系不明虽身为名贤之後不自知也显者果可美而微者果可忽乎近时勃兴者多畔本生而援世族以号於人曰是吾宗也尊者叔之兄之卑者弟之侄之而世族之後艳其势利而甘於自鬻者亦以为然於是谱牒阅阅有不足信者矣吁可叹哉夏???刘氏原於安成固冈始祖偃南唐保大间徙庐陵夏???於今四百余年矣学者荐者累累不乏而仕者类贰令而止仕宦不甚贵业产不甚丰同姓之勃兴者鲜有美而援之而其子孙多嗜学亦不肯艳於势利贬损以下人谱虽不修吾知其不混淆也审矣其孙述以其尊府楚山公有志未就遂继述而修之深恨名贤序语烬於宋元之季既而远宰山阳书问必以徵余序谱戒其弟今山阳又迁洋县而余未偿宿诺愧负多矣虽然族在於广孝弟之心而不在於谱谱在於明昭穆之次而不在於序予之序斯谱者不泯山阳尊祖敬宗之诚亦使世之人知畔援为可耻而艳於势利甘自鬻者为可戮也諱

湖山云隐序

南昌为江右雄藩湖山之胜甲於他郡然古往今来揽其胜者则殊尚忆承平时东湖百顷泓澄沦涟垂杨匝堤烟云缥缈亭榭隐映如画宅其幽者矮檐充於後庭絕尘实於外廨声乐不絕於堂庑烟火不熄於庖厨虽古金张无以过之然去之二十余年白纷重游荡为虚莽新人无复有知之者迨问孺子亭祠儿童咸指以相告栋宇年深勿替益修因念孺子知汉厦将倾非一木所支躬耕湖畔以食其力与株块何以异而声称至今过其地者挹高风千载之上思

见之而不可得辄迟回俯仰久而忘去湖山亦以之而重此其故何哉同邑有曰升云者予同姓也侨於南昌揽湖山之胜而构室焉湖光云影郁然几席於是字其颜曰湖山云隐大夫士亦有以咏歌之予虽未识升云而知其志有可尚矣虽然隣湖山而揽胜者非一人也升云于予前所言者抑知所决择哉其友庭宾言其善事亲喜宾客又绘图以遗之予故乐而为之序

送李学则立孙後重游会昌序

曩胜国承平时吾郡儒士之盛往往散而馆授贔之属邑若会昌又闽货之所趋其物产服食资用甲於他邑俗称小福州士之留滞久而忘返间亦有焉予尝於方壶常侯座上识吾郡李君学则恂恂信厚士也时李职教湘江与语数日别去自是八表尘昏友朋聚散云收雨绝邈不相闻者动累年各奔走性命不暇岂期有今日哉丙辰之春予以访求遗文至积阜欧阳氏其塾宾仲弘来见询之学则从子也能道季父馆授湘江如故前年归葬母与兄於先人之兆今年复归命允穀之子为其侄兆诚之後命从弟近仁之子为其子柔之後不以卑踰尊疏踰戚秩然天叙之不紊虽桑梓系念然湘江人事之密且久岂能遽寘於怀哉重游骊驾发有日矣愿先生序其行也予闻惘然既喜学则乱後能归异乎留滞忘返者之为又喜学则立後协於礼异乎世之以远间亲而啓纷争无穷之事者然後知儒者之处置得宜非流俗庸衆人所可及也盖韶州府君蕡者首以科第开李氏之祥则韶州而下枝枝叶叶孰非其根干之所发但使生意续续不已益滋培之异时恶覩不凌云干霄如韶州者乎必复其始实兆斯今予於学则昔有半面之雅而今有交臂之失得无怀旧之情乎故山松楸郁乎在望阶庭玉树璨若成行学则北还之旆不可不早计也予日望之允穀即仲弘云

送沙本中入蜀序

沙君仲良往尉吾邑时以公委至吾鄉相与往还论议其子本中侍侧尤疎通可人意世情转烛於今二十余年而仲良不可作矣本中涉世艰难谦重有守卓然自立可谓难也已矣去年以季父官於长壽不远数千里往省死生契濶感叹何极倚门在念急急遄归示予以季父训戒之辞犹足以见世家余韵曾几何时又以入蜀来告且求一言以自壮予谓蜀道之难天梯石栈百步九折黄鹄猿猱尚忧难度而趋者日衆履驰如夷何哉利欲桎之也本中处有竹林之思出有白云之想行迈靡靡中心迟迟必聚庐完处骨肉相依而後跋涉险阻之志定则斯役也义也非利也行以利吾无取焉行以义君子所尚也于是序其情以道其行

章氏家乘序

晋唐以来最尚门阀故当时士大夫家惟谱牒为重以予观之门第高者初不系仕不仕也孔门四科德行优於政事氏族而有顔冉之徒则天下古今之论门阀未能或之先也是故荀叔慈陈季方以先生处士班於司空鸿臚谱中而不忤向使司空鸿臚非其人有不自愧矣乎显者之为荣隐者之为高其重有所在而不在仕不仕也金华章氏之谱远者不可详而可徵者今二十世矣在宋得象子厚以仕宦显其隐德弗耀可师仰者具於景行篇是章氏之为望族不专系於有官君子尤以第五何必減驃骑也予窃以为显者必司空鸿臚始无愧於先生处

士之高隱者必玄行獻文始無藉於司空鴻臚之榮不然則衡門栖遲而已耳富貴利達而已耳奚足起人敬慕哉嗟乎士君子之所樹立在天下後世孝子慈孫百世不能易也若章氏者可觀矣其遠孫道庸丞於吾邑溫厚有守示予家乘億其辭色似欲得予言者故以予所見者書其後若其系次譜圖之詳則有諸賢之序在奚容贅

義濟方選序

医者所以明一身之造化血脉流行之所以合於陰陽五行者何故非儒者不能通也古之医神圣之妙虽儒者且不敢企及後世医乃流於方技出於儒下果何望其明於理以濟人之病哉不明於理而惟方是据則本欲濟之而适以費之矣予友蕭志通儒者也懲創少年不知医致親悞於药抱終天之痛发憤參訪輿論廣求良方濟疾苦期於無憾名其集曰義濟方選凡四十八卷盖有所激而為也天下之事凡有所激者其操心必切其用工必深而收效必遠况志通儒以明其理医以精其术又兼鍼灸以佐其功其於利濟豈不博哉方將類其書鐫梓以傳則惠澤且及於天下矣昔東坡居黃岡與蘄水医龐安常游亟稱其医由是名與東坡俱傳龐亦儒家予與志通無能為役也姑述其志以序義濟方選云

贈劉本和序

古者二帝三王之治天下也一道德同風俗而已及其教明習成之後虽九有之廣千歲之遠斯人所守者一道詩書六藝之外豈有他說哉及周之末世則有戰國之游士謀詐用而仁義之用窒先王之遺文遂廢而不講迨秦之禁大道榛塞固然莫知也漢興百氏雜家怪奇可喜之論蠡起於世於是人之向末而遺其本者衆矣晉唐以來士大夫多喜游於藝或書或画或嗜音律自謂清致然視古之為學者愈遠予嘗論之游藝者貴乎動息有養苟朝夕從事而無益於己虽工矣不几於玩物喪志者乎夫書之與画於儒者翰墨為近琴之在音律於樂器為古常有志焉而未之能也予友劉本和詩書余力学琴以養其性而箏笛哇淫之聲不接乎耳画蘭梅竹石以厉其操而人禽山水宮室器用未嘗寫其形可謂善擇藝者矣予既喜其游藝之精皆時之君子所尚而猶舉古人之所學者告之誠欲其本末兼通内外交養以入賢士之域予之期於友朋豈如斯而已乎

送子芳歸隱黃嶠序

族孫子芳幼孤而立稍長以推擇為吏奔走承順於長貳於今三年矣廬陵素稱劇縣又附郭供億煩重子芳耐以處之事無不集一日悠然解去歸隱黃嶠之野為邑者留之不可字其室曰嶠隱若將不求聞知以終其身焉問其志則曰人豈不自知才各有能有不能耳不肖之從事於斯也自顧謏才不足以勝叢務猶以坏檣短纜駕小舫於風濤浩渺之中其能必其有濟而先登於岸也乎今不忖量後悔何益况太母高年八十先人不幸蚤世終養之責在於季父季父又不幸遠役於外太母余年晨昏疇依奈何舍己所事而汲汲芸人吾懼貽訕於賢者深矣予聞其言而欷則語之曰芳也爾之見加於人一等矣知才之不足以剽繁而退之可不謂一事之智乎知太母之養不可以他屬而思娛不可謂非一行之仁也仁智之不昧謂不為君

子之归吾不信矣芳力行之亦以观子之确予宗人之耆英者也独嘉其归隐作序以赠

林泉生字序

由宣溪而上入永新之境有林窅郁而坡陀是曰坪上有泉泓澄而流波实为西江里之刘氏居焉季琳吾故人中子也承家膺门绰有令誉一日谓予曰昌黎韩夫子谓大丈夫不遇知於当时坐茂树以终日濯清泉以自洁欧阳公亦云?长松藉丰草听山溜之潺湲饮石泉之滴?此山林者之乐也每怀此境泠然如执热而御清风常欲以林泉生自名先生以为如何无亦因是弘我以大道可乎予闻而喜之则告之曰子知木之为林者乎其始也方苞方体或条或乔苟无牛羊之牧斧斤之入则其天者定雨露之所濡风霜之所固斯有干霄蔽日之势而为当世之大用矣君子之才力似之抑知水之为泉者乎其始也方毖方沸或檻或侧苟无泥沙之混蛙黾之汨则其原澄澈妍?之可监毫髮之可烛及夫合长淮清渭之流而为天下之至洁矣君子之性分似之人能远取之物以明其理近察之身以尽其道则林泉之微妙不在物而在于我矣之二物也庸非我进德之机乎况托生於林泉之下庸非天下之至乐乎季琳闻之津津然喜形於顔面充然若有所得请书其语予惟季琳实进士左君介之倩左氏於予为世姻进士於予为心友故期望季琳为尤切而非常情作林泉生字序以遗之

麟原後集卷一

麟原后集卷二

钦定四库全书

麟原後集卷二 元 王礼 撰序

游青原诗序

青原庐陵山水幽絕处也春秋景霁山矾岩桂其馨满林士女览物畅情往往游焉予犹及承平时家殷人足青原之途骑 联人肩摩携壶荷 而来之者如雨必尽兴乃返其间虽裕俭不同要亦与禽鱼之乐於涧谷者同一自适之机耳惟骚人雅士则不然逸豫酣乐之余必使山泉之胜烟云之态人物之趣流写於翰墨传诵於人间若有声之画虽未至者见之如亲临其处焉予尝有斯志每难其侣而力日有未暇也友人王伯允乃能与其徒夏彦琛伯仲及夏之亲故崇酒丰饌以极青原之乐又形之咏歌锵如鸣球可为出乎流俗矣好事者且写为图而求予序之予故有感於旧日之盛而嘉其同予之志云

夏阳汤氏族谱序

族谱者谱其族属崇卑疏戚使子孙笃尊尊亲亲之谊而或以之述门望显畜聚表交游者也夏阳汤氏本殷仲堪之裔谓荆州之後尝为安成刺史子孙因家焉今安成美江尚有殷使君读书台足徵宋避庙讳易姓汤可考者自三评事始初居永新前市後徙夏阳其派凡三下墟市江田心也当在宋也有贡於乡者有典郡庠着读史旨要者有与周文忠诸贤友善者是皆不足为汤氏重也予独喜童年尚识诸老类皆淳朴深厚温恭直谅有长者风宜其诗礼之泽绵绵至今未泯也其族之谱系九世孙思可尝铍梓矣今十二世孙敏幸存刻本视予俾序之嗟乎杨惲之於司马氏叔子之於蔡中郎固自有不容辞者因念六世祖贡士之配在汤为唐臣父之子江文忠公铭其墓曰家之道奚先闺门之间有妻道焉有母道焉近而王母又为祥叔父之子申斋刘先生志其碑曰夫人以真白起家中废子孙不失旧物可不谓贤乎观女德两世之在寒门汤之家教可知矣嗟乎予之期望於外氏子孙者岂其微哉有之似之无念尔祖离孙王某敬书

耕读民序

前年予以乡饮至禾川邑士吴魁吾在焉与之语娓娓忘倦後有称扬其名谓足为时用魁吾闻之曰仆何人何足以与於斯遂逃之湖湘从游者益集既而充然若有所得而归以书抵其友刘宗啓曰仆营数亩桥亭之野将为耕读之民矣子知我深为请於王生老人一言少序此志予闻而喜因谓其友曰今适南亩或耘或耔攸介攸止烝我髦士甫田之诗也古者士出於农而工商不与管子曰农之子恒为农朴野而不匿其秀民之能为士者必足赖也又称仓廩实而知礼节有味哉其言也孟子亦云救死不贍奚暇治礼义饱食煖衣逸居而无教则近於

禽兽诚知耕读不可偏废也子独不见商之阿衡乎耕於有莘乐尧舜之道亦一耕读之民耳及其五就之余自任以天下之重斯民也三代之民也顾可易视哉日用饮食徧为尔德意魁吾之在陇亩陶然而歌曰朝耕兮暮读其乐也足足暮读兮朝耕其乐也弗敢以喻人我酒既旨我看既馨衍我宾亲亦洽比隣何思何虑其葛天氏之遗民虽然此固其志也然束帛之贲恐终有不容避者矣至若予也既鲁且耄自度无益於世戒子若孙力充耘耔诵诗读书为民之良慢弛之叟时翱翔乎义山之麓禾水之滢尝冀缺田间之榼阅甯戚牛角之经姑与此民击壤以相娱可乎不可乎遂书以订其始

郡庠鄉飲酒詩序

礼义者人性之所具燕饮者人情之所通通其情而礼义行乎中圣人之设教者然也圣人以民劳於耕获力於赋役则於尊卑长幼贵贱之节旷矣於是因其闲暇制为饮酒之礼以正齿位此尊让亲睦之俗所以成而陵犯狂暴之风所以息也往读礼经说者以为饮凡四事三年宾贤能一也鄉大夫饮国中贤者二也州长习射而饮三也党正蜡祭而饮四也總谓之鄉飲酒也行之以礼教敬也济之以乐教和也拜至拜洗拜既者敬之至也请安请坐爵乐无算者和之至也饮食必祭不忘其本隆杀有等不踰所尊序宾以贤斯贵德也序坐以齿斯贵长也序僎以爵斯贵贵也工歌必献不忘功也沃洗及冥不遗贱也闻关雎葛覃卷耳而齐家之道形焉闻鹿鸣四牡皇皇者华而事君之忠着焉有令有辞有劝有戒一饮一食一拜一坐皆制之以道而微意存焉此仲尼观之而知王道之易易也此成周之世所以人人有士君子之行也燕饮行而礼义兴其於化民成俗岂小补哉洪惟天朝肩振古未有之福威行近古未行之礼乐於鄉飲大典尤惓惓焉於是庐陵郡守徐侯彦中恪遵诏旨八年季春举行是礼吉士藹藹宾筵秩秩简则不苛於烦和则不偏於严四方扶老携幼来观者数千人盛哉所未有也自今继继而行之得於观感者有不为尧舜之民哉有不为三代孝弟忠信之士哉一时与燕者喜侯之温恭执礼咸为诗赋以咏其事礼非处士之贤而忝宾介故序所闻议礼之槩於其首简云

永新鄉飲酒詩序

乡飲古礼也三代之致隆平自秦而降礼废久矣汉晋间兴遄辍仅为美谈奚补於治圣朝治定功成慨然思复古风诏天下郡县薄海内外下之都鄙悉行乡飲酒礼庶几观感作兴民化俗淳德至渥也特系在职者奉行之耳既而有司或钦崇大典或苟为文具则贤否之异也吉之永新赋烦民伉寬则玩急则怨前政相继去职未遑斯礼洪武八年冬四明乌侯继善实为邑长视篆未数月政化大通乃於学宫创行乡飲教弟子员遵周谱习歌乐章是日也先舍菜於先圣先师乃始迎宾俎豆静嘉威仪棣棣揖让酬酢隆杀之辨尊卑长幼贵贱之节秩然有章深山邃谷掖老携幼来观者千余人莫不喜且叹曰幸哉复覩三代之制盖侯仁厚廉敏动以身教所谓有关雎麟趾之意而後可行周官之法度所谓至诚未有不动者也继今以往敬让之俗有不成鬪暴之习有不息者乎一邑之效有不为南邦之式者乎於时远迩之士咸为诗歌以咏之属礼为之序顾惟衰迈无足齿録辱侯诒书致之宾席日承温容聆崇论览雄文令人有见晚之叹则述兹盛美又恶得以荒陋辞

长留天地间集序

三代明王之御天下也化先於政知诗之为教本乎人心契乎天理虽赏所未易诱罚所未易禁者而诗能动化之於是设采诗之官以观风贡之朝廷而达之天下使人咏叹之间陰有所创艾感发其功顾不远且大耶周道衰采诗旷厥官而诗教废由是专任赏罚以为政而治不古若矣治不古若则诗日不如古宜也後人读杜诗而不究其意乃目为小技岂知诗哉余尝谓离骚汉魏以来作者非一人其传而可诵者必其善言情性可兴可戒而不偏乎六义之槩獲者也三百篇之有六义犹至圆不能加规至方不能踰矩涵泳之久自然气韵音节从容中道而入人者深复何卑卑为论者之所能律哉虽然文章与时升降国朝混一区宇旷古所无以淳龐朴厚之风气蘊为冲淡丰蔚之辞章发情止礼有体有音皆可师法殆将聳元德以四代轶汉唐而过之惜采録无官文采不尽暴於当世收而辑之庸非为士者之职乎居常无事喜编羣贤美制丧乱迄今百不存十惧其复失思锺梓广传庶来者知一代声教文物典故之概诵而玩之将人心天理油然感动见善则兴闻恶则戒不赏不罚而惩劝多人人有君子长者之行其於风俗裨益岂浅鲜哉使得长留於两间世道之幸也因名之曰长留天地间集云

送税课汤君秩满序

庐陵税课副使汤君得代同僚许君不色喜为之踌躇为之惘然为之伵伵耿耿谓礼曰仆与尧佐处此三年矣凡酬答营办用舍之际宜厚宜凉宜弛宜张宜缓宜急一动一息一言一话此行彼同前举後济无桷凿无犹豫无町畦得寡过於士君子之林非偶然也今先我代去殊难为怀子善文能道人意所欲言者为我序所以为别亦少慰我意系遐思於无穷也礼既而游於鄉校则搢绅不乐其去见於辞入於市井则货殖者不乐其去形於色商旅相与谈於津奔走执事之人相与谈於巷颂其美而愿其久者衆也则复於许曰使礼为辞劝其留必輿情所喜若为辞饯其去非衆心之所怒乎余惧衆怒之难犯也既再阅月许复贻书曰愿其留者人之情也不可止者国之章也尧佐行有日矣吾子斯文之厚可无以荣其往哉因念昔有问政於扬子云子云曰思黜汤君治赋一方人思而不黜若此使得宰一邑典一郡以临其民其惠泽可思者不相什伯於今乎自是其大用审矣余日望之是为序

送吴知县入覲序

礼盛时对策尝言守令爵位於民为最近其政治利害於民为最切必得其人任之而後可人得矣遽易屡迁亦非民之福也大抵初至之岁不谙其土俗二年始察其情伪虚实方欲少展才志而瓜期近矣是以视居官如传舍心常苟率尚望其膏泽下於民哉当时司文衡者是其言而居阿衡者不能用孰知去之三十年虞廷三考黜陟之法复行禁於昔而开於今岂偶然之故哉庐陵素称地广民稠今则荒芜死亡过半矣而狱讼繁溢赋役烦重才而贤者久任且未易使治况中才之士而欲三年报政哉舒城吴侯之为邑长於斯也今考绩之年矣其廉介如始至而其智愈明其才愈优岂其才智有今昔之殊盖久而後得之也故能以民心为己心视公事犹家事古所谓必世百年久於其道而天下化成於吴侯观之渐可信矣莫春之吉入覲述职意甚至也總百揆者必曰庐陵困於兵乱久矣劳於贡输至矣斯令也抚摩其民以奉

其上乌可使有美政者不竟其功乎铨羣吏者必曰邑令民之师帅上宜於国下宜於民斯无愧负矣是令也事上也忠使民也义乌可夺之使不终惠於邑乎吾民则曰我有疾苦呼我父母今朝於京式遄归处又曰侯我父母念我孔艰往朝於京不日其还嗟乎某之衰齿六十有六矣阅吾邑之贤令不为不多矣求如吴侯者几何人哉於是郡邑能文之士为诗歌以饯侯之行而谒某序其首窃惟古人於贤卿大夫之行事虽数十世之下犹称诵之载於简策矧亲沐其治化而默无纪述岂人情也哉遂作送吴侯入覲序

瀛洲图诗序

三年秋某忝校艺闽省同郡萧自省刘允泰盱江吴尚志会稽宋无逸四明桂同德上饶余从善延平孙永龄诸名士咸与焉章贡刘宗海氏以掾职试事日接顔辞驩如也既竣事宗海持瀛洲图言於衆曰古称海上有山曰瀛洲清远絶尘俗余甚慕焉将以名吾斋能无爱於一言乎咸曰诺各赋诗一章退某为之序因念前五六年筮仕安远猥以笔墨留分省日与宗海游於时宗海二亲在堂伯仲怡怡良辰暇日辄寻文翰之侣游马祖岩泛舟埧上觴咏以为乐当其身世两忘景与神会悠然自适於时日之顷者虽不可常然瀛洲方外之乐亦无以过之既而别去事异时殊濶絶如隔世矣孰知此年复得再会於三山而宗海为大藩从事惟七闽无他郡兵燹之虐城邑之完人物之富无异平日宗海进而立乎贤相名卿几席之侧以讨论政治退则羣乎掾曹之彦词林之秀则有鏖砺括羽之道冠佩容色舒舒愉愉盖身囿乎瀛洲而不自知也虽然仙非有超世之见者不能为宗海於事物之来其纳而容之也使若水之於海莫知其所往其可拒也则若潮汐逆扞於千里之外弗与同其波而定见之确乎不可拔者犹是洲屹乎风涛浩渺之中而莫之能动若然宗海殆神仙中人矣况瀛洲乎抑余因是图又有喜於画史之妙也天下之物有非人力所致者而画史能致之某尝思古豪杰之士於千百载之上恨生不同时而画史顷刻能致於目睫以慰怀贤之想今宗海慕清远幽胜於海外不可知之鄉而画史以意形之一室以成宗海所慕而宗海欣然乐之以为瀛洲在我矣非寓意而不留意者能然乎礼喜宗海兴寄高远而知其有得於斯焉故着今昔相与之意为之序

送杨生远游序

杨为白下闻姓前二十余年客雩阳与万全翁为斯文友往还言论生在侍楚楚异他子弟有勤学好问意继以所业过从质是否颇乎似求益者余心甚奇之其後又数年兵变孔棘而翁捐馆生频年行乎患难乃能兼艺能以自济得不乏贤於守章句?人远甚虽然生计则得矣余独惜其智分而学不得专时迈而名未易立数以惟敦学半勉则慨然曰生向也不得远游以亲也今惟慈顔而起处安健仲氏且善养又安能偕数童子匏系富儿之门以老哉抑岂若肆耳目於通都大邑山奇川秀之间以纾怀绪以致甘旨哉今年秋余校艺闽藩生来谒於三山驿舍握手与语而後知其无言不酬如此迨余之归也送至延平因得睹其近稿则闽之佳山水无不形於咏歌秩秩乎其体裁之正也雍雍乎其音节之和也兹其游之不可少也哉方将出闽关泛潮江下严滩入会稽而探禹穴沿洄江淮之交以仰窥京师之壮丽则所历益多所进益不止此虽然斯言也因生诗而发予之求於生犹有重於诗者昔司马子长好游或者以其史记之奇伟得於名山大川嗟乎子长之得於游岂独史记哉生今之往也有若郑卫之地

则退然慙然凜乎视指所加而知戒有若洙泗之鄉則回翔焉想慕焉思古人所以自致不朽者何在而知劝則游之有益於生也豈有涯哉行矣勉旃明年候归棹於鹭渚之滨將覩所得於游者以为生賀

贈醫士余以謙詩序

去年余校藝三山歸至鍾陵趙仲敬來訪語及醫士余以謙之賢余已心識其人矣今年秋復同曾君希魯校文東廣同院有爽節適曾君因及以謙之为術余益敬其为人於是求詳於曾君則曰余為章貢世醫而以謙尤精遇人有疾苦不問貧富即趨視之雖震風凌雨不避察脉視証如別黑白如養由基之射然不銜能不伐勞不琐琐規利其處心與君子同常人殊病愈者雖不德之弗問也沂僑寓雙江有年數矣凡老少有疾悉賴調護感其不厭而愧其所報雖天之福善必在其子孫顧不能使如宋清【闕】托諸辭藻藉藉至於今我負也欤哉近獲縑軸欲求詩文之能者着其處心濟人之美而子为之倡何如余聞而笑曰以謙之於曾君全其無恙於一家曾君之於以謙冀其有聞於千載蓋交相贊者也不求報而報之其皆古人之心也乎余亦樂道人之善者故書其槩於簡首云

送蕭韶會試詩序

學校選舉出於一則真才用而世大治此一道德同風俗之源而今昔志士之所愿見也予嘗溯而求之周兼三代之制於斯為盛禮在瞽宗書在上庠干戈羽龠之習在東序學者積業就材文武一道至於選舉則鄉遂之學三年大比考其德行道藝而興賢能凡進德事舉言揚曲藝悉論而誓之或升司馬或升太學是貢士亦取夫學校之異者於是簡不帥教者移之於鄉之左右又移之遂雖受成獻馘亦本於此蓋天下无一事不出於學校无一才不起於學校安得不道德歸一而風俗大同哉官人用吉士之際其詩曰奉璋戕戕髦士攸宜曰有馮有翼有孝有德藹藹王多吉士為君子使何至若後世由進之多岐哉皇明之有天下也讲求古人所以設教使文武萃於一而學校選舉出於一庶几三代遺風復見今日十有七年甲子秋大比郡縣之弟子員試藝於各省於時泰和蕭韶以詩中前列橫翔捷出土類驚駭可謂俊秀之士矣將赴春官友旧咸賦詩贈行而屬予序之故舉三代養士取人之法洎本朝復古之意以告之庶几擢高科躋膺仕者忠信成風廉耻道立以無負於朝廷無愧於三代人人有士君子之行則斯文幸甚

霍山十二景詩序

余聞平陽堯之所治故其人至於今恭儉克讓和而不怒忧深思遠有圣贤之遺風常欲与之游而罕遇其人申君良弼司征廬陵有士君子之譽于是益信前聞不妄一日語予以霍山之景凡十有二曰回峦春早日介山秋色曰綿岳雪晴曰箭壑斜陽曰龍洞白云曰馬迹晴嵐曰抱腹云梯曰大岩氷柱曰屏風疊嶂曰玉峽飛泉曰三清烟雨曰禪房夜月皆其邑山川之胜且曰某虽遠役於外而故鄉景物常显显心目間思得能言之士序其槩而咏歌之公退展卷一誦犹身至乎釣游之所而目寓乎景物之間也子以为何如予聞而叹曰良弼之志亦厚矣

王师范有云吾敬桑梓所以教子孙不忘本也君其有同於是耶近年求仕者有薄其鄉土詭籍中州以利於进视弃坟墓犹弃敝屣况有系念於山川景物者乎珠出於淵潭而贱淵潭壁生於荆山而恶荆山视良弼斯举岂不霄壤悬絕哉各赋三韵以为诸贤之倡

丘隅一雨霁蔼蔼烟翠好献岁曾几时鸣琴得春早美尔回峦姿阳和转枯槁 右回峦春早

常时介山道惨若寒食节况此风色殊秋高转萧瑟嗟哉号野翁使我长惻惻 右介山秋色

绵岳雪迢嶢晨曦光欲滴凄凉一片地狷介有遗迹彤弓飡既疎茅土复何益 右绵岳雪晴

箭壑日脚垂平原草如剪世路老行人往来足忘蹇返照满空林长送牛羊转 右箭壑斜阳

蛰龙本在渊闵世鳞鬣动功成而不居退密守幽洞云桂碧松枝英英亦藏用 右龙洞白云

斯人不可作马迹尚如故割股情何深还家弃前屨千载岚雾中精灵托啼鸞 右马迹晴岚

抱腹岩回合金粟招提境梯梯上层峦巖巖出山顶此处学无生犁然发深省 右抱腹云梯

大岩水晶域玉柱凝冰花贡入广寒宫烦疴焉敢加歛兹锡民福歌咏懽刘义 右大岩冰柱

云间千万叠烟嶂如屏风秀色在朝暮奇观异横纵何由陟其椒一览华与嵩 右屏风叠嶂

砢然苍玉峡知是何年凿飞泉溅珠玑触石响雷霆谁挽银河流人间洗炎爆 右玉峡飞泉

清静老氏宫凡间美琳宇无为常自化香篆长如缕尘躅至者希沈沈锁烟雨 右三清烟雨

禅定久已出悠然尘外踪夜月如流水振衣受凉风何由裂烦网寄迹观性空 右禅房夜月

草意诗序

昔轩辕氏以神圣之资行施济之德察草木之滋咸酸甘辛菰蜚以药人之疾苦於其美恶无所憎爱一视同仁其尝百草者惻隐之意也至楚之屈子始分辨於其间扈江离擷辟芷搴木兰揽宿莽杂椒桂纫蕙茝留夷滋揭车索胡绳蘘芙蓉惟恐衆芳之见弃而薺蓁施椒萧艾之类深虑其充夫佩帋盖惓惓忠君爱国之诚而怀贤嫉佞自形於比兴之表义也迨观杜少陵除□草之句恶之如蜂蛰若芒刺芟夷不待於高秋其嫉恶如仇犹屈子之意乎濂溪周元公深探圣贤之奥洞观造化之原吟风弄月洒落光霁庭草不除谓与自家意思一般其万物一体犹轩辕之意乎白下刘君善初蒔衆卉於庭藹然如茵缤然如幄行列奇石而日哦其中以舒浩荡之怀耿介之气因字其所曰草意宗工钜士髦友峻生莫不歌咏之而善初徵序于余余不知善初之草意仁耶义耶客有谓予曰善初业医而活人之念尤切窃观其意无亦愿

学轩辕氏之流欤曰仁与义吾不得而悉也予闻而叹曰方今公道日沦民风日靡户服艾以盈要谓幽兰不可佩与其为少陵之义形於色曷若濂溪一般意思之为高乎善初曰先生可谓得我心之同然者也请书以为草意诗序

麟原後集卷二

麟原后集卷三

钦定四库全书

麟原後集卷三元 王礼 撰序

送陈仲述赴会试序

洪武十有七年大比天下贤能之士各试艺於所司於时郡县学校择弟子员之俊秀者以充贡客有过予语语因叹曰盛哉济济多士谁与中者予曰若陈仲述当在选中已而果然客服予知人之明且问其故盖其为人也孝而信恂恂有良士之实其为文也简以达优优得程试之体予以故知之明年春会试於京师客复请序其事以壮行色於是酌之酒而告之曰选举出於学校三代之隆典也而圣朝行之近古所无诸君裒然举首抑有深究重轻之故而自勉乎周礼以乡三物教万民而宾兴之三年大比献贤能之书於王王实受之登於天府观宾兴拜受之言尊士如此其重自汉以来虽不及此然犹州长身劝为之驾谄诈如公孙弘亦乡人固推而来至唐杨绾投牒自进而士始轻矣迨於後世如夺席如棘围如糊名若防奸盗然何哉是必有由矣三代盛时待士虽甚重而择之甚严论乡秀士升於司徒曰选士司徒又论其士之秀者而升之学曰俊士然後免其徭役大乐正又论造士之秀者升诸司马曰进士方可使从政然犹未也司马又辨论官材论其贤者以告於王而定其论论定然後官之任官然後爵之待其位定始与之以禄前後凡经七级乃始得禄後世专以文辞优劣为去取故有以一日之长而决取终身之富贵者夫象犀珠玉之可贵以不易得也得之既易则不自重惜保之良难今日新进之士一蹴而释褐食禄临民荣亦至矣可不廉勤自励战兢自持以负朝廷重士之意哉使风俗还淳而士类增重在诸君力行转移间耳范文正韩忠献寇莱公文信国之事业光明俊伟磊磊落落夫非科第之士乎子其勉之

送王生入蜀迎父序

书窗午困方与诸生歌太白蜀道难剑阁等篇以畅胸中磊砢适有王生处厚来谒坐有顷请曰贱子将入蜀仄闻先生高谊久矣愿赐一言以荣斯行庶江湖识不识不庸衆我也因语之曰而不闻太白之言乎其险也如此嗟尔远道之人胡为乎来哉则曰家父西游今七霜矣形单影只未能遄返窃念走也年已壮矣有亲在外定省旷而色养荒不得名为子每念及此涕泪横臆是以徒步勇往以迎其归尽茆栏菽水之懽志愿足矣岂有他觊哉若然则予敢爱於一言乎孝者百行之元也生以天性之重不惮数千里之遥跋涉险阻山灵川后犹将相之王公贵人犹将怜之而况于予也曰以讨论道德为事子弟从之则孝弟忠信今处厚迎养诚切而默无一言赞之岂人情也哉虽然锦城名藩善地也佳丽纷华不减於湔生拜严父之後周览胜槩俯仰徘徊理所必至慎无迟回宿留玩日愒时忘倚门之望诗云陟彼岵兮瞻望父兮父曰嗟予行役夙夜无已陟彼屺兮瞻望母兮母曰嗟予季行役夙夜无寐舍輶之际尚当为处厚诵之於时族姻少长咸集以蜀之胜迹分题赋咏以寓同心离居之情咸列於简之左

送萧子跃远游序

昔读传记见圣门有好废举者恒鄙其好尚之异及存鲁破吴轩轻诸国倾动王侯乃不在仪秦下然後服其解纷如转丸乃若挟所嬖泛五湖历名胜之区屡致千金而屡散得英声於吴楚又未尝不美其为人常欲踵其遗风射什一之利由沅湘溯巫峡吊古秦汉旧都以涉燕赵韩魏之郊跨泰山黄河之壮穷吕梁碣石之险岂不贤於窥陈编而求源委也哉昔焉惧定省之或疎今也惜齿髮之已耗徒有志而未能遂也东昌萧子跃以盛年锐气出门万里趋庭於江淮之间纵目於朔南之广则所以增益志气岂有涯哉货殖解纷如端木千金延誉如陶朱诚可慕也行矣勉之易曰利者义之和子跃其亦有味於斯言也乎

赠萧同礼序

胡忠简公澹庵先生临大难决大议不负所学於国为忠臣於家为孝子皆其读书之所致也故平日之所亲爱必以读书勉之尝隸读书堂字以遗从弟壽亭余来东昌又见职医萧子信家读书堂亦公笔也故萧氏子孙多以儒术济医道有曰同礼与其兄俱习儒而攻医札瘥之人谓其烛理之明咸奔走焉儒生彭宰吾尝患寒疾庸医危之馆人欲舁送其家同礼视之曰无伤也舁则重其疾矣始终调护遂以勿药宰吾德之酬之一无所受宰吾曰义人也读书人也吾将求王先生叙其槩以报之属予弗暇既三年矣请之益坚予然後叹二君之有嘉德也虽然非读书者能之乎昔人有云宰相须用读书人读书则良相矣不为良相则为良医良医之格物穷理有不由读书乎萧氏子孙之良要皆忠简之赐也岂无自哉予故着之使知自勉云

送永新丞夏君东还序

以中姑苏人少有淳明之资辅以强力之志通春秋大义是非不倍於圣人人谓夏氏才子也年既壮观光於京师洪武三年就试进士蔚然七十二子之列可谓荣耀也已其年九月拜监察御史守法不阿权贵敛迹六年除河南按察僉事既而困於役丁内艰十一年复擢为永新丞十二年又以事去职而以中 门退省休休焉安於所遇未尝有几微见於色日绎思乎圣经贤传之微言以自砺若人也岂世所常见哉以中在永新律已也严临事也恪望之昂昂而即之温温与予虽一再会而心相知予亦深慕其为人别之日有不黯然於中也乎虽然昌黎韩子有言子厚斥不久穷不极虽有出於人其文学词章必不能自力以传於後自以中之志观之今世之士岂尽不古若哉古之君子才发於持满之余名显於获讪之後往往而是以中倾否之喜予虽老尚或见之姑书此以别

秋江送别图诗序

姑苏曹侯之貳守庐陵也以疏通练达之才膺剗烦治剧之任优优敷政黎庶德之既而以微事去职所谓观过知仁者矣泊乎霑恩广被万物皆春中道言旋复我邦族瞻衡宇而载欣抚松菊其犹昨遂适治所拜家庆於慈闱买扁舟而东下于时无老无少无贵无贱莫不趋庭以

贺依依若恐其复去侯之得此於人人岂无自哉惟无愧於人故获报於天昔儋人爵之荣今尽天伦之乐人生至幸有过此者乎俨行色之已临慨晤言之难再郡斋士友相率饯送别之图赋惜别之句以寄离索之情而俾郡之遗老王礼叙其槩於图後

赠唐克谦图书序

自书契代结绳以还人文日宣而大朴日雕以散周之玺节六国之相印又书契之变也汉始有私印以记姓氏视玺节相印正刻者异又节印之变也自是士大夫图书制述咸以志焉意图书之得名昉此隋唐而下旧式渐乖逮於赵宋篆涉於巧制失之夸於是古篆不复见而淮南子所谓方寸之印者殆虚语也元初中朝诸老丕变文风凡图书篆隸一复於古印广以寸为度痛革宋季锤鼎之谬制而尚友千载庶几皦皦乎淳龐之习矣予尝翫印刻而思可以得河洛纵横之意焉可以见井田开方之法焉可以存盘鼎锤鬲之古焉可以识专门名家之学焉可以写防奸杜伪之智焉是则印刻之古也而所益者广所益者广而放乎古非人心世道之还淳哉东昌唐克谦攻文章之印篆古而制雅布置得宜运削匀洁庚庚然如瓷之碎也辉辉然如玉之润也使益精其说将识者动目如摩挲岐阳石鼓如登峰山读秦刻如鸿都门外睹蔡中郎三体书詎非艺苑之快事哉虽然一事之精恶足以尽克谦之美其自牧卑损慕尚清高疏通练达异日且大用於时而予独叙其印刻之善者喜其有助於已也予於文不工於辞而尚乎古又得印刻之精者以黼黻之岂不足以增重於时人之耳目哉欧阳公尝言吾文将赖君谟之书而传予於克谦图书之印亦云後之览斯文者有不一握为笑也乎

牧夫字序

唐季彭公玠系出长沙仕至吉州刺史得庐陵北山之胜因家焉子孙蕃衍二十世矣裔孙子纶仍居山下勅断家事读书饭牛於其间以乐其志而自号牧夫焉过予求序其志予以为尔羊尔牛饮池降阿何簞何笠麾之以肱者牧夫之事也说文曰牧养也司也司而养之牧之义也然而州长亦谓之牧何哉非以其司乎民而养乎民欤子纶苟先有以自牧其心则不徒牛羊之牧异日殆将为九州牧以牧乎民矣子纶曰然则牧之道无以异乎曰百里奚爵禄不入於心故饭牛而牛肥卒以相秦而致治卜式为郎於汉致上林之羊肥息尝曰恶者去之母令败羣牧民之道亦犹是也推而行之在子纶矣吾党欲观其牧者不必观於今日而观於异日可也是为序

和溪胡氏族谱序

太上立德其次立功立言其次有爵为公卿大夫世世不絕此之谓门户门户之高洁非圣贤莫能自致士之有志者知圣贤所自致皆已分内事亦勉力希之以大其门户何不可者万一力有不逮则持身於无过之地使鄉称善人君子亦望族矣此而不务乃欲尊所系於闻人以为荣耀自有识者观之岂不愧乎西昌和溪之胡系出长沙马氏僭乱辟地庐陵分为三族伯居值夏资政殿大学士忠简公铨之祖也仲居南城登庆历第六年第官至朝奉大夫衍之祖也其家和溪或黄漕有以胄监弟子员为南城丞曰箋者皆季出也胡氏自三族为名宗於是言

李者悉出陇西言刘者悉出彭城和溪传世远矣至清翁昉修谱泝其源於长沙历历可考盖和溪之与黄漕地之相去若此其近也世之相後若此其未远也宜有可信而传也兵燹之余家乘靡存其从子志德慨然兴曰上世之远遗文故老俱不足徵吾未如之何矣自十世可知见於诸贤铭挽者亦足不隳其家声尚何旁搜远绍为哉嗟乎胡君可谓加於人一等矣可谓拔乎流俗者矣既新其谱又辑诸贤於先世有所著述者为流芳集可谓善继其志而不忘其本者矣噫世固有幸而出於名卿之後乃不能敬谨自持以无忝先世至炫名忘实卖婚沽利寡廉鲜耻视胡君卓识伟度有不愧汗也哉

平上樊氏族谱序

世姻中有儒士樊植致书於礼曰四方之欲光显其户庭宣昭其誉问者皆有求於先生以传世垂後矧寒宗於名门姻娅非一日矣谱乘重修而不得一言以志其成非在下风者之咎欤吾世之先由湖南墨造徙永新之里多历年所至资深居士昉仕於宋授宣德郎尝因司马氏门人刘洙见公於洛公甚爱敬以所闻见叙次为说以赠有家富而官显好学而积德等语居士之後又数传至讳瑚者为潭州推官悬车於平上之山庄去里潺十里许世系源委见於名公银笔者富毁於兵燹仅记忆其槩耳司马氏纪录尤详今亦无存惜哉惟先生述其本原庶他日吾氏知其所自不隳其家声礼儿时侍先子修家谱见樊氏夫人墓志者二皆平上派其一杨文节公笔也夫人切於教子自贮其笔墨书籍启钥扳厨而取之厨仆而磔其一则陆剑南所作实靖州史君之母载宣溪至平上三十里而近人以纯绵丽密鼎壶甘旨奉其母朝暮使交於道其铭有曰女也而行则士老也而志不惰敏而好修静以寡过则樊氏内行之贤可知宜其外氏子孙绳绳翼翼守身而不失务学以淑人有异於寻常者矣虽然礼愿其後昆出而事君为排闥之壮士处而传经致门徒之三千又次而稼圃亦自有乐趣使乡称善人足矣姑以此序其谱之首以劝植字举直云

西溪八咏序

乐乐其所自生礼不忘其本厚之道也礼乐者非君子之所服乎有中形外不倍其原仁贤多有之是故屈原思郢鍾仪南音庄舄执珪而越吟王粲登楼而土思人情怀旧理固然也缙云应仲彰氏以文学充贡司征於庐陵公退好书乐易文雅故里溪山常接梦寐而归与之兴未谐於是列为八咏求咏歌之以抒其思仲彰之意可谓厚矣予观曩时铨选薄南士嗜仕进者往往诡籍於北而讳弃父母之邦倍本忘初岂仁人之用心哉视仲彰有不愧汗也欤予嘉仲彰之贤因用法驾导引曲八章为讴吟之

银蟾好银蟾好烂烂出东山混沌分时明已有堪舆尽处照初还良友乐余闲 东山明月

云如彩云如彩瑞气北塘边一片灵芝浮宝盖昔人逢此庆胪传平步上青天 北塘彩云

琅玕碧琅玕碧千挺匝荆冈掣钓影悬双鉄鲤裁箫声引九苞凰劲节老风霜 荆冈修竹

苍松古苍松古朱岭秀严冬风动潮迴疑舞鶴电飞厓擘化神龙不肯受秦封 朱岭古松

垂纶罢垂纶罢沽酒荐槎头浦外杜蘅时自采桥南风月付谁收疎散傲公侯 桥南晚钓

东皋去东皋去洞口及春时緑野莽平苗似浪黄云高下稼如坻击鼓御农师 洞口春耕

岩花满岩花满恰似锦屏风覓句诗翁频指点偷闲年少更从容山色淡还浓 花岩锦屏

平床墅平床墅滴翠染人衣芳艸如茵共醉卧繁陰似幄澹忘归禽鸟乐幽栖 平床翠黛

黄允济樵唱稿序

客有问诗法於予者予应之曰六义之经纬古诗法也而世尠能明之况其微妙者乎三代民性淳厚诗之美者无溢辞刺者亦优柔不迫意见言外盖其风化所及涵养所致而然此诗之本也本既立矣音响节奏又各有说焉五言古诗贵乎高古朴茂如汉魏而渊永有至味七言歌行沈郁雄浑开阖曲折词气如百经战马乃为尽善近体律诗又在壮丽痛快首尾意绎如而不杂至若絶句必折旋婉媚悠然樵歌牧唱之有遗音妖然宫粧院靚之有姿态知此则駸駸乎入作者町畦矣复何法之可言乎里中小友黄允济以其所吟示予音韵铿锵布置缜密读之犁然有当於人心可敬可爱而意欲有闻于予者以允济之才之美何藉予言而予犹惓惓以语客者告之亦爱助之心也允济勉乎哉予望子者不今日而已也姑题其首简而归之

赠襄阳税课司大使詹君序

予家先世在宋尝於郡城之西南湖桥之近因峻岸垠圻结亭曰山月筑台曰云端杨文节公为之记大江横碧羣巘叠翠鸥浦鳬汀檣轻颿绵足以游目骋怀荡滌尘歎而立於独吕忠公谪居尝寓於此故考亭朱夫子来游来歌焉予偶至郡必履荒址临眺以抒怀贤之惊倦则即其麓圆通庵而少憩则有宁上人兄弟相与遣世虑而游方外亦一乐也今秋重来忽闻上人再理荆襄之檝急往与别上人曰宁往岁之游寓襄阳五阅月辱司征詹君伯振倾盖如故凡所以存问予进虽天伦之爱莫能或之先也盖斯人昔以贤才举於乡重厚周密钜公硕士咸愿与之游酬赠赋咏之作率不肯凡抽思写物类多春云态度良时暇日或与名胜登岷山送斜晖迎皓月慨往哲之莫及嗟来者之难期俛仰宇宙飘飘然有出尘之想先生若惠一言使得藉手以报知己非厚幸欤予闻其语因叹礼也守朱吕之业徒仰止先正高风於一隅詹君乃能登高怀古景慕叔子远韵於千载又感上人寸心千里之笃交而知詹君怀才抱艺之高致於其行也序其语作赠詹君序

鍾子温吟稿序

予友鍾子温信厚朴茂人也与人交始卒无间退然似不能言者而胸中黑白了然力学不厌尝恨不得近予有鏃砺之道而予亦以不能常常见之为慊近昉以所吟稿示予宫商相宣渠

獲不備情景俱備瀏乎山泉之清粲乎野芳之麗真可與言詩矣然子溫予心友也非泛泛常情比可不以予所聞者助之乎因憶曩歲嘗從參政全公幕下與楊君伯謙夜論詩道伯謙曰予得於范先生者其要有四蓋詩貴簡古明暢理斷含蓄而大忌俗泛陳腐龕嫩空佻知此則思過半矣伯謙不可作矣而斯語服膺未嘗忘也今舉以語子溫有知予山陽聞笛之感者乎因題其稿末歸之子溫異日尚刮目以俟

贈劉尚文仰霄序

劉君尚文何其多才多藝能事鬼神也何其爽朗周密悅乎人人也尚文家本禾川與伯氏尚玄辟地始來太和境上闡老氏之教挾曾楊之術以及醫藥卜筮星數曲藝靡不通解遠近之人咸信慕之東里未辭而西里之使交踵其門矣在外二三十年如未離鄉井而家日以裕於是退營菟裘于永水之陽以老伯氏養晦授徒樂於丘園而尚文解人之憂赴人之急奔走不暇衆皆稱之予亦羨焉猶以其涉於百家雜業未深與也近與之語則知其於經傳之訓詁文字之偏旁源委極力窺尋搜討而前輩奇文偉制亦往往記錄不遺然後嘆其有本者如是而恨相接之晚也蓋太山有其高則延而爲龜蒙崑崙緱嶠夷莫不有其勢黃河有其深則導而爲龍門孟津洛汭莫不濬其流人之爲學本原既道致知而篤行閑邪以存誠烏往而不達哉嗟乎喪亂以來四顧閭閻人少矣尚文益思盡已之性以此事天飡帝而無忤況酬酢於日用者乎予言廣矣勉旃無忽尚文思仰繩祖武故一字仰霄云

送陸知縣美解序

廬陵陸侯下車之三月輿人誦曰昔我中田豐草翳之棧車弗休無力易治自侯戾止公役均使迨暇耨耘禾黍薿薿昔我?氓送往迎來戎車絳騷耄倪驚猜侯來撫之安堵如故事育感恩杜母召父昔之爲政猛則民殘今其優優黎庶以安剛不汝吐柔不汝茹禮以爲律教以爲度又後之六月侯將入覲報政而代且至矣輿人又歌之曰昔來何遲今去何速惠我弗終昭陽之陸於時業已行矣有垂髫之童諗於戴白之叟曰天惠仁侯曷又奪之我將維其楫使弗得移柅其車使弗得馳何如叟曰童子何知厥問四馳迂擢允宜汝不聞輿人之誦大雅之詩乎不吐剛茹柔如仲山甫侯既有之賦政於外入爲喉舌侯惡得辭焉在廬陵則一邑蒙其福在廊廟則天下被其澤惡得以寡妨衆哉童子遂行叟亦逝去於是羣黎百姓輯其語以爲陸侯美解歸朝序

麟原後集卷三

麟原后集卷四

<集部,别集类,金至元,麟原文集

钦定四库全书

麟原後集卷四 元 王礼 撰序

沧海遗珠集序

予既编次元初以来朝野之诗凡二千三百余首为长留天地间集行於世四方士友犹交致其所睹记者於予不觉又五百余首展玩诵之因抚卷叹曰诗也者其人文之精而元气之为也欤何其愈出愈有而愈无穷也白乐天尝言三才各有文天之文三光首之地之文五材首之人之文六经首之就六经言诗又首之自今而观元气行乎三光五岳之间所以烟云风雪晦明变化山川草木动植荣悴流转而常见者皆文也况鍾而为人又得五行之秀宜其能言之士各鸣其所遇以感人心而代不乏焉盖亦乘元气吐人文往过来续而无尽藏也而亦未易得也抑尝观夫沧海之珠乎清圆明丽之可贵孰非元气之孕也而诗之美似之然求珠於海必腰缠深入乎千寻蛟龙之渊而後得其难也若此乃有委於沙砾泥淖而莫之或收岂不深可慨哉於是复铍今所得若干篇以补其遗而名其集曰沧海遗珠嗟乎诗之遗落不世见者可胜道哉登是集者可无弃予如遗之叹矣遂书此以志其首

送刘维行序

吾邑濂江刘氏世业小儿医四方孩穉之病者咸奔走焉予往识日新翁淳慤信实人也尝徵予序其谱继又识其从子维行其恂恂笃厚犹其季父人皆称其异於衆医而未知其所以异盖其异者儒门也其诸祖有尊经先生博洽经史有才学者未能或之先也须溪刘大博尝师事焉於吾家衡州史君南山翁尤莫逆故予稔知其家嗟夫医之为数人之死生系焉岂不难哉然小儿医又其最难者也血气未充外邪易入啼焉而莫知其所苦问焉而弗能吐其意心诚求之亿则庶中非恂恂笃厚者罕能得也予亲友刘英远童幼爽和深自惊虑於是属之维行维行极力调护旋喜勿药英远感之深以世俗之所以报者未足副维行之望必求余文以报之数以书来谄衰晚之年懈於构思而请弗倦因叹维行及幼之功出於诚而英远报德之意亦出於诚皆可敬也予虽老又恶得爱於一言哉

送莫庆善归宜春寓所序

莫庆善氏吉文士族也少有侠气善琴善画鹰知名一时有县其所画中庭鸡鹜视不敢进乱定喜宜春山水幽絶往游侨居二十余载名公使客之过宜春者必之莫氏得其一翎半笔宝若大贝去秋暂还庐陵识与不识咸奔走焉罢於笔墨殆甚宜春明年春将复侨所乡之亲

旧留行未得饮之酒赋诗为别而属某序其情酒半某语之曰传称士去其国止之曰奈何弃坟墓也韩昌黎称杨少尹亦以乡人莫不加敬诫子孙以杨侯不去其乡为法庆善得无迟迟之思乎且某闻李伯时画马法云秀禅师曰公业此日久求其情状系念不忘他日必入马胎伯时愕然遂画观音庆善落笔无非暴鸷搏击之态得无麟凤仪仪师师之意罕见也夫庆善曰子厚我者也药石之海也吾将归老於忠节之邦矣吾将引洙泗清流以泚笔掇太山岩石以砺墨而写夫日準月角河目海口龙形虎掌之表矣相视一笑别去

赠愚直隐者序

洪武四年秋予校文东广蔡与善亦省其严父立敬翁於五羊暇则侍其亲来謁于时观与善其容颀然其志昂然予窃喜翁之有子也自是别去邈莫相知後闻其游海康溯滩洄而窥勾漏历苍梧之野以至於桂林而归又鼓枻东游以观京师之雄丽浙水之清妍益壮其为人今年夏五有称愚直隐者谈星命数学於吾里占候吉凶如养由基之射予闻而异之曰其寄迹於方技而逃名於隐逸者与既而来访谓昔者尝拜予於岭表与之语而熟睨焉前与善也於是濶别一纪而翁亦不可作矣棘栞乍见感叹久之与善作而请曰仆归鲁溪之上有年矣筑室里之环山粗庇风雨左右田园数亩耕治足以给朝夕亲旧过从斗酒谈笑亦自畅情而暇翁牧老又时能班荆憩?共话桑麻或喜其愚或与其直而吾之心迹亦可隐矣时有稽疑过衡门之下则据愚者之见而直道之否泰祸福之机粲然可睹他何能哉先生与仆雅故愿一言序愚直者之志予知蔡久嘉蔡之多能慕蔡之肥遯又忍违蔡之请乎作赠愚直隐者序

思齐堂诗序

思齐堂者土原珠湖之肯构也有诗成卷者骚人才士咏其思齐之志也盖堂也者君子攸跻之地风雨除矣鸟鼠去矣似续妣祖者於斯居处笑语者於斯俛仰之际得无有所思乎人之常情孰不望高思贤人君子胜已而可敬必愿与之齐齐之如何就其如贤人君子者去其不如贤人君子者则人亦安知其孰为贤人君子而孰为我哉此士希贤之功而在实用其力也诗人喜之称之於以助之非一念相爱之情欤土原本淳溪彭氏其先由科第起家乡称右族侨寓珠湖昉三四世父子承中废而为兴门人所难者尝阅其谱牒历历如砥诸掌及观堂扁与题咏之什又喜土原之勇於从善诸贤之与人为善故为序之诗云谁谓华高企其齐而尚当与为土原而三复诵之

送族子朝俊行术序

朝俊将行四方辞於予曰易言不家食吉愚末小子之出长者将何以教之予问汝之出也何挟乎曰道本於太一分而为天地转而为陰阳高明祖父之所以驾风鞭霆兴云致雨利下土福民生传自刘公动神以迄於今者太一之说也世家宣溪含冲毓和克生贤杰科第簪纓绵绵延延以享夫荣名而?其後者由遇夫地仙鍾珏得聚散向背之微则陰阳之说也贱子皆与闻之其於出也何有於是进之曰苟卿有云艺之善者不两能今汝乃兼能之不几於夸诞乎虽然老氏之称道家以其近道理也观山川流峙之形势者可谓之明地理则於二者可不力

学以究其理乎苟能读书究其理则吾之心正天地之心亦正吾之气顺天地之气亦顺而仰有以动乎天东西为纬南北为经山为积德川为积形而俯有以察乎地若然则庸巫常师不足汝敌矣朝俊作而谢曰善哉长者之诲也敢不敬从於是因其先祖南斋之号一字南阜又可见其自新之意而南为生育之鄉尤可尚云

送士鸿应辟序

泰和刘司业之子平原应辟赴京维楫白鹭之渚趋予陋止言别且曰平原甫除丧家政无所经纪病母无所疗养学业未有所切摩形单影只茕茕自悼乃有以名闻檄急於火势难久稽触热以往先生执友也可无一言啓益我哉闻之黯然因念司业敬我深知我厚尝以宦游靡定欲属其子於我以为经已有诺责而时艰人远未有几微及之如斯以出愧负司业矣夫以世禄之彦才质之美迟之数年使邓林之植蓝田之产经夫斲之礲之以成其美严徐之见未为晚也发於持满必为名士为贤大夫庸非士友所深望虽然人之出处淹速固各有时非人之所能为也愬情而弗获则禄代以养仕优而学要亦无不可者洛阳年少立经纪之制陈治安之策传之天下垂於无穷岂亦大早计乎余前言过矣子其勉之平原今字士鸿云

伯雨字序

王氏子祖霖以大父之命既筮宾以冠金谓此令器也揆锡以字无踰伯雨一日请於予曰愿有所教俾得因名思义以自勉焉予见其执经问难弗明弗措挥毫落纸虎跃鸾翔心甚奇之於是因其字以谥之曰雨者天之霈泽陰阳和畅之所致也古人则蘊之为德行施之为利泽上之恩泽及於已则已之膏泽下於民小畜之辞曰密云不雨自我西郊施未行也伯雨之今日以之乾之辞曰云行雨施天下平也则陰阳和洽而品物畅遂伯雨之他日以之以子之才未有畜而不施蘊而不用者也虽然雨固润泽万类者也适其时则为甘损於物则为苦用汝作霖雨之际为甘乎为苦乎伯雨曰岁既大旱将甘之之不暇又焉得以为苦耶予笑曰因此悟彼斯子可与言易矣作伯雨字序以诒之

赠无诒师归隐序

前十年前陵惊谷骇平生游好困厄沦谢过半其幸存者或隔絕数千百里外累岁书教不相移或逐逐珪组干名席宠於当世则不得朝夕常见求其气味同乐尚近可与晤语抒意者何其不富见也以清修朴简迹寄释氏法中若吾无诒师其殆凡卉之猗兰衆羽之孤凤也欤其性情文学不与吾儒异道又多艺能远近所敬慕真柳子所谓虽圣人复生不可得而斥也往承平时师方壮年同兄碧虚游览瀾之名山水过江表从欣公笑隐游故多识一时茂士重客迨归东山若将终身乱余起而领袖青原愜輿望甚於今五年矣声鼓而退或问师故则曰吾曩也振锡而出不自知胡然龙翔之留也归也解包而归隐亦不自知胡然而青原之寄也吾止吾行如云如水随於时听於天吾恶乎知恶乎知第与其有所任於事而役乎心曷若逍遥弛慢以乐吾志乎予闻而叹曰其有道者欤予固知师之贤於人也虽然古人一池一堂之胜犹以得其人居之则山若高水若广况青原闻天下者乎予方为学校出也而气味同乐尚近

如无诒师者乃幡然去之违离契濶吾谁与语能无怵惻於怀者乎玄妙韦炼师道冲与予皆知师者韦既采惜别之词为卷复徵予序之予於无诒旧且厚虽微韦请犹将尽吾情况敢负於韦而爱於言哉诗云无金玉尔音而有遐心饯别之顷尚当为师三复诵之

闽山樵隐序

闽山樵隐者新安汪君士章也方天下无事士章克绍前烈干禄以养志亦少遂矣迨八表尘昏即裂冠毁冕入乎闽山一簔一笠与樵夫野老同其趣非知几之士哉予观箕颍以来长往之伦厥类非一或隐居以求其志或避世以全其高或垢俗以洁其身或守已以镇乎物类皆表里一致始终同操使百世之下景慕不已其所谓志意修则骄富贵者欤有如士章道足以弘才足以赴而能囊括於寬闲寂寞之地鍾鼎不足为之荣簞瓢不足为之屈宜其樵隐乐趣诸贤咏歌之不足也予初未识士章云阳进士李君一初亟称其贤固已耳熟而心往矣今见士章睟乎其容藹乎其言益信李君之知人则於士章已嗟见晚能无情乎虽然仕止在乎随时士章年强德立而时方求贤正士君子行志达道之日也恶可久宅閩山之胜遂忘天下之穷民哉若观鱼鸟玩泉石以自娱乃余衰迈无用於世者之宜而非所望於士章焉他日成名归荣故乡而後寓隐於樵未为晚也士章以为何如

美王太守祈雨诗序

郡太守太原王公君泽莅政庠陵之明年汲汲惟恐黎庶之失所遇利害悉兴除之於是政平俗安方千里倚之为泰山为慈父夏五月连旬不雨赫威如炉民无所喙息而苗日槁矣公惻然曰吾郡之民俛焉日给公上之需於常赋外而未尝有几微怨咨之色形於顔面真良民也今遭时之蠲如此将仰无以充国家之赋俯无以为事育之资吾且奈之何哉遂徧祷於老佛之宫神仙之所又遣府史乞灵於龙湫公则斋戒沐浴夜直雩坛以俟迟不得命则不冠不履奉所祀之神周巡闐闐以致罪已意而日竟不暘衆益疑焉礼则知雨之终可必也苍苍而上穷厄而呼必可闻隐痛而祈必可感盖形势高而视聽卑也先是公於歉月寬里役旧输之亏者数百人欢声载道上闻於天洗冤泽物之意隐然与东海祭孝妇同科况其素行之孚於上下交於神明而无愧者哉此礼所以知雨之终可必也既而赐履之境靡不沾足于是郡邑之士咸为诗歌以咏太守之德而谒礼为之序礼观一雨之应国家财赋之出生民事育之资举有所利赖繫谁力哉赋咏之可也遂歌之可也序而传之亦可也故书

壽歌题辞

传有之食飧之礼非以致味也又曰飧所以昭德也近年倣扰以来故家旧族庆问阔焉不讲况宴会之顷觐其藹然德意粲然礼文哉於此而有能彷彿古训一二是犹絕壑而闻履声重陰而睹日月岂不惊见而喜道哉晴溪居士涉险阻艰难於盛年享炽昌壽考於晚节恳恳念箕裘之业惓惓营勤读之斋志趣固有贤於人者也四月维夏适届初度一时子姓羣从捧觴上壽拜跪有序进退有容各取器物之可以拟壽延壽者悉播之声歌以抒有庆之悰予览而笑曰诸生之意远矣乐记曰歌之为言也长言之也作歌以蘄壽非取长年之同音欤犹晋人

尚九日而靖节诗谓举俗爱其名斯人乐久生意也长言之永歌之自不知手之舞足之蹈盖歌咏所以养人性情舞蹈所以养人血脉高年闻歌咏之美自然思畅神怡精力强固岂不贤於偃仰屈伸效彭祖於渺茫哉春酒介壽亦取和适又其次也於是上下之际蔼然德意相洽粲然礼文相接则壽考且宁保我後生也必矣诸生欣然请题辞於简遂书斯语以与进之亦以勉夫世禄之家事长之礼有未暇者云

麟原後集卷四

麟原后集卷五

钦定四库全书

麟原後集卷五 元 王礼 撰记

石湖乡校记

石湖乡校曲山巽行藏修游息之所也其在宋曾大父仁叟为胄监弟子员厥闻四驰大父宏远克世儒业欲以所居为乡校聚俊秀以讲先王之道御史萧公泰登为书乡校二大字养吾刘先生记之而志竟未就世父壽春思继成之以仁存铭其堂巽行之言曰学莫贵乎得其地李濬之之白鹿洞范文正之长白山山川之秀皆有助於进修於是即其居之北山行五六里得石湖清幽之胜而卜筑焉塾堂门序秩秩修洁面端石之峰偃蹇盘礴凿其麓为沼泓澄镜开亭其上曰临清峰之後为刍豢之谷茂草緑縟濺濺湿湿各有以适其性由沼上而东入清凉之巷二百余步石湖在焉绕堤杂植 柳依约如画柳陰圉圉洋洋冲?曳藻或队而翔或逸而散又折而後循循以升曰西成之坡获石离立隐隐如闻捏捏音隣曲淳朴有幽人之风稍南直堂後为豁眸之巘数椽翼如其颠可以娱客平畴低岫烟云相滋縈清縹白环列几席之下转而西步乔松之陰坐贤乐轩则美茹之圃茂蔚其侧山林之清籁常闻士商之屐齿罕至藏修於其中游息於其外所以成德性而畅文艺者不既多乎於是云阳希蘧翁闻而悦之题其顔曰石湖乡校既而来学者屡常满而巽行之学亦日进而月殊矣予观萧氏之乡校继志乎数世始得胜而成之则君子之欲化其乡成其俗者岂可责效於暂而不要其成於久哉予於乡校之成叹其数世之仁而冀石湖之胜有益於学者尚百世之远也已是为记

克复斋记

桐庐董君希顔居隣钓台揽山川之奇胜慕昔贤之高风人品固可知也而犹日以进修为事间语予曰乡也尝辟斋於庐之东字之曰克复书策琴瑟秩乎几案芝兰竹石森乎堦除诚足以养性怡神而未有文辞以昭名斋之义非缺欵子为我记之予复之曰希顔儒者也处而所与游者皆贤师良友出而所与交者皆名公硕卿仁义道德之懿孝弟忠信之实有之已而施於政矣克复何待於予言然尝闻之克复非有先後之殊已才克礼即复其机间不容髮顾力行何如耳况正谊不谋利明道不计功即克复之事而董氏家法也归而求之有余师何待於外希顔喜且谢曰微子之言吾忘祖训矣请笔之庶常目在不忘也桐庐有董司徒庙碑载系出汉仲舒希顔岂其裔耶希顔名仁而克复名其斋盖欲以第一等事自任云

种花轩记

吾庐陵在江西号剧县其壤地广以袤其赋税浩以穰其词讼烦以夥而丰实不称焉於今殆且甚矣土田多荒瘠而租益重裕者不一二而窶者常千百故敛不任峻治不任苛又附郭供

亿居先恤之则安不恤则顽视他邑为难治洪武七年漕运判官王君以材敏出长斯邑本之仁厚以摩抚之访其土俗而详核之政昉二年远迩和洽靡宇常治也犹以民力罢困後之安其阨陋於是即其西偏为四楹之轩以肃宾客而字之曰种花盖取潘岳河阳意也既成属邑士王某记之某复於君曰传有之人道敏政地道敏树均之易易也且独不见业种花者之术乎识其陰阳而移之顺其性也防其风雪而待之固其本也秋阳之烈蔽之不使枯其干春雨之淫疏之不使淹其根粪之得其宜培之适其中溉以滋其茎鋤以薅其蔓则其生长茂可立待也而莫切於去其蠹焉蠹伤其生枝叶必悴吾虽爱惜之勤亦何益矣^廿木无情犹必尽其道以养之况吾之赤子可使有不遂於吾政者乎某尝行夫田亩蹊路间闻暇夫野老之语未尝不感邑长岂弟之泽苟有伤其生者咨访以察之勇决以去之则他日生意发育散於民间在门墙为桃李在中阿为菁莪在南山北山为台莱藹然一邑之间蔚乎四郊之外岂特是轩之前丈尺之地哉君叹曰子之言微而婉托物以喻政也请书於是轩以为座右规君字道亨识趣高远盖簪纓忠义之後云

藏春轩记

古筠在豫章上游山水幽絕其俗俭而静乐独而息交予尝游焉於今三十年矣客有谈杨氏藏春轩而请记其胜安得不使予惘然旧游之思乎余虽未迹是轩意必繚以周垣藩以丛筱得其门者则覩夫白白红红菁菁郁郁生意不断嘉木交萦乐意相关幽禽对话暖雾融融游丝冉冉必骇然曰春在是矣未得其门者不有墙厚盈咫如隔蓬瀛之感乎不有蛱蝶纷纷春在邻家之慕乎若然司马独乐谅无以过之虽然予闻藏春於一隅者士大夫闲居之所尚独善者也推而放之四海者大丈夫得志之所为兼善者也杨氏之英有从事大藩将命无违他日皆将有民社之寄苟思於时为春则於人为仁以仁存心施於有政岂不大有过人者哉书曰敛时五福用敷锡厥庶民虽君人者之事而理无上下其揆一也姑以斯语记於藏春暮年倘有过筠之日尚览其胜而咏之

畦乐记

凡物苟可以寓吾意者皆有可乐而往往游於物之外者得之不能游於物之外者物且有以累之人恶能有其乐耶吾郡王君与齡侨於豫章东湖之上有年数矣近得地数亩在闌闌中畦之以菰兰菊蔬果日薙治而滋灌之於是生意蔚乎其前乃筑室临之字之曰畦乐或曰王君之涉是畦也或荷鋤焉或抱瓮焉吾见其弊弊焉劳其身而顾曰畦乐何居予应之曰予於是畦喜王君知止足之分矣惟其知止足之分故因时於天求利於地以食於人者有穷而自食其力者无愧无咎斯无咎岂不休休然有可乐哉心既乐恶知身之劳乎盖乐在外而不在物也且子不见昔之贵擬金张者乎第宅之雄冠盖之盛宴游之娱声色之奉亦可乐矣而常戚戚不愉者物之可以足其欲者交战乎中而不能超乎其外使知止足之分外物岂有以累之哉昔人谓陋巷自有其乐而乐不在於簞瓢予亦谓与齡自有其乐而乐不在於畦特因畦以寓吾意焉耳虽然东湖之上徐孺子高风苏云卿雅操躬耕乐志千载如一日也与齡得无有歆动之思乎与齡性和易顏如渥丹乐意满容良友也宜为记

上犹县重修谯楼记

上犹隶南安界於湘广万山之间时清则俗淳时异则易以偷已然之迹也县治旧有丽谯迫於山势近在眉睫加之下流喧阗如争讼声致使长民者政化不通民多病之元季毁於兵燹惟治事之厅仅存於今二纪矣内附初任官惟贤次第修复洪武六年夏邑长余原溥贰令熊文英典史秦文昇满岁去职惟君独任邑事三月之间百废具兴一日属其耆老而告之曰时苟清矣邑苟完矣更漏犹托庑下於政有缺有能义助木石者乎咸曰唯唯君知民之乐从也营度於心计谋於衆相其风气蔽亏脱隘就爽临於通衢不旬日而丽谯以成於是山势之拥匝者若退水声之嘈杂者不闻精神疏通襟抱开豁四方来观莫不欣慕而言曰前六十年乙卯汴梁杨君实新县治後六十年乙卯平阳皇甫君又新丽谯二贤前所希有宜求文士以诏後人邑之从事耆老合谋曰宜介前江东帅幕杨君璟卿请记刻其上按顔师古於汉书注谯门谓门上为高楼以望亦呼为巢所谓巢车者於兵车之上为楼以望敌谯巢声近本一物也上犹邑於遐荒斯楼不可後继今以往过其邑者闻更鼓分明有不知其善政者乎又喜邑民淳厚乐於从令相与以有成也故不辞而乐书之

大隐楼记

郡城南行三里许有起杰然閟丽之楼者问谁欤罗其姓宗信其字也一日过之宗信与予登楼纵观西眺古寺杜司户审言之祠在焉即诗人堂也今长冈断陇曼衍相属令人凄其怀古东俯章贡沅沔顺流岭海财货之转输悉此焉出古今迁客骚人若苏若黄风帆浪舶南去北来可悲可喜者何限凭阑徙倚於此信可脱凡浊而荡心目也既而谓予曰斯楼之成进士陈君士弘字之曰大隐翰林承旨宋公景濂为篆其顔或谓其在唐肆之区康衢之侧非有丹崖翠壁茂林幽壑之胜而加以隐名何居愧未有以对也幸先生适来先生於我有故留为道其可不可也予曰语有之小隐山林大隐朝市此言何谓也心与迹之辨也自其迹观之世之厌薄名利遯於岩穴影向昧昧惟恐入山不深入林不密者隐也而或借终南为捷径致北山之移文则其心之隐未可知也其小之也固宜自其心而观之固有身居鸾台凤阁而常怀枕流漱石之思职在献纳论思而时有耕云钓濑之想迨夫渊明之恋柴桑六一之怀颍水浮云富贵世俗泊如类迹未隐而心先之若人也不待栖迟岩谷之间而已超乎方之外矣其为隐也不亦大乎今宗信虽宅於市恂恂然退藏斯楼若无若虚不求闻於人人亦鲜知之者谓其缺山泉之乐则兰盆蒲石之列几席非匡庐瀑布之泓澄者乎苍松翠竹之在图障非会稽山陰之美茂者乎表以大隐孰曰不宜宗信谢曰闻先生崇论昭若发蒙矣请书於壁以示来者遂为记

欧阳氏永思堂记

欧阳文忠公天下之士也其文天下之文也在当时曾子固已谓公之贤韩子歿数百年而始有之今同游之宾客尚未知公之难遇也後百千年有慕公之为人思见之而有不可及之叹然後知公之难遇也去今二百余年矣天下学者孰有不思公者哉天下之人犹思之况吾庐陵乡国之人哉乡国之人犹思之况夫欧阳同族之子孙哉同族之子孙而不公思则不惟有

愧於鄉國之人且有愧於天下之人矣吉文建寅公之族子也盛年銳氣謂功業可指取有留京師十餘年一命未足償其志而崎嶇兵亂以老比年還鄉作堂以奉先中祠文忠而諸祖列祀其次字之曰永思徵記於予建寅所以望其子孫者可謂至矣雖然建寅望其子孫以永思者豈曰徒思也哉後人思公以其賢也思其賢必有企齊之心而後可非思其笑語嗜樂而已也予之斯語豈特蘄夫歐陽之子孫且有蘄於廬陵之學者使歐陽子孫與廬陵學者自修之篤日思齊而內省焉則無愧於公無愧於天下矣予亦廬陵人也當因以自儆云

耕讀齋記

楓墅違棟谿五里王氏在焉其先棄器隘而即曠夷離棟谿有年數矣其彥有曰與定美才遠識戡難御侮與其伯氏弛張相濟迨鄉里綏靖即理旧址堂構翬飛遠近稱美嘗語予曰泰也曩於居南別業築室三間字之曰耕讀幽林在南沃壤在側書策耒耜雜然前陳力作而倦則入息披吟田夫野老幽人處士過從論說以為常油油然不知天之高地之下日月之代明寒暑之推遷予樂也甫及三年廢於一炬今雖影沒而朝耕暮讀之意嘗往來於懷終當即其旧而新是謀子為我記之予復之曰帝舜命官既以黎民阻飢命棄播百谷即以五品不遜命契敷教作司徒詩人之咏後稷粒民率育之後必美其陳常於時夏蓋養之與教二者不可偏廢不先於耕則救死恐不贍奚暇治禮義不繼以讀則飽食煖衣逸居無教近於禽獸人事之至切至大孰有先於斯二者哉與定斯舉甚韙宜荐成之他日豈徒一家遵之將一鄉慕之由近而遠雖天下之大有不聞風而興務農力学以致隆平之治者乎與定謝曰命之矣請筆於齋以為訓故為記之而復咏以詩詩曰維南有齋其林幽幽離塵遠颺耕讀以休其耕維何播種南亩時及力齊荼蓼斯朽奄觀載獲如坻如京以賓以祀百禮告成其讀維何有經有史其善伊儀其惡伊耻變化涵養天秩有常君子之歸邦家之光嗟予王氏系自長者仁厚傳心晝夜不舍曰農曰學聖謨匪今農惰學倦亦獨何心耕勤讀敏厥效伊迓我作戒詩詒爾孫子

知止堂記

鵬舉吾友也姓張氏其先真定人少之時與吾弟子周同師鄉先生馮獎翁於泮宮既長即推擇為吏有能聲迨丁中憲之治廬陵也君昉得行志盡其才蓋丁公以風憲耆德選為監郡遭時多艱人少可其意者君以練達明敏佐之信任之專雖齊桓之於仲父不是過也既而丁公改除從嶺海取道入京君與偕行以荐積為廣東帥府都事元祚既革即慨然曰世事若此其可以止乎廬陵吾生長之地而忠節之邦也吾其歸老焉遂挈妻孥以還喜城西蕭氏之基頗有幽趣遂請於官而築室焉繚以周垣雜植竹木椒果池可漁圃可蔬樵牧不待外求予嘗過而悅之君指其堂示予曰吾以知止字之矣子為我一言記之嗟乎予將何言哉猶龍子有云知止所以不殆又曰知足不辱知止不殆可以長久而舉世汲汲於富貴之場者莫之悟鵬舉之見超乎斯世之上矣予復何言哉且獨不見昔之居此者乎其冠蓋赫奕粉黛靚麗爵品之榮貨產之富殆金張比肩崇愷并駕也而今安在哉使其知止足之分君惡得而有之甚愛必大費多藏必厚亡不易之論也至若孔門知止之說鵬舉與吾弟昔也聞之鄉先生詳矣何待予言是為記

竹所记

吾王氏之彦有曰伯辉世居流江流江庐陵之上游也溪山相繆蛟蟠鹄峙紫青縹白郁为胜区伯辉即其居旁之隙地种竹千枝猗猗翛翛俯而临之如玻璃池仰而观之如翡翠林丹凤望实而忘饥苍龙顾影而失色纵酒於中则清风徐来题诗其上则飞尘不涴其塾宾萧子所氏日造而悦之曰美哉竹之所也既而谓予曰先生以文学知於时驱驰抡材於数千里之外而同里同姓有若伯辉之谦重清整又与其尊父宁都守相伯仲而竹所一室未?片言记之岂泄迹忘远之惧也乎曰既闻命矣何爱於言竹所虽王氏故事然昔人取之以其德也其质直直则不回君子之公正不阿似之其节劲劲则不屈君子之执理不挠似之其中虚虚则容有谦以受益之德焉其筠叶贯四时不易有穷达不变之操焉君子之乐於竹也是之取耳以竹为所必其德无不相似一不类则虚其所矣虽然子所留国学三年阅天下之文多矣倘以予言不戾於古而有益於人归以视伯辉何如也是为记

芳庭记

谀非美俗也而有相尊相厚之意焉故闻谀词则悦不谀则扞格而难入人之交於人也亦何乐乎扞格难入之意哉故其称人之字也尊之则加堂焉非堂则轩矣厚之则加庭焉非庭则斋矣或以溪谷或山或洲意犹是也夫然则闻者欣然以喜曰是尊我也是厚我也乌可与之疎且外哉嗟乎习俗移人虽贤不免况其下者乎侄孙子芳好事者多称之以芳庭或求闻人书二大字以遗之子芳告於宗之丈人曰芳也何德得此於人人哉不表之楣间则负其相尊相厚之情将滋兰树?蒔杜种菊於前荣以无愧斯名可乎丈人将顺其美则勗之曰而奚以多事为哉使三闾大夫尽求蘼芜揭车之类恒艺之将不胜其劳矣彼求衆芳之所在者意有属也恶用根荄枝叶之类求乎哉继今而後思迹名贤使子弟之佳如芝兰玉树生於庭阶则芳在是矣且而独不闻吾家种槐之故乎其芳与德俱萌必封殖而後成则其陰满庭宜矣传曰栽者培之子芳其勉焉予闻君子所以贵其名号者诚以其贤否丑美必常与名字相上下而始终夫苟失其所以为芳则斯庭无君子之迹矣可不惧哉予言如此不知者以为习谀也知之者以为非谀而规也用记於壁

乐闲亭记

则徽旧居郡城辟地始家今之杜方二十年前予尝访焉时得乐闲二大字揭楣间自谓乐闲叟求予记文予谓能闲固难闲而能乐又难则徽亦冀自是少乐於闲矣孰知数年之後运化不齐长子死焉其季庭桂入吏部为书佐则徽只身仆仆尘埃中曰公曰私靡不躬应求须臾暇且不可得况望长享此闲乎既而庭桂由书佐为奏差出入乎公卿之门驰骛於淮泗之上乡里慕之不弛其旧欢僅仆闻之复起其新敬俛仰今昔有可慨矣去冬庭桂自京归过予於溪上入郡因往问焉而新亭适成朴素爽朗有若蓬者焉有若舫者焉庭桂指以语予曰此乐闲亭也昔得文於先生今逸矣愿重记之留予从容竟日观其图籍在左壶奕在右杖屨或来於近局衣冠时集於名流廩宇连延殆从敏给即今日意象推之则徽诚可乐其闲矣追惟往作记时於今二十余载一清闲之福则徽屡得屡失而今遂其志则人之能得闲者非天幸耶

世之汲汲於富貴之場日暮途遠倒行逆施不知安閑之可樂者其為人何如也庭桂字仲芳與予同姓云

生存堂記

予友劉善自樂慨念喪亂以來二親雖存荐歷兵燹无一瓦之覆一壠之殖以為生既而相繼淪亡送死未盡於禮今幸時清屋廬粗可居田疇粗可養而往而不可還者親也能無然於中乎於是字其奉親之堂曰生存庶几事死亡如生存亦志遺憾云爾既求永新烏侯繼善篆其顏復欲予有以記之予謂是心也人子不死其親之良心也事死如生事亡如存豈獨烝嘗忌日思慕為然哉一念不忘其親則所以體其心守其枝者无不至矣親雖云歿而吾心之親未歿其音容显显陟降庭止吾可以邪放不檢亏體辱身以為父母戮乎吾可不勉強學問進德修業揚名以显父母乎死者復生生者不愧則庶乎能子矣將不為善人君子之歸乎嗟夫世道日趨於薄有不忍言者矣鄉之人有視死其親若去贅疣然未踰旬月更張百度以從己之欲由今而觀非斯堂之罪人也哉雖然名之必可言也言之必可行也自樂力行之以无負名堂之意至若劉氏世系之詳則在老生蕭會心之記不荐書

麟原後集卷五

麟原后集卷六

钦定四库全书

麟原後集卷六 元 王礼 撰记

存竹堂记

余至东昌客有从余登萧氏之堂予问堂以存竹名竹恶在客曰非是之谓也萧氏祖德祥能守厥考竹轩居士之业犹竹轩未亡嘉之者以存竹称也然则其详可闻乎曰当在宋也德祥之五世祖子信职医获交於忠简胡公公馈之金锡之田荐之官俱弗受问所欲曰但愿子孙世世读书足矣公嘉其志大书读书二字顏其堂至居士能守此训以不隳其世业德祥又能继其志潜心於学明理於医远近疾病者咸归之证论可为与否或当至剧乃愈或可不疗自愈後皆如其言全活者衆而未尝责报於人贫乏者与药不问直侑以米炭姜枣济之士大夫谓其能以竹轩之心存心非徒存其遗训世业而已谓之存竹也实宜初仕广州惠民药局提领迁韶州医学教授以壽终於家平居惟延师教子为先务世虑澹然虽出入权贵之门未尝干以私又曰今其子孙信厚文雅资计温裕皆食旧德所致而斯堂未有记常往来於怀先生辱与其子若孙游能勿靳於一言乎余观今世豪家大族五世希不失矣赞皇之石魏公之笏其存几希矧有如韶州教授既存竹轩之世业复存竹轩之世德者乎宜其子孙诜诜济济勿替有引非偶然也昔高唐赵氏有儒医笃於利济冥冥陰佑厘以孙子青山先生出焉天之报施善人庸有爽哉萧氏媲美於赵将必有显者出以其时考之可矣姑志於斯堂以俟

进修堂记

从弟子充嗜学不厌因旧堂而牖之疏通爽朗名以进修求永新乌侯继善先生篆於堂顏庶常目之以自励既而欲闻其方志於屋壁於是语之曰易云君子进德修业在忠信在修词立诚释者曰忠信主於心者无一念之不诚修词见於事者无一言之不实予谓德以存之心言也业以着於事言也中心之谓忠以实之谓信无妄之谓诚三者一道也德言进忠信之积也一念不忠信德非其德矣况觊其进乎业言修又言居用力不置犹居其中也修业而言修辞惟口出好兴戎当谨饬其辞主於忠信所谓立诚也言忠信修辞立诚之谓也行笃诚忠信进德之谓也君子终日乾乾慎斯二者而已矣昔元城事温公五年得一语曰诚请问其目曰自不妄语入元城初甚易之退觉言行矛盾力行七年而後成人之表里一致岂易得哉夫堂也者君子攸宁之所而日与宾友揖让进退周旋唯诺於其间者也吾弟宾退之顷即思向之所为果忠信乎所言果诚实乎夜寝之际即思昼之所为所言果无愧乎孜孜力行改过勿憚不为善人君子之归吾未之信也吾宗簪纓之世虽远诗礼之泽犹长但在勿替引之耳予老矣何未见子弟笃於进修以无忝尔祖者乎顾名思义尚允蹈之毋徒借圣贤法语以为黼黻庭内之具

介石轩记

予一日至子充弟介石轩茶余看菊意颇闲适子充从容言曰是轩得永新乌大夫篆以华之以伯氏也然名非不佞所命也昔曾伯祖城山公为太常寺丞时曾大父韦轩翁侍行由学馆授登仕郎当国郑府之吴潜甚器重之欲荐为东宫属官适四川制置使某入覲又辟参谋军事曾大父见某黜叹曰君子道消矣拂衣而归缮园池作亭字之曰介石日与故旧饮酒赋诗其间杨文节公为书其扁今以名轩不忘前人知几之意伯氏幸能志其所以岂不因之以自勗哉则复之曰豫之六二介於石不终日贞吉夫子因二以中正自守其介如石而能见几而作故极言知几之道谓君子上交不谄下交不瀆其知几乎又曰介如石焉宁用终日断可知矣夫当宋季奸臣柄国边衅日开天地闭贤人隐时也而祖有见於君子小人进退之几归休乎斯亭盖深於易者也岂知进而不知退者所能及哉虽然彼一时也此一时也今吾弟往教四方无往而非宾主师友之交而欲介焉自处则非吾所知也说文曰介介画也有分辨意严於分辨则不为石徂徕之方峭必为王荆公之执拘矣将处无与居也出无与徒也倡无与和也岂不孤立於天下哉圣不云乎鸟兽不可与同羣吾非斯人之徒与而谁与子充有味於予言也乎抑亦惟祖训是式欤子充谢曰谨事斯语因笔於是轩以记

湖山清隐楼记

由永新而南历坡经丘行三十里有湖山明秀之胜游氏世居焉予尝至其地徘徊湖上不自知心豁神怡也观其岚峰迎日而晓雾萦青瑶浸澄霞而暮烟横紫与夫千岩飞瀑万树啼蝉鳬鹭散影於渚坻雉交飞於林麓其或桂飘金而风露清梅吐玉而泉石洁物态景光冥会静得则湖山一日之晦明四时之代谢善画者亦未尽其趣也是以骚人文士至者或信信始别别而出门在道犹顾瞻徙倚而忘去去年予归自永宁游氏湖山清隐之楼适成习传邀予凭阑纵目湖山千态万状莫不自献於几席之外若有大异於畴昔者矣时有歌於湖上者歌曰青回翠合兮山掩水重英杰以毓兮畜聚与丰揽秀挹爽兮伊谁与同风月无边兮维子之宫又歌曰湖之山有兔有麕山之湖有鱣有鲟为网为纶兮以宾以祀乐吾之乐兮施於孙子习传笑顾予曰子为我记之予以为天下湖山之胜非少而有素业以世居其地者不多见今习传世居斯土而专有其胜非一寓目一畅怀者比天之厚於游氏为何如哉予观世之婴情於宠辱之途者变迁於朝夕若蜉蝣之过目曾不得以少适其意视身享一丘一壑之乐而垂裕於後者可幸致耶超旷之识要不以此而易彼也予恶得不为习传记之後之登斯楼而览斯文庶亦悠然於山水之间而有悟也

乐存堂记

予侨寓东昌时尚贤以比隣日相洽知其信厚人也相疎十有余年矣相视齿髮异於昔矣乃易字乐存以署其堂而谒予志之予闻孟氏君子有三乐王天下不与存焉於子心迹若有不似然者抑亦自有乐处欤曰走也每疗一病诚其意以求之详其脉以察之或寒也或热也或寒热之相薄或元气之痿孱也为之攻其族通其窍求以复其元及涣然冰释熙然春融则欢然如释重负予乐也惟仁以存心乐意未尝不相干仁存斯乐存矣顾人之痒痾疾痛於我乎

安性命壽夭於我乎順知利其利者不知予之乐其乐也舍此焉取所谓乐哉予喟然叹曰古人有言士一命以上苟存心於愛物於人必有所濟職任民牧者曾思若何使無愁嘆之聲若何使無顛連之苦如斯人之用心者乎先天下憂而憂後天下樂而樂相業也語曰不為良相則為良醫觀於蕭氏益信用記於壁庶覽者或有勸焉

攬勝亭記

予僑寓永和有年矣離去而重來亦數數然矣獨不知陳氏江亭之勝有足覽者今年秋訪隣尋旧子煒兄弟坐予亭上朴而不華雅而不俚規置有若畫舫者焉奇花異木嘉果美蔬栽植左右启其戶牖視之青原洞岩蔽乎其前有化人之幽致仙子之高风令人動出世離塵之想螺山鹭渚峙乎下流城郭隱隱若往而復前修諸老忠義精爽有不升降飛揚於星月風霆之際者乎贛江橫陳東南西之海外国凡百奇玩交廣諸郡鱗介羽毛草木根實之貢與可資於世用者舟楫晝夜不絕又使人重仰止朝宗之思嗟夫昔賢之涉此土若張曲江韓昌黎趙清獻蘇文忠黃文貞輩南去北來俯吟仰嘯曠觀千載今求其影迹已飄忽於斜陽芳草之外矣而風檣沙鳥不改異日天地真逆旅也耶登斯亭者抚過續之逝川慨推遷之浮世寄懷物表脫略塵凡觴咏相娛攬結勝概豈非旷度遠适之快哉用記於壁勗我同志

仁人堂記

予訪旧東昌陳氏子煒邀予過其第杰宇夷庭歷劫如故几席靜嘉而蘭芷芬郁如其意象為興門坐久予問昔之字宗仁者於子誰欵曰煒先父也有為上岳知事者於子誰欵曰煒從兄也既而从容言曰里之長老因先父之字嘗以仁人名斯堂而未遇知名之士發其意以垂訓敢以為先生請予惟子弟如煒之兄弟能不遏佚前人光而述之揚之有可尚者矧旧知其父兄又何愛於一言哉第孔門未嘗以仁輕許亞聖猶難之况常人乎傳稱仁者人也言仁最為親切最須體認蓋人受天地生物之心以為生具此生理無往而非仁愛之意西山真氏以為人之所以為人以其有此仁由有此仁而後命之曰人人而不仁則非人矣昔嘗三復斯言惕然深省予告子者豈有加於此哉先儒謂满腔子皆是仁故拔一毛而舉身為之動者生意之相關也手足痿痺憐不相知者乃生意斷絕医家謂之不仁也煒之兄弟誠知民吾同胞物吾與也應事接物恒以仁愛存心則推而放之四海而達非特有光於前人亦足垂裕後昆矣有不列於仁人君子之林乎於是序而記之復系以詩詩曰乾父坤母品物囿仁人鍾靈秀同類益親惻隱之德被物與民各具於已斯之謂人聞過則戒見善則欲四海弟兄况在骨肉相殘相害禽兽弗為靡克靡復念初可悲仁人名堂願諝深省洞然八荒一視同境詩以揚之玉汝於成夙夜匪解自強自明

雅軒記

城西周復雅妮妮廉謹人也嘗為府從事获上官器重而性嗜恬淡辭要而甘閑焉葺廬峻洁字之曰雅軒左圖右書前琴後奕培雙桂於中庭藝九畹之芳萼客至焚香煮茶或談桑麻或咏風月棣韡光於朝萼萱泛采於春暉客有謂予曰復雅是軒可謂有雅致矣先生可无一言

以荣斯所乎予复之曰若所谓雅者得其外未得其内也夫雅者正也复雅能律已以正耳不听淫声则耳正以聪目不视邪色则目正以明出处与正人居言动遵正道行故君臣以正则礼而忠父子以正则教而诤兄弟以正则友而敬夫妇以正则义而和朋友以正则切而规古之君子无往而不律已以正故上下观感悉归於正未有枉已而能正人者也夫苟坚持雅操有如此者得非博雅之士乎复雅闻而谢曰先生启我以正言博我以雅道敢不服膺勿失以终身行之请记斯语於屋壁於是乎书

德基堂记

德基堂者何凤冈精舍讲学之堂也讲学而以德基名者何欲学者之实履也易曰履德之基也德行於礼有基勿坏又曰履不处也不处则有行之义焉夫学之贵乎行也尚矣修齐治平之道本於躬行心得顾可以口耳从事哉世之学者讲非不明也知非不熟也而求其实践是道百无一二是身与道为二也故曰知之匪艰行之惟艰为已而不为人则身与道一矣庸非斯堂建立之意哉或语予曰凤冈精舍昔也僻在荒隅士子罕至今税局副使魏君德基廉士也而能去淫祠改创於此又作堂殿後以为讲习之所魏虽去职而士子不忘其功名堂德基犹召茭也此萧君同文有请於子也子知之乎盖以予观之欲学者从事於践履之实或人之见欲学者不忘乎改创之人仁者见之谓之仁知者见之谓之知可谓两得之矣皆善意皆可书

琪峰记

吾里萧以琪氏业医小儿数世矣兼大方脉常曰小儿骨骼未成血气未充风寒暑湿易以成疾尤不可不慎有以病请即奔走焉不计其人贫富问药无弗与者既效报则受之不报亦听之其老老幼幼之心诚可尚也尝葺其西偏燕息之所篆其颜曰琪峰予问客曰其义何居曰以其宣华诸峰秀绝森列乎前者有若琪花之自献者乎曰未也抑以家有玉季之弟庭有玉树之儿而是老巍乎其间有若琪峰之温润乎曰近矣而犹未也然则敢问义恶乎在曰尔雅记九府美物之所聚东方之美者有医无间之珣玕琪焉医无间山之名也珣玕琪玉之属也非以医道无以相羣侣亦犹珣玕琪之可宝者乎以琪谢曰博哉子之言也敢不噩没朝夕以求无瑕客曰请记斯语以成其美於是乎书

复古斋记

郡城西卢务敏予昵友也为人谦而慤无市道每过其门虽亟迫必坐其斋斋曰复古 之以诗文者富矣观其色频若有望於予者予於务敏岂吝一言哉第惟居今世而求其复古吾忧其难之愈愈也姑即四民言之农於四民中愿也淳也抑观之垄亩之间或覩其隣之耄倪暨有远役即侵彼之疆辟此之界或有匿瀦填以广其壤分水利则专而莫知其他实坚实好者成则私之秕而稗者归主犹吝而弗足不力穡以长材间罪岁而辍业农而若此冀其复於古也可乎又尝观於百工之肆焉知者造物巧者述之审曲面势以飭五材而世守之谓之工宫室器物期於适用而经久非直为观美也今也高曾规矩之不遵天时地气材美工巧之不备

夙修而莫成春用而夏废蜡柅之鞭眩人攫利而已工而若此可冀其复於古乎贸迁有无通四方之珍异谓之商旅熙熙壤壤为利来往上则富国下则富家故君子富好行其德古则然矣陶朱通积贮之理子贡好废举之术白圭於人弃则我取自足力侔万乘名显天下今则隐税昧公间道潜行或至败露悉丧其有可谓富国富家者乎坚壮真好者不收纣薄伪恶者贩粥通侏为奸贱贵贵贱曰度量衡不得其同以之交易犹御人人也可谓好行其德者乎商而若是冀其复於古也难矣至若士也所谓秀民冠乎农工商而弗与等夷也宜其知古道者也而逝不古处皇多有之不尽其分不公於言厚已虽愚者穉者附之情异虽尊者良者疵之得势则趋不究其人处约则弃不思其德操世法以逢迎谓守经为迂缪渐次染习以成风士而若此可谓长太息者矣愈趋愈下况望其复古也乎此予於复古有深慨而难於言也务敏曰诚哉是言也岂有憾於世道之不古故以复古顔是斋祈斯世之不远复也虽然四民之欲变化其子弟书籍也华采其庭户图画也皆於我乎赖故四民之跻是斋者屡常满请书於壁庶来者读之伤今怀古则於世道不为无助予不得辞於是乎书

螺山记

吾郡近城之胜有二青原郁其南螺山峙其北山以螺名谓山形有类於螺也雨霁其颠沙砾中牧童时拾小金螺眩烂可爱友人胡君九成学圃於其侧而深有慕於是山焉於是字其游息之所曰螺山予谓螺山称於人以其秀也秀故为是邑之望环数十里外而趋郡者莫不望是以为归焉不然生草木而居禽兽岂异於他山也哉九成之胡实【阙】之裔则为望族其为人也语言辨矣智识深矣仪表伟矣使其浸濡乎礼法之场翱翔乎诗书之府又岂不为乡邑所望耶至是九成与螺山不可以差殊观矣虽然人万物之灵也山块然之物也不知者谓人借山以为重知之者谓山借重於人也自近者言女江之东山富川之文山虽非培塿丘垤所可同然亦乌有泰华之神秀庐阜之雄杰哉一借重於杨伯子文履善而名闻天下後世九成苟卓犖自异於流俗庸非螺山至幸哉予比过其舍见其醴於亲贤取友教子淑身为记螺山之称於人如此虞邵庵有云子能观山以成德其进未可量也九成其亦有味於斯言也乎

美冈记

英远中州刘氏之彦也往年予归自赣易舟神冈英远与其弟适来相与同载晤言信信而去予固以奇之矣近年来膺门治家有兴无替开门延贤志尚愈轶於流俗母家有人其使予喜也尝志其燕居之室曰美冈志冈之名蘄如冈也而谒记於余余以为冈之所以美者以其草木敷荣也草木敷荣以得其养也梧桐植影於朝阳葦蕩必致夫鸣凤苟斧斤寻之牛羊牧之可以为美乎心性之得其养亦犹是也英远时涉是冈纵观南之有台北之有莱菁菁郁郁有养如是岂不足为进修之助乎昔魏武侯以山河之美固也德性之美不尤愈於山河之美乎英远不必视美冈为美冈而视吾身为美冈则美不在彼而在此矣人杰地灵其理一也虽然吾家仲宣之赋登楼以信美而非吾土致不满焉今英远以美冈作帘额则专而有之矣岂仲宣之所敢望哉仲宣且不敢望况其後之人哉何时与子振衣千仞之冈以极来游来歌之兴姑书此以为记

读易所记

西昌南冈李君汝明食租衣税之家也代迁物故寄迹於星史卜祝之间以娱其晚节去年邂逅於东昌握手语旧惘然以久既而语予曰仆葺数椽於故居之侧朴陋简素仅庇风雨时洗心退藏其中以观四圣人之易而字其顔曰读易所愿先生记之予复之曰以言者尚其辞以动者尚其变以制器者尚其象以卜筮者尚其占此数语读易之律令也且如乾卦初九潜龙勿用九二见龙在田利见大人辞也初九为乾之姤九二为乾之同人变也潜龙见龙象也勿用利见大人占也然辞之所会者浅象之所得者深故圣人假象以尽其辞君子居则观其象而玩其辞动则观其变而玩其占必体认辞象变占然後观其身所处之位其时所遇之事而决其当否吉凶焉此圣人作易教人之本意也而世儒说易往往得其一而遗其二王弼以老庄说易而沦於荒唐汉上以象数说易而失於滯泥诚斋以三百八十四事明三百八十四爻则隣於浅狭皆非知易者也伊川义理精到亦止於辞而无旁通曲畅之妙惟晦庵本义包括甚广然但引其端而不尽其义是在学者精体而活看耳大概看卦之法有六卦象也卦变也卦德也卦义也卦位也卦时也看爻之法有四应也比也承也乘也读者随时变易以从道则吉凶消长进退存亡之理庶乎其可得矣汝明谢曰先生博我以文弘我以道请书於屋壁以备观省焉於是乎书

麟原後集卷六

麟原后集卷七

<集部,别集类,金至元,麟原文集

钦定四库全书

麟原後集卷七 元 王礼 撰记

松坪隐记

胡忠简公之乡沿溪十余里许平陆蔚然延袤曰松坪王氏士远家焉士远聪警嗜学不废尝充江西行人之任白云在天悬控以退筑室于坪读书而隐处焉因署其颜曰松坪书隐而属予记之予问士远之隐松坪也何居曰松花可以酿醪艾纳可以聚香餌叶令人不老擷菌胜于美蔬脂之沦入地而岁久者为茯苓为琥珀皆足以娱我亲而益壽暇则取其肪以代烛而昼夜读书於其陰清风时来韶護交作若与吾伊相和答于是外形骸傲轩冕一觴一咏不知老之将至虽骖鸾鹤而蓬瀛者之道无以过焉此吾有取于松坪而乐之也予闻而笑曰人之心事固有不期而同者乎吾庐之背亦有松坪二三里蜿蜒沃衍植物葱茏爰作山斋其间聚童冠十数辈与讲先王之道以待用因护是林数年之後鬱然苍然新燠不可胜用矣角泚泚者以雌以雄牧之待其兢兢肥长则岁时烹炰斗酒自劳燕及朋友子前所云乃予齿髮日耗者之所宜处至若怀奇才如子负远志如子见松之凌云干霄则当慨然曰在物犹然吾可不身为明堂栋梁乎见松之岁寒後凋则当毅然曰在物犹然吾可不身为国家柱石乎此则吾子之当务也异日功成业就归荣故乡乘兴泛一叶之舟访予宣溪之上观予所营以相乐然後治子之松坪行子之素志不後柰何于今逆施乎士远笑且谢曰命之矣得无松坪之乐老人欲专有也耶予遂援笔録问答语以为记

传心堂记

西昌涂君世传构堂于注陂之上居处既顺矣不虞负刍之警荡为莽墟其子伯高继志重葺宏壮顯敞视昔有加榜其颜曰传心堂予问其故伯高曰传心先子之号也今以堂名庶一举目俨乎如接先子之音容也愿一言以垂训予复之曰传心之义大矣哉曲礼七十曰老而传说者谓传家事於子也传家事于子千万人所同传心于後之人圣贤所独尧之传于舜也惟中之一言孔之传于顔也惟仁之一问人能秉心无过不及执礼而行焉往而不达哉或让于予曰尧舜孔顔传心之说子遽以语伯高得无躐等之病乎则应之曰予平生期人远者大者有求予言必乐告以第一之义若使闻下等之语是不诚于伯高矣况孟軻氏不云乎舜何人予何人有为者亦若是先正亦曰顔何人哉希之则是涂氏子弟以予言思而勉之则无负名堂传心之意

槎轩记

洪武十三年夏圣上念股肱之劳勩优在庭之臣四人放归田里以佚其老于是刘君子高得致其事既归荣故乡葺庐旧址朴而不雕雅而不俚字其顔曰槎轩子问客曰何为其然也客曰子高子穷達利钝聽天所命方其读书山中不自知其官于职方也迨其居职方也今年市骏于岭海明年理舶於登莱泛泛东南漂摇靡定亦不前知其绣衣于北平也比者倏然而起掌礼于南宫忽焉蒙恩悬车以示後计其身之在天地间犹水上之一槎耳安能预知其抵止流行之故哉槎之名轩者此也予闻而叹曰古今贤圣之若槎者可胜计?鲁叟之适周适齐适卫适陈过宋至河如蔡入楚孟軻氏之游梁至齐皆欲明王道以拯斯民此载道之槎也苏秦之赵之燕之韩之魏之齐之楚奋舌权变佩六国相印輜重拟于王者此权谋之槎也范蠡既雪会稽之耻乃乘扁舟浮於江湖变名易姓为陶朱公知计然贵上极则反贱贱下极则反贵贵出如粪土贱取如珠玉之策乃治产积居以与时逐屡散金以行德此货殖之槎也张骞奉使絕域留单于亡大宛抵康居达月氏致天马蒲萄之献此开边之槎也司马子长南游江淮上会稽探禹穴窥九嶷浮沅湘北涉汶泗讲业齐鲁之都过梁楚使巴蜀南略邛笮昆明以归此访古之槎也子高之槎将为邹鲁之鸣道乎抑将倾动列国使万乘除道以迎之乎将挟粉白黛緑纵一苇之所如乎抑不辱君命穷天之涯极地之角张汉威德使尺地一民尽归职贡乎抑亦车辙马迹徧於朔南挹先王之高风考贤哲之遗迹着之简策以传之後乎客曰吾观子高子道之不明常以为忧毁如臧仓其心休休游说金多愧其妻嫂彼则耻之蠹我大道翩然见几西子娱乐罢神货殖亦其所薄博望开疆固槎之祖黠武残民尤所弗取或摩秦刻或诂汉志考古核今乃其所事槎之异同仆实未知乐天知命闻其庶几予闻斯言感慕油然爰缉其语以记槎轩于是复歌以扬之歌曰

槎何世兮离富媼槎何岁兮赴流川杳不知其所自兮历陵谷之变迁嗟惟尔之无心?自灵自仙泛泛若鳬兮何有纠缠神交冥漠兮惟圣与贤招扶桑以为友兮曦余髮乎虞渊

采菽轩记

郡南周善政能养龙君子高嘉之字其事亲之轩曰采菽而谒记于予予惟采菽咏於诗乃天子所以答诸侯也今以名轩何居无亦以采菽可尽菽水之懽乎意或然也抑予闻孝子之有深爱者无往而不用其情世俗谓三牲之养富者之厚也菽水之养贫者之薄也殊不知菽水而惟其甘有胜于三牲心乎爱矣虽菽水犹惓惓以奉其亲况贤于菽水而不以奉乎等而上之若菹豈若姜桂若修瀹橘也笋也羹也鱼也皆吾深爱之发见若必待三牲八珍为甘旨焉得人人而有之而亲之养荒矣豈深爱之心哉善政知此则不负是轩之名矣

竹逸记

竹植物中之君子也挺直而不阿蔓抗节而有疏数远近之杀柯叶冒寒暑而色恒青虚中若有容於物以故晋人多好之而子猷独植其竹诚以无之则俗非君子之宅也吾宗子春家於枫墅种竹绕屋青青如簟可爱隐居读书其中宛在尘外人咸称之曰竹逸以其质直不阿世守节而固穷涉忧患而不易其 谦虚自牧廓兮有容与竹似焉好事者又写为图而属予记之嗟夫诗人咏菉竹于淇澳勉君子以切磋琢磨尼父着苍筤於震卦戒君子以恐惧修省子

春味易与诗言外之旨则确乎君子之归而无负于竹矣维其有之是以似之其斯人之谓乎

老圃堂记

永阳胡氏为着姓于吾门为世姻外弟德诚当承平时尝作华堂以奉亲轻裘肥马以羣富儿肥肉厚酒以享佳客亦一时之俊也迨夫八表尘昏时移运易负乘骄而成市阀阅落而为墟德诚力虽非旧而志不替初凡豪家强族奸民猾吏之相侵凌渔夺无不白于公以直之亦人所难能也浮沉闾里荏苒桑榆乃辟圃以临池筑室以佚老莲芰菰蒲弥其涯梨枣橘柿亘其奥抱瓮荷锄靡所不植而乐在其中因以老圃自道而索予记之嗟夫士君子遭时不偶始终盛衰之际固有大异不然者矣若德诚崎岖兵乱间而能自立今年踰七十耳目聪明优游以老于圃岂非天之福善者耶

退密轩记

与文父既赋斯干于堂後之东偏为燕息之轩字之曰退密以其深窈而安静也天光斜临飞尘不到委酬酢于儿孙断纷嚣于耳目或休偃于床或欠伸倚杖博山香动石鼎茶鸣屏嗜欲薄浮华尚不愧于屋漏非君子省身寡过之地乎虽然室之密易见心之密难知自未始有形之前泊四达无穷之外凡事物之衆必求其故心之用也及卷而藏于密则寂然太极之初而万化之源也体用一原顯微无间非知易君子孰能与于斯文父淳厚典则省身如不及其必於密也有得矣

甌麓记

往年友人刘云章尝示予芳洲堂记等作因问谁何则请板洲之萧领学职者累累有焉已知其为士族於今十五六年矣一日子春语予以其亲时举朴茂和易即芳洲堂後人也闻人硕士之至其家者必能用乎情以故文焉而黼黻之诗焉而宫羽之者成卷比闻成德之在於斯也慊然以公赋驱驰未获承顏接辞又思继今以往金玉尔音而有遐心尝葺屋数椽以娱宾亲以贮经史以其接甌嶠之麓字之曰甌麓欲觐留一言半辞其间以少慰平生仰止之意何如予诺而未有对岁晏请益切则复之曰异哉时举之名斯所也异哉时举之名斯所也其寄兴甌麓亦犹诗人托兴于旱麓者乎旱之为山也名素不顯于天下要亦去培塿未甚远尔自诗人托之以咏岂弟君子而旱麓之名亘万古以不泯时举观崔嵬以厉严峻之因平衍以广寬裕之德安知甌麓不以人而顯乎子春喜而谢曰是足表甌麓矣于是复系以歌歌曰

繫甌麓之延袤兮水白而山綠其涧伊回兮厥壤伊沃可渔以羹兮可饮以粟山可樵兮洲可牧乐吾生兮无不足嗟权位之娱人兮荣不盖辱岩廊兮岸狱轩冕兮桎梏曷若斯人兮云山烟水娱心目优哉游哉兮于甌之麓

西爽楼记

予访族浚源踰坡而北将游上邨过所谓积溪茂林清池冈阜掩映栋宇鳞集一閭若市意必有肥遯之士乐其中因记友生刘孝力馆授其地即而问焉谢君德和肃予入坐情勤语洽倾盖如故少焉觴予新楼轩牖明敞几席净嘉客有举觴相属请名其顔予字之曰西爽客复请记其槩予因念清爽之气何人无之何旦无之而西为甚若乃大火西流商飈早惊草木色变蛩韵日生俯顥景于庭户洗肝鬲而澄清徽之看山而拄手板张翰怀归而思鲈蓴其或皓月千里寒光素辉奎壁垂彩离离下垂萧爽清人无复困迷刘岷之啸远庾亮之兴不浅皆爽气之所动也居斯楼者旦暮之间挹彼之爽入我襟怀非一时临眺之胜乎德和为性爽朗遇事接物左右适宜无所留滞于名胜过临必用其情笃义方之教待师友厚视世之齷齪庸陋等儒术于梓匠轮舆琐琐计工者大相径庭矣非西山之爽有所助发耶由斯观之临眺斯楼不为无益不可以不记也

龙泉县宝福院记

龙泉县北乡有招提曰宝福赵宋时长者王府签理基翔院买田饭僧峰列涧萦鬱为胜地而不知长者何所何名厥後岁敝岁修弗替益勤于今二百余年至正壬辰刼灰墟莽过者兴叹其後九年庚子比丘曰顥护与其徒契元竭力修复购木于山范瓦于陶二师泊然未尝强求于世而物情宗之远近乐施如一人又三年癸卯殿宇法堂廊阁庖廩靡不完具既而门垣峻洁丹堊金碧辉辉煌煌塑像绘轴百器具举则後人能继前志者也其後十五年契元念先师之勤复有今日非托之言语文字何以垂後于是具本末请予记之嗟乎丧乱以来故家世族门冷径荒求其栋宇复新甚未易也考作室既底法厥子乃弗肯堂构世多有之况望其建一祠辟一塾以为宗族奉先后後地哉视师之前规後随过人远矣因记七八年前校艺闽省撒棘之後纵观鼓山禅寺登巔劣峰坐天风海涛亭上睨沧溟如铺白云琉球黝其一髮此身宛在天上老禅詞公邀予留文山中归计迫切赋一诗而去今侄孙俊乃力求记宝福之成而予欣然书岂亦有缘耶护字常存元字如善云

重修永丰观记

庐陵郡治之西二舍而遥有华盖山上祀浮丘王郭三仙实临川大华之别馆也里之巨室胡公殿机始基之而命道士李敏中职祠事山之麓江抱溪朝风气藏蓄宋咸淳己酉李君始即其胜而观焉李君????自吉文十华之云怡堂式辟斯土请观额于朝勅赐曰永丰岁修世葺继继承承百事完美元季山颠古殿泊于观宇毁为虚莽内附初海宇辑宁观之住持萧与吾谗于衆曰吾徒朝营暮用曷尝不给而吾教所事曰天曰帝曰圣曰真乃无殿宇以栖其神不可愧者乎山颠纵未遑观亦不可後矣于是咸慙之温务立即货已田市材与瓦以复旧观吴元年丁未正殿成丹雘金碧圣像咸具明年曾日昇又求衆施以建法堂而私补其费之半于是门庑废庖幽室闲院以次各就乃相率谒予以记兴复以励後人予惟昔年读史见汉初苦秦苛法思与天下更始曹参相齐尽召长老诸先生问所以安集百姓言人人殊参未知所定闻胶西盖公治黄老言厚币请之盖公为言治道贵清静而民自定参遵其教齐国大治其後入相汉廷属其後相曰慎勿扰狱市及择郡国吏取谨厚长者言文刻深务声名辄斥去之一遵何法日夜饮酒不事事有顷百姓歌之曰载其清静民以宁壹非得老氏我好静民自正之

意与陈平信有智矣亦尝曰我多陰謀道家所禁吾世即庆亦已矣不能复起以吾多陰禍也嗟乎汉初挟书之律未除民间少见经籍圣人大道概乎未闻一时英杰多事黄老尚清净务简易犹足助成汉家四百年之治则其功用岂可少哉曹陈所语要亦孔氏尚德化薄譎謀之绪言耳然今之学老子者并忘其本而惟以禍福动人则末流之弊也而能修其宫以兴其教又吾儒中或所未及岂不有可敬者耶予言及此者欲其徒知教之本而後之治天下者倘有取焉黎民亦职有利岂敢以道不同而遽废公论哉况先子岩泉居士尝买田山麓仙侶至今犹食旧德予执笔于斯恶得无情耶是役也其徒王大有周道誠胡悠久叶大观刘大知匡勦其间是可书

竹林小隱記

深源頻年順適遂賦斯干葺屋于竹林之中以娛其晚俾予从子穎來告曰吾廬將落成字之曰竹林小隱王生老人可不爲我記之松茂栢悅聞之助喜命舟往賀見其棟宇峻洁棖牖疏明背城而臨江臯濯纓而俯清流誠隱士之所栖也有竹百余挺森立前榮可愛因問之曰桃李君家所種也今乃獨種乎竹何居曰思其中空吾則謙虛以受善言抚其高節吾則抗義而守禮法見其枝葉四時不改色則足堅吾富不淫貧不移之 是竹吾益友也可不敬哉嗟乎深源薄紅白粉華之難久喜蒼筤青青之不衰可謂器識宏遠矣然予因之有三愧焉槐竹吾家所尚也曩嘗植槐數株其陰已滿庭矣而人心不同有如其面不能闔廬以受之一可愧槐花黃時子弟爭采以遺工人則有之驚試期之迫而忙者罕見二可愧連年種竹老手親移犢角之盟方苞方體不縱牲畜以戕之則狂童饑妾采之以菹泐而渭濱之植在胸中矣尚望其青青如簣哉三可愧此予不特有愧于深源抑有愧于先世也惡得不樂爲深源記之于是復系以歌歌曰

竹林兮修修負郭兮幽幽青源在右兮鷺渚中流清風如濯兮良月如鉤良時勝景兮誰吾与俦百壺清釀兮歸与婦謀嘉賓戾止兮珍吾肴饌賞心適暇兮以敖以游光陰過客兮富貴浮沕綠鬢一變兮楊花滿頭胡不日以嬉兮懷千載之長憂我勸兮賓醺賓醉兮我詠竹林竹林兮吾托尔以优游

靜淵堂記

郡城玄妙周以仁受守一玄丹之道有年矣元末廉使吳公伯尚以傳稱仁者靜篆靜淵二字遺之近以荐入朝授官道紀車蓋杂沓琳宇增輝霞步泉音道流欣羨可謂榮耀矣于是出靜淵之字以名其堂而属予記之予謂至道之精窈窕冥冥至道之極昏昏默默皆靜淵之說也以仁素聞之矣何待予言然予聞張橫渠云至靜无感性之淵源又曰湛一氣之本是性之与氣本体皆靜淵也朱考亭亦曰淵淵靜深而有本也知靜淵之本則知道爲天地之本天地爲萬物之本以天地觀萬物則萬物爲萬物以道觀天地則天地亦爲萬物靜淵微妙豈尋常所能窺測哉何時与子凌三光飡六氣招太和爲友而躡乎澹泊之境細論之可也姑爲之記

三峯隱居記

予友任保康别六年矣辟地西昌闻其馆蜀江欧阳氏以忠主人仁贤心窃喜之保康曰以忠尚儒术卓犖不羣而别字三峯将予一言为之记予观蜀江平洲远岸覽闲演迤风樯沙鸟娱目赏怀不识三峯安在则曰蜀江在武山之?欧阳氏之先有号皆山其後袭以峰者至以忠而三焉自其地而观之平原沃野非有峯峦累累乎左右也自其人而观之厚重弗迁耸拔自异则峯之似也予何泥其迹而忘其意之求乎噫若然则五峯之胡九峯之蔡皆以忠师表也倘能求诸老所自植立者得其一二以修其身以齐其家以传之其子孙则三峯之名将必籍甚勗哉以忠

昭然堂记

予尝过道昭之庠爱其轩豁邈达高朗洞开山容水色献于阶庭天光云影入于几席客有谓予曰此堂之所谓昭然而道昭之别字也常欲得闻人记其概而未遇今幸耆德之临于斯也敢请则因语之曰子知天人相与之际乎感孚甚昭然也人稟於天以生以理揆之一贯也天之昭昭日月星辰而所以昭然者不在三光而在主宰也人之神在乎目犹三光也然目之视非能有光必因乎日月火焰而後光存焉晦而幽者目有所不能烛也故以目视以粗而得粗者也以心视以微而得微者也人之昭然者非此心主宰之微乎天之与人犹影响耳祸必以罪降福必以善来若有物的然以主宰之者则凡主宰于吾身者可不使全其本体之明善善善恶恶以契乎在上者哉懿德苟昏则彝伦攸斁而事物之衆亦不能察其邪正矣虽然自昭修已也用晦处世也皦皦者易污水清无潜鱼其括囊斯无咎乎诗曰殖殖其庭吟吟其正斯堂之今日爰居爰处者宜之昭兹来许?其祖武斯堂之後曰善继善述者宜之客喜而谢曰仁人之言其利溥哉闻之昭若发蒙矣请笔授之俾无忘嘉言之贶于是乎书

乐隐堂记

族弟元善少长于母家距故乡一舍而近虽典刑文物耳濡目染浸以踈旷然辛勤稷稼立身持家堂构翬飞子孙?蛰要亦兄弟中之卓然者常曰人之生世也弗仕背君必仕背亲二者将安取衷哉惟自量其才力何如耳仆观後之仕者书律未精印绶已绾惟声色之是务惟贪冒之是思吏胥纵横而弗禁黎庶愁叹而弗恤若是者虽万鍾九迁仆无乐乎此也况可食以酒肉者可随以鞭捶可授以官禄者可随以鈇钺将能免于患乎吾岂若闔閭足以庇风雨田亩足以供伏腊妻孥主馈无饥渴之忧宾朋辅已有启沃之益儿孙课之以诗礼僮仆督之以樵蔬洽百礼于岁终蚤输税于官府虽无赢余亦无不足逍遥一世之外优游韦布之福此仆所以甘此之熙熙而耻彼之碌碌也于是客有举酒祝之曰翁其乐于隐乎殆亦吾斯之未能信耳遂咸称之曰乐隐翁既以此名其堂又三年而元善捐馆既而其子某曰先父与伯父齐年而存没异趣忍无一言记乐隐乎闻之不觉怆然因思少年攻苦澁淡拔身于場屋数千人之中近年振翼南溟抡材于闽粤数千里之外土类虽或艳之然白首无成与物多忤视元善所就以裕其後者有弗逮矣然後知其乐隐之高非惟庸俗罕及老迈亦且瞠乎其後故特着其平昔之言于此以为之记

麟原後集卷七

麟原后集卷八

钦定四库全书

麟原後集卷八 元 王礼 撰铭

涂君仪可墓志铭

泰和武山邑之望也相传陶皮二仙泊武姆尝炼丹其处今年夏孟道出其下观其雄峙陂陀意其易其 必有隐居求志者焉俄至汪陂涂伯高兄弟倾盖如故刚止余宿青灯夜话跋涉世故泛及其私既而请曰弊门冷系???自南昌徙居武山之阳有年数矣五世祖君卿又徙汪陂生功甫功甫取曾氏生大父万溪翁实至元丙子也大父既冠拓亩肯构思光顯其家于天文地理之学无不研究邻里有鬪争者归之曰是能排难解纷以理晓人也官府有征斂者从之曰是能称停屋簿以公服衆也肮脏乡曲者让之曰是劲卉不偃于风也所识穷乏者依之曰是能絶甘分少也性极谦和而人亦莫敢侮拂之居常诫子孙当存心以厚往岁有飞语大溪山寇将夜劫武山涂氏於时武山群从昆弟悉以輜重寄予汪陂及寇至乃掠汪陂而武山无恙诘朝群从闻之涕泣而至谓必丧所寄矣吾母曾氏谓曰汝衆所寄吾已度阁之所丧者皆吾物在下者也其忠直不欺汝等今食其报平生言行大概类此痛惟大父捐館于至正丙申享年八十有一起家辛勤凡一瓦之覆一壠之殖子孙得蒙业而安皆其力也遭时丧乱未有闻人顯扬潜德不肖之罪也敢以墓铭为请先生不菲陋之将山川草木与有荣焉岂徒存歿者之幸予惟孝思之诚可矜而难拒于是序之曰君讳梦龙字仪可万溪其号也娶朱氏男五人长曰本传无後性传之子汉飞芳蘅礼传之子芳兰伯高伯英伯善则世传之子也季曰泰传亦无後四子先君相继而逝送终惟世传与诸孙也已亥改葬周陂乙山辛向诸孙俱克持家有立万溪为善之报不在兹乎不在兹乎遂为之铭

嶙峋武巘曾降申英灵继踵鍾逸民涂君得之直且振笃哉务本徂隰畛诗书子姓方溱溱百年俛仰迹已陈周原契龟幽有神丘木虽拱铭则新余庆流辉垂後人

刘君士培墓志铭

安成刘君士培既歿之二年礼抱宿草之悲思托之文字以抒吾情而少余力一日其子倬谋迁其丧归葬故乡状其槩来请铭嗟乎士培良友也行长命窄不可复见矣见其子戚不自胜铭奚敢辞君平生孝友出乎天性视子姓无疎戚一以慈待族嫗不榛梗而寬裕与人交笃于义下至皂隶行道之人接之无不尽其诚中更变故迁避无常处而俱无怨恶于人腴田沃壤多以逊其乡党宗族而弗较惟家庙烝尝祖塋祭扫无远近悉身任其责日亲名师胜友明经业进士和易爽朗新学往往乐从之游然语至大经大法又凜然不少假借尝纂先世遗文泊诸贤所与书翰咏歌传记铭诔等作为潜光集唯世德懿行之弗扬是思比岁朝廷甄拔贤士守令荐君于行省以足蹇难贡免归使出为世用膏泽有不下于民哉嗟乎杞梓连抱不生步

仞之丘土培異于人人君子必論其世也按劉氏系出西洛至宋始徙安成下村代有顯人其最著者龍雲先生諱弇登元豐進士第繼中博學宏詞科元豐中進南郊大禮賦哲宗覽之動容以為相如子雲復出除秘書正字徽宗改寔錄院檢討官周文忠公必大叙其文謂歐陽公以文章續韓文公正傳遂為一代儒宗繼之者龍雲劉弇也从孫澧陽史君夢驥嘉定登第授潭州安化尉有廖道人擎錢于路被劫廖角力而凶人死官不能明誣服為劫尉反其款時西山真公德秀帥潭詳獻其刑云當時廖不敵凶人凶人殺廖矣尉得其情目為長者特荐于朝充達州教諭嘗捧夔檄防遏北兵招安潰卒九十六萬人為長沙宰又捧冠檄督餉運籌以雪夜擊敗敵騎之妨轉道者解黃州圍由是諸軍大振知澧州署行營堡竟歿于王事有子曰子荐融州官滿告休得旨主管建昌仙都館歸途歷廣西北兵至境上其帥邀與同守遂留敵忼丙子北兵臨城雖衆寡不敵而猶力戰瀕危語其客曰吾頭可斷膝不可屈取袍笏書其上瘞之登城北面再拜而死嗚呼非三君子文章政事忠義烜赫于前後嗣何所儀式以進其才德土培可謂稱其後昆而竟不得展其所蘊天之報施將不在其後之人乎曾祖諱科壬子兄弟四人俱領鄉荐時號一門四賢祖一雷咸淳庚午叔侄三人俱在選中人目為三杰父所學母黃氏君諱培初娶栢溪周氏歸時父命以田歲入粟八百石偕外氏後非昔君仍返其田繼娶東溪李氏俱名族俱有賢行君沒于庚申六月望前二日享年六十有七子男一人倬也女一人未笄銘曰

清廟絲桐根于峯陽瑟瓚葱珩產乎崑岡含冲毓秀尚論其世家匪積慶疇象賢只既鍾世美未究厥施命也柰何時或厄之誕晦于今斯顯其後棠谿千鈞必發于穀我銘墓陰以慰土培潛德有光賁于書台

即心處士鍾君墓志銘

嗚呼即心處士古之篤行君子也今世顧欲求斯人哉惡乎得已君諱應麟字祥伯廬陵丹沙里人也其先唐太傅鍾紹京之後由贛縣徙東固東固徙永和曾大父岳秀字桂卿宋鄉貢進士妣曾氏大父國華字君美隱德弗耀妣歐陽氏父振祖字成叔業儒通醫又由永和徙丹砂妣朱氏君其長子也聰敏有譽修然昂立如胎仙志一潔高脫略世態守先訓罔敢墜寡言笑重然諾疾惡如仇面折不少怨旁究子史博參方外時與志違乃挾醫敖游凡求診視者不以賤貧寒暑懈于往遇嫠者且助其不給弟瑞伯館授于外常歸候問怡怡如一篤訓子姓及姻子弟獲親炙者耻為浮薄鄰曲無良亦改悔其平生里有爭規以禮讓貧而好施予屢空意泊如也至元丙子郡城內附天兵駐城外夜有以火攻者獲而戮之訊其徒云是寨兵張云由永和而至明日胡孫總管水陸進兵聲永和之罪將屠焉陳兵王家洲瀕江居者悉奔竄君慮禍及其里獨不去正其衣冠以俟頃之虞候擁君至帳前總管謂曰秀才永和謀叛而今剿之君對曰永和善地但張云昨偶經過非永和人也有頃遘卒復命曰永和滿地有卓槍痕迹部衆曰是豈得為善地麾兵欲渡君力爭曰張云蹂踐其地而然耳永和无罪而涂炭生靈非天意也宜加撫諭使百姓歸德于是兵少止君自往永召其衆急出自白俄而父老率其子弟迎拜馬前具道實不知狀總管大喜執君之手與酒索謳君歌大江东去一曲盡懽罷去永和賴以免禍君力也近壤有巨蟒出沒鄰人見輒呼擊之君止之曰彼不汝害何用擊之蟒徙于君門外丛篁之下穴處焉每旦君開門誦道經蟒聞警欬則昂首出穴相向經罷復匿如此者十余

年君歿蟠入室衆欲擊有曰君尝戒勿击且视之蟠绕灵柩一匝而去晚营别室于屋之东偏扁曰即心因以为号风晨月夕雅歌清啸炼丹修药怡神引年一日清晨冠带而坐命家人具酒饌召亲友谈笑而别一语不及家事实有元大德丙午二月也娶黄氏子男三人某某女三人孙男四人生宋淳佑甲辰九月享年六十有三卒之踰月归葬永和石窟祖原衣冠之士会葬者数百人呜呼若即心处士之笃行其罕见也夫时进士静山汪会龙赞之曰鸾之翩翩见其翔不见其集骥之闲闲称其德不称其力呜呼若人宠荣声利不苟屈兮乘彼清风归去之倏歟兮其言已足徵矣距今七十七年其孙焕以里之老生姚安仲状来请铭某以久远故辞之辞之而弗能絶因念杜工部子美葬未有铭四十余年之余其孙嗣业始得微之元才子文其墓礼铭处士愧元多矣历年多而请益坚焕之志独不贤于嗣业也耶传曰其先祖有善而不知不明也知而不以传不仁也焕乎可免矣铭曰

于嗟乎君九京不作一视同仁恳求民瘼草昧之初滥刑者多力言释疑帅用止戈种德既深化及麟虺此而感恩鰥宜可徙于嗟已矣旷无斯人斯人不作漓俗曷淳来者闻风兴仁归厚墓久铭新卜尔有後

萧珠秀才墓志铭

国録萧君子所视予祭珠儿文读之悲不自胜盖尝伤于虎者也既而欲铭其墓予不忍辞抑以悼斯子受命之不长慰其亲系念之无已也铭曰

生萧珠川毓秀资岐嶷异禀受岁十一外傳就事亲孝于弟友经通析文节族踰四稔学益究祖捐馆衿领?字伯玘居客右蕲深造乃弗壽甫弱冠夭莫救玉损瑜兰陨茂服报重宛在疚厥配曾未嗣後閼新塘安无咎魂兮归骨肉又徵我铭垂永久

乐安典史杨君墓志铭

呜呼近年来亲友日益沦谢闻之心折骨惊况忍铭吾子牧哉子牧姓杨氏其先蜀人汉太尉震三公十有一相皆弘农人广明之乱国子祭酒膳从驾西幸孙湖州刺史鎰始家眉州七世孙公畿为南安府尹因居庐陵遂为南祖语见陈公黄裳志南安墓文南安有子曰壮行字伯学实为吾宗王潮州孟孙之侄壻衡州判府致仕者也昌文贯道彬文性道俱王氏出也王氏有从归之壤千亩故其子伯仲涉秋必吾里之留于予好则兄弟情则契友以斯文而尤厚也贯道试艺不利晚以父廕授崇仁尉而以科目望其子故子牧勤励于学雍雍济济诚阶庭之秀也已而屡丁忧祸家事异前学术渐废虞文靖公以书勉之曰出蜀万里诗书门户之托不轻惟节哀自强以副亲友故人之望盖虞杨世嫺故也又後之十数年颺回雾塞八表尘昏俛就太和邑幕干升斗之禄以给其家内附初仍辟为抚州乐安县典史辅政不虐抚民有恩既而邑有负刍之难官吏被戮郭外之民争护子牧以家匿深谷幸免于祸遂寓金溪谋归庐陵以幼子馨新在曾氏甥馆顾复未忍违俾仲子会奉母先归理旧业乃拳拳以书属予求序其潜虚集明年冬会复往迎养阙焉离索已久企予望之谓不日握手晤言倾竭底里孰知会竟负骨以归哀哉斯人不可复见矣既往哭之会即以表墓为请迨将葬请益勤谓不得铭无以

紓其不孝之罪盖予于子牧亲且故虽不忍铭可终无铭耶铭曰

印綬累累尚论其世察其所安一乡善士禄负其能时乖其志得年令终六十有四壺范孔贤厥配彭氏四丈夫子曾会晋馨或夭或遥?魄曷亲宗祧时享惟会是承淳溪沙洲山秀水明安灵于兹尚福後昆

萧两峯墓志铭

某年甲子春姻友萧尚质述其乃父之行而来请铭泣而言曰先君没踰年未有片言以掩诸幽不子之罪其可追乎先生当代之能文者言足以取信于人文足以垂示于後敢请一言以昭潜德庶先君之歿而名永长存也予哀其言目其状乃知其上世有为长沙令者始祖学以马殷之乱遂徙居於禾州之九岭于君十一世矣君讳崇勲字光谦号两峯曾祖讳涇祖讳景昌父讳懋俱隐而弗仕母曾氏君性聪慧重厚寡言不事家人生产好读书习举子业尝于棘围未遂其意而归退处闲轩讨论坟典终日静坐如泥塑人动止必守礼法圣朝以来常被徵辟以年老辞教授于乡语人以善暮年尤用意于诗取中峯所赋梅韵和为百篇以示子弟御史易君卜所求而诵之益加称美且令钁梓以传于後岁丙辰四明乌斯道宰永新举行乡饮酒礼延处宾席娶詹氏有妇道先君二十九年而卒葬于蕝坑蛇形君生于至元庚戌正月初三日歿于【阙】癸亥二月初九日享年七十有四子男一人肇基即尚质也女四人俱适人孙男二人谭仲谨仲卜葬于本里之下寺坑呜呼萧氏之先乐于为善故其子孙久而弗替是非积善之家而有余庆者乎且君以孝友闻于乡信寔称于时睦宗洽邻赍穷恤匱宜可铭也铭曰

有学有才有年有德闻于乡邦虽埋不没我铭其阡来者是覩为善于家以绍厥祖

孙兴祥墓砖铭

名则兴祥质则敦龐毙于豆疮家人所伤是为庐陵进士王礼之孙殤生癸亥歿甲子既与其生曷促以死于嗟乎彼苍胡抟戏若此裸葬衢路之曲魂归来兮伊迓

麟原後集卷八

麟原后集卷九

钦定四库全书

麟原後集卷九 元 王礼 撰铭

廖冈铭【有序】

庐陵之西有廖冈焉相传李唐时有廖仙姑栖神岩石祷雨辄应四方徼灵无远弗届绍兴二年里士萧廷珣胡子美重修治之自绍兴迄今又四百余年矣斯民蒙其福泽以有生者不知其几世神之贶乌可忘耶岁甲寅萧氏之裔民则暨其侄用和合里族之力市甑瓮其内外俨为一室而槛闭之使翼翼绵绵则神之厚我民也愈远矣岩上尝产异香良药乱後嘉植则翠柏十章云明年夏前乡贡进士王某过之其弟壽春俾从子权来请铭为作铭曰

廖冈有仙其原邈悠雨阳失序靡祷弗酌山川出云蒸民乃粒子孙裕蕃莫匪尔极岩构幽幽以永神庥福我佑我天地同流

永思堂铭

予友萧志通恻亲之歿也有遗憾念【某】不忘字其堂曰永思求予铭予嘉其志为之铭曰

岵岵生悲音容身後一旦忽忘岂伊田兽愈远愈追德淳俗厚孰拯颓风扁此堂构永思云何尽此余孝慕终吾身虽老弗挠忌日节令思成灵貌复念吾亲思其嗜乐思其所志思其所教既念吾亲复念吾身身者亲枝尽道乃人髮肤之微莫敢遘 况在志行肯慙鬼神思而至此厥思始大见贤思齐夙夜匪懈嗟今之人暂思已稀萧氏有子其殆庶几

云在轩铭

余归自章贡侨寓永和从龙比邻也与相接者一二年矣余後归宣溪从龙馆授邻里日益相踈而于心终不忘去年重寻旧游从龙闻予至亟持伍先生所为云在轩记视予欲予为之铭予平昔重违朋友之意不能愬然况于予旧友又岂有爱于一言哉为作铭曰

陰阳聚气山川流象或祥或异变易殊状轩辕纪瑞伊祁系望周观至分汉喜芒砀陟彼太行孤飞其上孝哉狄公亲舍瞻怅自斯以後怀亲之勤触目感中慨焉白云云归于谷亲归于坟永言孝思五内裂分永和余升克孝之子思慕音容陟降庭止木本水源难忘厚恩何以志之云在有轩悠悠英英集于茂林云在在林寔劳我心溶溶漠漠入于幽壑云在在壑寔劳我目宿檐在轩伊迯匪遥不寐有怀载夕载朝孝子不匱君子所予形于咏歌达于国史风移俗美化里闾我铭斯轩人其舍诸

诚正斋铭

郡城李枢子容明敏淳笃扁其读书之所曰诚正斋而来请铭可见其务内之功切矣麟原老人为之铭曰人之为人灵冠万物心生吾身意乃其发诚则无伪正则无谄惟诚惟正神妙莫测我思诚之其功曷先曰敬曰畏翊人以天我思正之勿怠而饬絶其慾贪戒其纵逸顾諟虚灵俾常惺惺认善恶关截其以分君子小人实判于此既诚且正贤圣同止作此铭诗悬于是斋目击道存懋哉懋哉

具翕堂铭【有序】

太和刘君子高偕其兄子中弟子彦怡怡不榛梗而家日肥子高既荐之明年治堂于居之後字之曰具翕取常棣既具既翕语庶目击以固斯乐耳故人王某闻而来会顾瞻叹曰兄弟若刘氏其罕见矣夫殆世衰靡俗之砥柱也释诗者曰具俱也翕合也盖俱言迹合言心也迹俱而心弗合其乐安在况觐其乐之湛乎曩诵诗至戚戚兄弟莫远具迹与式相好矣无相犹矣为之徘徊讽咏不觉情亲惟忧其句之尽今登斯堂不有感于予心也乎铭曰

乾父坤母四海弟昆父母在亲天叙攸伦情切义深异乎友生一本分枝共气殊形既具既翕惟君子有如埙于箴如足于手斯世同生异世则否迹密情疎顔不有厚繄古之人曷其齐而姜肱盗感王覽母怡嗟今之人厚薄异施不牵于妇则桔于𧮂三虎在贾三凤在薛蔚此三荆萃萃堂侧诗以声之君子是则以儆?墙以告来哲

三省斋铭【有序】

余别峯泉翁久矣白颠重来义门焕新栋宇宏丽顾瞻彷徨深羨其子肯构之贤克成父志既而止敬请曰成也苟完斯庐复即堂之北葺数椽为游息之斋以三省题其顔庶目击戒存或有以寡其过先生执友也可无一言垂戒我哉谊不得辞遂为之铭

稽古修己信道执德专心务内实惟郕国卒传大道千载谁越昔学圣门罔敢怠忽日日省身三者交察人我同胞否泰异逢来即我谋云胡弗忠必尽己心俾归于中小有回遘戒其鲜终声应气求益友良难心既断金臭亦如兰诺重季路陋彼?盘尾生不食非义所安传道於斯博学约守一暴十寒终非已有为仁在熟习则可久嗟哉时人徒熟稔莠入道在门积德有基至切者三朝思夕思文江欧阳族大且巍文忠同源????则有支诗礼传家簪纓垂辉宜尔子孙乐且有仪扁以自儆寓戒于规

存心斋铭

人之为人虚灵者心衆理斯具万事是任扩而充之周于四海卷而藏之其密咸在存之伊何主敬无他皎若明监匪滌匪磨日久日存其功孔大陰阳以和天地以泰民胞物与罔有内外一视同仁瑞庆斯沛蒋氏是斋朴而弗华寓意深远壮丽孰加铭以声诗万钧匪重懋哉懋哉

虞廷大用

畊乐堂铭【有序】

欧阳子畊易负郭之田以养其亲而乐在其中士友表其堂曰畊乐为作铭曰

古之四民士农相通烝则为士处则为农是以贤圣耒耜必躬甘食已力耻尚商工粤有欧阳文江之浒谐世善交行已古处竭力于田以养父母火畊水耨栉风沐雨祇见其乐未覩其苦日入则埜日出则作与与翼翼筑堂斯获制既弘坚文以丹垩士友所嘉字曰畊乐其乐维何希顏慕伊慈顏以和兄弟以怡钱鏐者外其中孰窥耕道得道藏器待时我铭斯堂于耕有辉

一经堂铭【有序】

一经堂者罗士安与弟士刚士明讲习教子之地也士安兄弟怡怡而善事其亲迨今见先友之至勤勤依依不忘故旧况崇经笥而劣金羸有不克承先志者乎为作铭曰

六经行世在天如日名号虽殊其理则一谓之一经六者具该圣心蘊奥论道根荄水之沧海山之岱岳承学帡幪衆说郛郭道寄于经因言以宣经之微妙不可言传善味道腴犹彼斲轮不疾不徐精义入神不善学者指血顏汗矻矻穷年编离简断昔之圣贤心与经契口耳之徒心经岐二诵读庸行夫何益焉经不离道古今正权罗氏斯堂有自来矣景慕前闻慎终如始

诚复斋铭

余与建中友有年数矣往在郡城常常而见之逮归西昌之西不相闻问者累年近闻教授鄉里隐居求志裕如也常欲余铭其诚复之斋诺而未副愧负多矣书来速文乃作铭铭曰

於穆太极肇分两仪卑高以陈化育始滋厥初流行造化未定今则得之其理各正曰性曰命赋受匪殊收斂凝聚归藏吾軀保合天和全之在我既利且贞施无不可蘊兹太极寂然静专是曰诚复中正无偏成性存存实理斯立体用一源成已成物人之为人不在兹乎鬼神莫欺与天为徒嗟嗟罗君孰察于此顾諟斋铭自求多祉我作铭诗目击道存表于兹轩诒尔子孙

矫轻傲惰二铭【有序】

礼看近思錄五卷中矫轻傲惰四字无上下文因叹朱吕先生用心至矣盖掇取其关于大体切于日用者以为学者求端用力之要故四字之善在所不遗轻惰者世之大病也不幸某亦有之因作二铭以自砭焉人之言行如枢如机胡人未言我唇已掀不错而失亦厌匪时彼发而中视之忸怩胡人未行我趾已移疾无善步卒堕险巖择地而蹈何有于危浮躁弗禁祸既莫支无易于物桃虫 飞曷其矫之严重自持咨尔轻叟坤厚载物君子所仪

民生在勤不勤自隳日无停馭川不息驰况人灵物竞辰寔宜学务时敏德业孰齐治生服劳衣食无亏孔席不煖墨突不缁贤圣且然况在群黎奈何无恙弛其四肢习惯成癖固不可医曷其警之如临父师咨尔惰夫乾健不息君子体之

守拙斋铭

郡城之西南湖之上当在宋也吾祖信臣公揽其胜作山月亭诚斋杨文节公记之吕忠公謫居寓焉代迁亭废遗址尚存其下有庵曰圆通径幽势阻来多謁者余亦尝假馆其中僧曰道林秉心简实旁通儒书善吟讽斋名守拙邑士王某为作铭亦偿夙诺云尔粤观太初朴素淳重民之质矣饮食日用风气既开世道愈漓赋予匪初巧伪以滋有上人者字曰守拙不识不知顺帝之则募坑越壑非意所好稳步徐行择地而蹈缘絙走檐非情所与弃危即安循规蹈矩巧乃黠慧弄成无能拙本不巧至巧斯存久厌机心思与拙伍爰铭其斋蕲复于古

钟铭

某年甲子华盖山永丰观道士刘大智化缘衆姓铸洪钟于法堂前进士庐陵王某为作铭

华盖之山铸大镛鑪金炼液丹砂红伶伦鳧氏奏厥功铄于篆景法制同信善乐施禧无穷千古万古镇永丰一撞上彻天九重再撞魑魅难潜踪三撞呼旦傲群蒙允矣金奏开神通

笔铭

彦济朱兄所制毛穎余用之腕倦矣刚如剗犀之锋而不妨于转圆如绕指之韦而不啻于健以之待诏玉堂顷刻倚马以之试艺棘围须臾出院题诗蠶纸饥蚕食叶草檄辕门飞龙走电其真文房之宝而使人深羨者耶

图书匣铭

有图有书文字缤纷印以识之罔俾乱真

三峯水滴铭

如眉三峯中容外屹万斛文泉出自涓滴

筩筒铭

虽无辛侈焉用良假百里震惊执此不舍

香合铭

香以德馨如玉如金气達冥漠表于克忱

鳩杖銘

人言鳩性可治噎我獨喜其稟之拙也而專一人言藤杖可扶老吾獨喜其生之柔也而正直予歆女持予?女掖出入相友鮮女予益虽然是手足之所資而非吾身凭藉之實若夫仗禮義以為干仗忠信以為力則麟原丈人之平日也

寅賓軒銘

陽谷出日其赤如金萬國晃朗況深山僻林寅而賓之懷德寔深嘉客戾止如日照臨門戶輝光云何不欽后我沃我如旱得霖以鍼以砭足球聳瘠振古尊賢受益匪今高軒之過蛇化龍吟勗哉是軒常存敬心

麟原後集卷九

麟原后集卷十

<集部,别集类,金至元,麟原文集

钦定四库全书

麟原後集卷十 元 王礼 撰行状

元故梅洲居士王公行状

曾祖某宋两浙转运使司属官

祖维翰 考公涂 妣汤氏

先君讳斯觉字先民姓王氏庐陵宣溪人也杨文节公志其先世之墓谓仲舒观察江西子孙因家焉先君十一岁而孤太夫人朝夕训诲十三黠隣欺孤侵其恒产赖舅氏辅翼翊于江西行省锄其强横由是粗能自立即务从学通知大义无凝滞弱冠以荐剡举充吉水县学教谕念母老不忍离膝下辞官治厥家毕三妹一弟婚嫁知太夫人爱幼子尤笃门户公役悉不以及其弟既长念宋季先人辟地小瀛山谷间违宣溪一舍宗族多逃难解散遂谋之族之能立者复敖城潇洲闾聚处于是携弟奉母同族之一二兄弟归故里剏造稍还旧观虽不敢跂望上世三太守之盛然乡党姻旧莫不称中兴焉敖城居民鳞集有巡徼之司有征商之所而革罢子务市马遂以敖城所办课钱数千缗责之三十四三十五两都职役民以消耗往往弃业流亡先君力愬于總府谓此乃往来商税难以重困两都展转十余年始得散加于县之九十余都而後两都之民乐生安业时有外邑之奸人结为党伍攻讦人之陰私以恐取财物名曰广涎谓其射影祸人也先君尤深恶之谋于里之大姓曰是曹工於媒孽人短一旦入吾境非大姓之福也有能助我者吾将先其未发而制之蜃涎之徒闻而宵遁里閭以寧己巳岁大旱道殣相望先君随力周继其隣里之窶乏者不足又请于官以賑之所活者衆明年春虐雪祈寒减米分薪以济冻馁以倡富室常恨力不赡不能尽已之志岁时祭扫以尊祖燕宗尤拳拳切切有引无替重刊谱牒以聯属族姓章别亲疎而以先贤所撰墓志行状数十篇附其後以激劝後人垂成将卜日会族之长幼祭于祖塋归燕而给以谱焉未几毁于蛮寇此志竟隳先君暮年见礼兄弟能酌酢不坠复作堂以怡慈顏堂成适从寺僧得履斋吴公潜为从祖衡州府君所书耆昌堂扁遂以揭之族之长老题其後曰此扁乃吴相为衡州公筑堂奉亲而书也今族子先民作奉亲之堂而幸获之非偶然也况上侍慈闈下抚兰茁斯堂斯扁于先民寔宜先君为之喜署一聯于两楹间曰修其孝悌忠信俾尔耆艾炽昌见者称赞太夫人享年七十有六终于辛未之秋先君葬祭尽礼复求申斋刘先生书其行而铭之墓平居尝举大禹克勤克俭以为家法意适神闲辄哦咏陶靖节同源分流人易世疎慨然寤叹念兹厥初礼服遂悠岁月眇徂感彼行路眷然踟躕与夫民生在勤勤则不匮宴安自逸岁暮奚冀担石不储饥寒交至顾尔俦列能不怀愧之句若有当于其心所居之後有梅洲自谓梅洲居士见子弟嗜

学必极口称誉之且勉之曰科第吾家旧物也工深力到天不汝怜耶至正庚寅礼忝举于乡先君深以为喜曰庶几不媿世科矣迨礼往任安远校官则举范德机先生为官不必高高者乃其贤之句以戒饬之礼参谋军中深入蛮县招抚獠獠向义安业时参政公全普庵萨里及噶海齐便宜行事版授礼兴国县主簿越明年改授广东宣慰使司都元帅府照磨以励忠贞先君闻之愈慰晚节而八表尘昏世事日非矣乙未之冬礼获归省见乡之戍守无备遂谋于兄弟买舟先奉二亲依郡城之近以居明年春寇毁于里家业一空寇退复回小礮山左以就口食是年七月十二日先妣虐疾卒先君伤悼得疾遂不起寔至正丙申八月初二日也享年七十有七先妣刘氏有贤行经纪家政辅先君为多子男四人观丰礼祥庶子一人天禄女二人适刘某廖某孙五人脱穎宝溥华溥贤完哲诸孤虑时艰危即葬二亲于小礮山之原余旬寇复出凡新旧塚皆发取中藏惟先君先妣墓不少动人以为为善之报又踰一年为洪武改元礼与弟侄合力迁二枢以归戊申十二月二十日以先君附葬于峡潭野猿掬水之兆先妣葬芦富上谷之牛形于今又十年矣未有片石以昭潜德不予之罪尚可追乎用摭其平生大略以乞言于当代之立言君子惟哀而怜之赐以不朽不肖孤之幸也谨状

罗泸州子父志节状

至正壬辰广东元帅沙克嘉巴勒以连州有警遣使诣广西募达尔罕五百人征进至得二千人以归癸巳夏五月至广州城下时连州羽书叠至元帅就城外犒赏即调赴军前诸队长怒曰我数千里远来元帅既不容我入城又不令我休息而即赴敌颇生怨言离广州即肆掠至清远停不进县宰渡江避之元帅患之召诸奏差问曰谁能为我起遣广西达尔罕赴军前者奏差罗次丙前尝为靖江浔州郡吏识其队长二人进曰次丙愿往遂令乘传往至清远郡达尔罕皆贯弓执矢相向次丙遥谓曰汝勿动我来颁赏而实不持赏也问县宰安在曰在对江次丙移舟渡江与之谋曰元帅遣我督西军进讨而西军乃相距我谎言元帅有赏而实无赏县宰能为办楮币锭三百乎县宰曰诺得二百次丙持楮币劳军始得其驩心欣然就道次丙督以赴连州至则正交战次丙督以助战寇稍却西军深入而不知要害出入为所败七月初二日次丙被禽寇施惨酷欲降之次丙不屈十四日被杀事上帅府帅府上之省赠番禺簿次丙父文节少有远志年三十三至京师为胄监陪堂生有相者谓曰君两颧骨入鬓当于边远立功名国子先生姚公南礼举于集贤集贤移咨云南省授昆明州学正陞孟杰府教授补大理金齿宣慰司令持冰蘖以厉远人其地产金赂辄数铤文节辄斥去远人惮之事多立办尝以徵赋金至乾崖涵里乃近西日落之地其地十一月方生草二月即以热枯死诸葛武侯所谓深入不毛者是也其民愚赂使者金常如所徵赋之数冀苟免使者久不去仍如数纳所赋金无悔常不肯先纳文节至赂亦如故文节谕之曰汝所贿我金足输汝赋矣汝何愚不早输赋徒多费汝金也其人始悟感悦有豪民占人田赂金数铤文节不受卒夺豪占归其人後除普定路知事补云南行省掾史厉愈坚西御史至必加獎予云南故事驿马皆中朝给楮币为买马费然楮币至则官吏共分之而以买马责之土酋文节曰官给驿马价而官吏私有之可乎悉以付有司买马无敢分毫为奸者参政锡勒通以能忤时宰左迁而至务欲立奇功以自见念非廉且能者不足以助成已志择文节为提控掾取今弊悉更之声动蛮夷中人多有自远徼来归者文节尝喜赋诗有边臣不识金铜像使者新降铁甲郎之语侪辈多不便之金铜像者蛮人所用以与货贝同行者也货贝亦蛮人所用谓之?子事有不便于土官者土官

輒以多賄動文節文節怒斥之其人曰君薩達克齊耶乃不納我金也蓋國初時有平章薩達克齊至廉故其言如此錫勒通悉更庶務文節乃為文上內中書曰國家混一南方自得云南始是猶高祖之關中光武之河內也且云南一縣名不足以重方面而省署曰云南諸路行中書省不得同內諸省皆非大一統義也愿改曰平南等處行中書省所以彰國家混一南土所從始也會錫勒通除上都留守事寢不行填池有蜃能出云為風雨歲大旱文節為文檄之大雨然以此多取嫉于省憲兩府後西御史至交讒之御史搜求訖不得毫髮過但以專任自用劾去文節至京師辨明改龍馬他郎甸長官甸猶縣也長官猶縣令也文節素不善阿諛所至多桷齟不能展所志年六十二以文林郎重慶路瀘州同知致其事作金土地坡詩以自嘆金土地坡者云南地產金土人以金鑄土地之神而祀之數為貪夫所戕既悟則曰累土地之神者以其為金也後易以木至今無恙意以為平生為才所累使為土木偶則無嫉之者矣又嫉風紀之司以貪失邊人心作虎神祠詩以讖之虎神祠者云南之人近百歲往往有化為虎者其化也先自尾而身及肩雖子孫不敢近之化成乃山去歲時歸食其祀子孫設祀于屋後隙地虎夜歸食之而去故其地祠虎神人其衣冠而虎其首意以為饕餮者人其衣冠而虎其勢以脅取之也次丙在兩廣時其父尚留燕數以書戒次丙曰我以齟齬窮然汝勿以我為愆當以廉律己而謹三尺以行之務有所樹立次丙遵父命故所至有声称次丙之兄大已字伯剛孝友篤行君子也經誠明行誠修試藝乃不得志于有司未顯于世家故貧教授鄉里以給衣食將老喪明人猶以其不盲于心爭延致以淑其子弟惟一男子前數年客死于外去年大已又與一從弟俱亡傷哉若人之不淑也蘇文忠公有云原憲之貧顏回之短命揚雄之無子馮衍之不遇皇甫士安之篤疾彼遇其一而人哀之至今而茂誠兼之豈非命也哉由大已觀之又有甚于茂誠者矣大已存日嘗屢以書屬札書其弟次丙與其尊府瀘州公志節札未及述愧負深矣偶閱故箚得其手字不勝怆恨念其父子之平生可謂無忝士類而蹇連若此自不知造物者之何心爰序其槩以償夙諾庶几挂劍之意慰良友于九京也

奏差歐陽存遠行狀

曾祖國安湖州路照磨

祖古明樂安縣典史

父逢春故不仕 母劉氏

君諱永字存遠吉之吉水人也生而穎茂長而機敏德性淳厚其接物也從容以和如春陽之溫其處事也發言當理如秋月之朗事父母盡孝友兄弟尤篤鄉人信之先達器之有司以荐者言舉為州從事職案牘視官事如家事為人平恕鞠讞罪囚得免于死則喜苟或未然忧形于色屢反冤獄憲司按臨聞其能聲多有委任往往以儒術飾吏事咸稱其職由是遴選充樞茶運司奏差時運司多賢士大夫喜其才委以徧歷巡按所至守令敬之如運官之亲临事无不舉民安其生延譽遠邇莫不稱美考績以年勞將陞照磨之職荐剡交上舉參憲掾而淮潁兵興八表生昏矣于是慨然曰吾才非不如今人吾志豈不如古人而遇斯時命也自是杜門養晦與世浮沉抚时序之良辰悅親旧之情話滋蘭蒔菊臨水尋丘不知駸駸乎暮景矣君

平生不汲汲于名不切切于利流行坎止随遇而安凡宗族姻亲闾里故旧贫困鰥居者助以成其婚孤女无托者助以毕其嫁死而无归者葬之兄弟耗费其财物者不少每寬而不较以粟百斛贷里之屠沽负贩令经纪以生而微沾其息间有久假不归亦置而不问以故细民多德之洪武七年君一日抱病医巫纷若相视束手衆皆危之男子耕等哀吁于天夜礼北斗愿減已齡以延父壽惟孝动天卒遂更生十有四年十一月君复嬰疾迫于殆子耕割股以助参术祈病之瘳君闻召而语之曰汝何不智之甚耶壽夭稟于有生之初非禱所能移曩岁幸而获宥亦数之未尽耳身体髮肤受之父母何用自苦如此吾年踰八十死亦何憾古人云为善最乐汝曹勉之言讫而逝生於前元【阙】己亥终于洪武辛酉享年八十有三越二年癸亥十月葬仁壽乡黎洞之沙分向则巽已配李氏有贤行善综理其家子男三人子方子耕与耕女二人长适袁【阙】幼在室孙男十人予以甲子之腊重至文江闻其墓有夙草悲愴久之故老犹历历道其于物无竞宜垂裕後昆蛰蛰且有立又闻子耕割股以疗父病惻然于怀虽不适中要亦发于诚孝之所致也既而求述君之懿行以俟当世能文辞者铭其藏故即所闻述其槩俾有所藉手以请云

祭文

祭文信国公

于嗟夫子之烈烈兮刚独抱此忠贞死而不朽兮反贵于生忱千载而一人兮与天地比壽日月齐明纷赵宋之末运兮日沦胥而莫挽北风其凉而霰集兮何重任其途远虽成败利钝不容以前知兮尽瘁之死以为期胡贾【余庆】吕【师孟】之卖国兮羌独置我于危疑云惨惨而北征兮路曼曼其何极苟宋德之未厌兮轨句践而是力望仪真其匪遥兮脱虎口为後图藹良苗【耳成】之翼翼兮将饫我而有余儵肝胆其弗照兮谓化茅之荃蕙指苍天以为正兮孰家置夫一喙曰阶庭芝【李制置】兰青青兮佩湘累而有光倘察吾之中情兮虽死庸何伤扬子淼淼幸济兮遭天台而遵海朝括苍而夕闽兮求帝子之所在念神尧一旅有天下兮夫孰非人之所为天命其或未移兮国中兴其庶几桥辕门以飞檄兮咸景从而向应水万折而必东兮金百炼而益劲噫五坡兮嬰祸罹命之穷兮可奈何下沈?而无地兮上寥沆而无天夜旧乡以径度兮哀首丘之无缘五载依其燕狱兮寧变心而易志幽与明其两不忤兮亶无双之国土慨予去之百岁兮过故居而拜祠慕抗行之薄天兮思恂恂其逢之形可瞻而神不可接兮步两涯而求索驾风鞭霆何所之兮日荧荧兮而靡得夔龙从容以献替兮孰谓其非忠独罹此以颠越兮萃百惨于一躬立人极于将坠兮揭纲常以为式俗至今而愈薄兮好修悲值夫鬼蜮酌寒泉以蒸鞠兮冀灵降之连蜷奏楚音以代竽瑟兮?頼鑒予之希贤

祭主簿潘景岳

嗟嗟潘君何止于此抚大化之参差兮杳莫知其何以谓善未足为兮衆或讥其悖理谓善之果足为兮所活不知其几方致附之然疑兮等人命于蝼蚁君缓颊于片言兮回群生于万死天道报施苟可谥兮陰隲宜济夫屯否活千人者必封兮胡一仆而莫起曩维余楫章江兮望归舟夫千里仰云翮之将翱兮落万誉于一毁抱幽愤其谁明兮冀鬼神其知已言愈远而悲

长兮老泪沄其如洗?降只乎家庭兮歆渍绵之清醴

祭總制俞君文

某年月日永新懋斋俞侯灵枢归于江东舟次宣溪友生庐陵王礼谨以孤鴈斗酒致千古之别而侑以辞曰叔敖之城兮宣水之湄昔公击楫兮凡几过之人生百年兮黄粱一炊灵旄重经兮无复来时交游零落兮後死可悲江东暮云兮云谁之思车过腹痛兮千载交期夜月屋梁兮鑒此一卮

祭汪照磨文

某年月日王礼谨以清酌庶羞致祭于照磨汪君士章之灵嗟嗟汪君人中鸾凤既清且和亦谦而重遭世孔艰沈晦弗用寄迹辕门待时以动簪缨蝉连历唐与宋食租衣税而菲自奉斗粟及缁与朋友共曾几何时百年一梦旋殒禾川我临而恻枢经宣水擦泪以送送子伤子知子抱痛母先倚门举奠无从天耶命耶难平者衆我辞孔哀于以代賵

祭赵道夫文

惟君堂堂华系磊磊英姿望之鸾凤即之兰芝少负锐气勇于有为志与命殊怀才莫施中更丧乱按轡不驰弗耀其光益蘊其奇怀古隐沦石门我师于时耘耔于时栖迟群蛾赴明咸蹈危机君如林鹿食苹以嬉朝侪暇叟夕侶樵儿白石濯足紫芝疗饥允矣养晦贤哉识时嗟我穉孙泰山是依胡不期颐而止于斯托好?萝未覲令仪落日屋梁我心孔悲爰具豆羞抒哀以辞魂无不在尚其鑒兹

祭外舅萧两峯代叔厚作

呜呼我公学足以启沃夫後进景既暮而弗佚才足以寄百里之命乃屡辞乎徵辟惟愿慤以自持实乡间之矜式天弗慤遗寢簀斯易嗟泰山之将颓将安仰而靡軾念平昔之海言不自知涕泗之沾臆幽明永隔实在今日奠以叙哀五内如刺

书

与刘参政书

往岁适然而识面倏焉而分手虽天各一方莫覲光仪然以昔人心友神会言之虽疎远犹左右也後闻敷政浙省威德并行远迩具瞻如在天上然遇知行志自我辈分内事耳但当忠君爱民夙夜匪懈以不负所学礼也年踰八袞碌碌何成无足为古人道近以余力谩缉佳什为沧海遗珠集四卷用奉公退寓目焉相见邈不可期凉风日深惟鼎?葆和以膺柄用不宣

与子谷弟手帖

吾弟既沐天恩便当洗心涤虑国尔忘家公尔忘私以图报称在家技俩?毫莫用鱼与熊掌不可得兼名与利之谓也职事典故有不知者求教于人庶无违误战兢自持无貽前人羞慎之慎之不他及

启

回萧两峯启

某概念平生持循晚节谓优游而度日抱膝含饴忽咄咄以书空拟步如漆太史公以一言受祸千载貽羞苏东坡为群小所排四海称屈况如老我素号醇雅惟直道以事人少的学以谐世彼司平于我者既弃周鼎而宝康瓠故嫁祸于人者亦舞鳅鱖而号狐狸每顾本之中者无愧惶岂以至自外者为荣辱乃厪高谊叠慰穷愁每叹令郎冒风雨泥涂之艰维持者再亦以至亲有手足肺腑之谊踈慢则孤自莫叙于谢私又远劳于存问笼鹅愧黄庭之未写腊醢觉绿蚁之犹浮岂期座侧之明珠亦遣着中之仪物报怀莫罄铭骨逾深千金散尽还来盈虚有素一饭之恩必报迟速待时草率占酌不胜感懃

贺醮子

兹审醮子而宜室家新偕鸳偶为酒以召僚友远贲鸾牋喜溢乡里光生庭户花烛阻陪于华宴菲仪聊致于贺私读书煮茶想自此优游于椿府设弧系绂惟从今祝赞于榴房莫罄懃忻悉祈鑒察

贺夏道存教授启

兹谗以乡先生为郡博士泳仁蹈德作新乐育之范模刮垢磨光整肃来游之冠带幸谐金论宜贡尺牋窃以黉舍作养俊髦师儒寔为重职胡安定之兴湖学治二事者多贤才徐仲车之在楚州诲诸生而为君子必规矩準?先自治庶礼义廉耻非虚言是以洋洋乎弦诵之和济济然威仪之盛穷檐委巷甚贫者亦务明经踵族高门不学者指为俗辈人知趋向意自激昂矧今天下一家喜见书同文车同轨羣黎百姓皆知术有序党有庠盖齐家治国由大学而知则传道授业非明师不可睠兹文献在我乡邦校无鲁国之真儒斯文几丧郡有蜀川之太守吾道其兴虚教职以迟迟采輿情而察察诚以其人之贤否系乎此府之观瞻必称其才乃无废事恭惟词源浩荡德量弘深虽贤能岁贡之书让于伯氏而乡里月评之论屈此长才同师而必超羣学易以无大过西桥流水栖迟在衡泌之间东阁延贤徵起遇风云之会训导两载发扬六经芹藻萃于泮池菁莪育于中沚循循而善诱年弥邵德弥高休休如有容学不厌教不倦利禄之际每如怯夫名教之中自有乐地不图鸚荐发此鱣祥道之所存孰谓以退为进时不可失要亦由老更成试艺春官了当年之故事低头座主恐前日之门生归斯受之在此行矣既专施于化雨宜大拯乎颓风上以答府主之心下以塞士类之口某居常笃于自信老益

壯而窮益堅未能俯以為同譽者少而毀者衆所喜耆英之在泮或來暮景之浴沂爰叙微衷綴茲賀語謹奉啟以聞

賀伯達知縣啟

請老挂冠寔人間之備福遺榮結社昉林下之一人吾黨增輝里閭交慶恭惟大尹先生蚤窮六藝百家之奧銳意榮名晚值四海群雄之爭甯身離亂幸大明之當運得就日以分輝有志竟成不負所學五十齡而富貴已聞綬見于會稽千萬里以驅馳將見書成于史記又能佩老氏功成身退之訓初非如淵明昨非今是之歸與野老以為隣招門生而立館文字優游于晚節何異求仙林泉笑傲以娛情賢于從事某本圖恭賀竟以事牽致令尺牘之後期用貢四詩以為禮深慚踈慢所冀宥原

回蕭尚質賀婚孫啟

詒厥孫謀不過喜傳家之有道為之有室抑孰知任責之無人由其抱平生不足之悲是以償晚而未了之債雖曰季父視之猶子然亦君子所貴抱孫偶爾隨宜因而成事為酒食召僚友尚缺此情事詩書或絲麻各令自立乃厯厚禮寵以褒辭灯火秋涼或有煮茶之余福階庭春雨斷無憂草之閑懷報謝語踈感銘心切

回錡以安賀婚孫啟

生子既為之有室孰知暮景乃抱孫婚姻所貴于以時不過貧家之了債豈復有盛時花燭之讌況兼以隆暑草具之難愧無嘉肴旨酒以速賓客乃厯高詞厚禮之耀蓬華受之深媿却則匪情逸豫優游或有一日煮茶讀書之樂功名事業恐乖奕世穿楊射策之期率爾占酌藹然莫報

麟原後集卷十

麟原后集卷十一

钦定四库全书

麟原後集卷十一 元 王礼 撰说

刘士能已知字说

友生刘汉章以避御名易字已知而名曰莫徵予一言说其义以告四方亲旧使知今昔称名之殊而非两人也予谥之曰生之易字也则是通名而诵之也则非莫已知者得无有怨天尤人之意乎方今朝廷求贤如不及占小善者率以录名一艺者无不庸以生之才何患无知已者而有斯叹哉予请因生之字而更生之名可乎夫子尝言不患莫已知求为可知也又曰君子病无能焉不病人之不已知也夫能者可知之寔士而有能奚病人之不已知也哉请以士能易生之莫何也禹有治水之能稷有播种之能天下後世言治水播种者必归之知禹稷之寔能也秋之奕养由基之射轮扁之斲轮伯乐之相马皆极其能者也故知名于天下後世况君子自修之道可不寔有其能哉寔有其能则不求人知而人自知之矣刘生喜而从予言故始是说使知所自勉云

李允巽字说

宣圣尝言邦无道危行言孙窃疑此为有言责者发也若夫寻常士庶虽邦有道言亦不可不孙不孙则不相入盖巽与之言能无说乎说则相入矣虽然巽固相入然过于卑巽非恐怯则諂悦皆非正也尝读易之巽其辞曰利有攸往利见大人则巽之功用可见矣圣人以二五阳刚而居卦之中所谓刚巽乎中正而志行故于象词一则曰纷若之吉得中也一则曰九五之吉位正中也是巽之吉何莫非中也与李氏中气和而质美辞顺而志清虽酬应胶扰中遇士大夫必从容进退以尽其意宜有阶庭之誉也予以其兄曰允谦从而字之曰允巽中意亦协矣乃欲闻一言于予于是绎其义以为字之说而重为告曰说卦谓巽为木为长为高巽之性也其于人也为近利市三倍巽之亨也予望子也远矣尚其勉之

乐村生说

予友邓仲举英妙人也侨寓城西之歛陆里门俯清池园出修竹或抱瓮而灌蔬或编篱而蒔菊城市之迹寡而郊野之兴浓于是以乐村生自名焉予问之曰适彼乐国予闻之矣乐彼之国予闻之矣生之乐乎村也何居则曰吾之居于此也耳不闻諠譁叫嚣之杂而樵歌牧唱之遥临目不接隳突轻儇之态而烟蓑雨笠之时见务本而不逐末贵朴而不尚奇作则负耒而兴倦则班荆而坐熙熙焉有太古之风焉此吾之乐乎村也予闻而叹曰古者市门惟民得入大夫士凡有爵禄者入市有罚盖所谓市者府史胥徒兵戎卜祝百技工巧狙佞负贩之辈淆处而襍繇之仲举城市之迹寡而郊野之兴浓则其乐乎村也有素矣将见垂髫之童戴白之

叟相与謠康衢而歌擊壤其乐岂有涯哉仲举之志尚亦可嘉矣作乐村说以贻之

伯汉字说

大雅之诗曰倬彼云汉为章于天又曰倬彼云汉昭回于天为章昭回不及日月星辰而独言云汉何也岂以日月星辰有蚀有陨有灾异而云汉无之其犹善人君子之无咎者与且云汉不常见必俟秋气清而後见于箕斗二星之间其犹君子藏器待时而後出者与安成刘君士培之子倬资质淳美嗜学不厌以予父执也定字于予予字之曰伯汉而书是说以贻之

务谨字说

城西萧氏之彦曰务谨为人爽爽朗朗有疏通意磊磊落落有跌宕情干济有誉进退适宜达官贵人争欲致之幕下予知其必为时用久矣一日谓予曰先生老矣母金玉尔音而有遐心倘踏城府於我乎舍虽累信信无厌射也又云贱子近易名常不识于务谨之义协乎否也予忆其色似欲得予发其字之说务谨良友也予虽耄及奚爱于一言哉谨之一字圣学之始终系焉不可须臾离也故圣人于入孝出弟即以谨为戒而於君子之道未能一焉亦继以庸德之行庸言之谨释者曰庸平常也谨者行之有常也盖朝焉能敬而夕则忽之不得为谨也甲焉能敬而乙则慢之不得为谨也大抵世之人往往能致谨于忧患危疑之际而不能致谨于平常动静之间盖君子所以为君子非玩常嗜诡求为甚高难行之事但即夫目前平常之所行而不忽焉即纳身于无过之地矣何也闺门之肃肃身教之初也家庭之怡怡为政之基也大者小之推迓者远之则能致谨于平常则无往而不谨矣噫不忽其常而战兢自持庸非君子之先务乎务谨常游于江淮所见夫名卿贤大夫不为不衆所闻乎崇论弘议不为不多亦何待于予言抑予之惓惓于务谨者惟欲其不忽于平常方为谨之至而无渗漏也茂之茂之予望子也殆犹河华之高深岂如斯而已乎姑发其字之义以为进德之助云尔

尚綱文辉名字说

古之君子问学聚辨孜孜而不怠者非为人也诚以躬行之外无余事德有所未修学有所未讲皆吾身之忧一言一动惟反求之已以自治而已岂有一毫要誉之心?故闇然而日章者美在其中而文见乎外其光辉发越如石韞玉而山辉水含珠而川媚自有不容揜抑矣夫苟务外之心胜而务内之寔亡汲汲焉求知于人而不能有若无实若虚则与古人尚綱之意岂不大相远絶哉慈湖杨氏有云昔人以奢为耻今人以不奢为耻此世道之感也西安李君尚綱字文辉以才名弓招将提宪寄谦下力辞再授永新上坪巡徼官与士大夫语和气满容退然若不胜衣而词气之雍雍威仪之棣棣粲然有文以相接至其短衣匹马见贼身轻又有贰师之风焉可谓有文事有武备矣名者实之宾揆其名若字可谓名寔相符矣明廷论功必膺峻擢而施劳之色无几微见于顔面非古之君子乎柳子厚云有其寔者名固从之因其名若字之称为作是说焉

巽权字说

巽之为德和顺其于易也六以陰柔处初故或进或退意若有疑利用武人之刚贞以立其志至二之与五曰吉无咎曰贞吉悔亡无不利以巽顺之得中也六四以陰居陰得巽之正巽于上而巽于下善处如此是犹田猎之获三品利市之有三倍若九居上之极过于巽而失其刚则反丧其资斧矣惟巽以行权乃得之也从子巽谦下以与世浮沉而应变机敏进退适其宜轻重合乎节予定其字曰巽权云

欧阳止敬字说

洪武六年秋予与建寅先生俱以廷议徵辟辞不获命同载诣省舟次积阜时建寅适携其子来见眉目娟好所谓兰茁其芽者也明年冬予至其家建寅在邑未归其子进退揖让周旋言论俨若老成风格予深喜故人之有子也问其字则曰师友命之以止敬而孩名则未之更也于是进而告之曰圣学成始成终皆由于敬将白于尊父更之曰成何如且止敬之说岂独为臣者所当止乎大学姑就其重且切者言耳纲常之间动静云为之际舍敬何以行之哉故远之事君此敬也迺之事父亦此敬也居致其敬不庄非孝徐行後长正容听?久而益敬晏子善交相待如宾冀缺获荐出门如见大宾使民如承大祭果可有一之不敬哉故敬则成不敬则亏欲成吾之学成吾之德成吾之事慢忽以临之而收其效者吾未之见也苟事事止于敬是以敬作所矣何为而不底于成哉处而为端人善士出而为贤卿大夫皆自敬之一念始顾名思义敬之敬之故人有子其使予喜也欧阳生谢曰成不敏请佩斯语以为训予嘉其意遂叙次以为止敬字说

仁斋说

孟子曰人皆有不忍人之心说者曰天地以生物为心而所生之物因各得夫天地生物之心以为心所以人皆有不忍人之心也盖不忍即是仁忍则非仁矣孟子又曰仁人心也盖仁是中心之生理常流行生生不息终始无间苟无此生理则心即死矣其待人接物?敬何自而发必无所谓礼处事之际必不能裁断以合于义至于是非则顽然无所辨别而智亦荒矣是故仁为心之全德而不忍人者好生之端爱物之理也然惟仁人为能推之而得其宜是义之所存者亦仁也惟仁人为能?俭而有节知觉而不昧是礼智之所存者亦仁也此可见其兼包四德而贯乎其中矣天体物而不遗犹仁体事而无不在礼仪三百威仪三千无一物而非仁也仁乎仁乎大哉德乎其人之所以为人者乎府掾萧子仁气质疎通仪表魁岸予素奇其人一日至其居爱其雅洁而开豁见其伯仲怡怡竞爽因题曰仁斋乃谢而求其说予故发是义以告之

子钦字说

予友王?先既冠宾友字之曰子钦乃欲予发其义于说庶几终身佩服祈为君子之归予嘉其志进而告之曰?者敬之见于外也钦者敬之主乎中也有诸中形诸外表里如一非伪为也尧大圣人也史臣赞其德冠以钦之一字则见圣之为圣亦无出乎此矣盖朝廷郊庙州闾乡党事上接下敬则成慢则隳立心之要道莅事之切务也是以舜于恤刑命官一则曰钦哉二则

曰欽哉而師尚父告武王丹書之訓首曰敬勝怠者吉宣父亦謂居處執事敬雖之夷狄不可棄也其丁寧拳切之意為何如哉子欽從予游所欲聞者堯舜周孔之大道故予因其字發其要以勉之欽乎欽乎有一言而可以終身行之者其是之謂乎予言切矣至矣蔑以加矣宜書之座右以自儆

伯康字說

予嘗見世之人有不敢康而獲康從康而不得康者矣服勞以養父母勤生以給公上明發不寐放仁義行不敢少自遐逸如是則理順而心安不敢康而獲康志士之為也書所謂所其無逸是也惰四肢而逸豫委庶事于不理問學就荒而弗憂博奕玩愒以為樂如是則欲縱而身危從康而不得康邪僻之行也詩所戒無已大康是也吾宗階庭之秀有曰伯康已娶而不忘燈牕之苦已裕而不廢隴畝之勤養志而無違勞生以務本亦有志之士也今年執經于吾門無寒曝之間有足嘉者欲聞字義故以是告之雖然予也老至而耄及世雖妄推之矣而常歉然于古人不可及為之愧汗浹背雖編離簡斷尚不忍釋況年富力强如伯康而可自怠自棄哉勉旃伯康慎擇而力行之可也

孝力字說

西愚劉先生之長孫曰孝力自幼穎悟予見其可人意招致館下俾諸孫有所矜式日與講論先王之道以待用孝力御下庄以厲衿徒多嚴憚之惜予家涼不能久淹也別數年矣學問日益加進踐履日益篤實近一再會于其里億其辭色似嘆予老邁欲聞其字之說以自儆因念與人子言依于孝況其字有相及予何愛于一言哉于是進而告之曰古人事父母以服勞奉養為切近第一事而服勞又居其先聽於無聲視於無形恒若親之有所教使是以大舜之聖完廩浚井惟親所命子路負米百里次翁受佣以供养休徵守柩于風雨石建為郎中令取親中裨躬自浣洒無非竭力服勞以順乎親則已心安矣不自竭其力不足以為孝豈當委之他人伊川亦謂事親若曾子可謂孝矣而孟子僅云其可未嘗以曾子之孝為有余蓋子之身所能為者皆所當為也今世子弟自敖自逸為長者折枝猶瞋目語難煩白提挈負荷于前縮手旁觀而不顧秉彝受中以生靈于庶物獨不愧于心乎求如孝力惟恐子道之弗盡百無二三焉何世道之薄也父母之恩如天罔極于所厚者薄無往而不薄矣嗚呼世道愈趨愈下一至此哉聞予言者有不惕然于中者耶有不幡然共為子職者耶必將有感于斯文得之

誠孚中字說

予往年以故人館授侯城嘗宿招提之境羨其歷劫如在桃源鄉袞文信公榜署煥如日星可敬可愛因詠調題其壁泊記其慈云道場而始有斯文之好焉于時主院事者霖公也其季存誠信實爽朗酌應適宜人字之曰孚中孚中欲聞其說于予適以歸迫未有以告之去年夏過其里辱止予宿燈下笑曰先生于孚中二字得毋有諾責乎詰旦又以事牽弗果一語而去于今重游有愧仲由多矣于是為之說曰中孚在易下兌上巽以一卦言之為中虛虛則无私无私非孚信之本與以二體言之為中實實則无妄无妄非孚信之實與人之為人存心以虛而

无所偏倚接物以实而无所罔欺果何往而不见信于人哉故彖辞曰信及豚鱼之二物也一躁一冥至难感者也孚信能感于豚鱼则无不至矣而况灵于万物之人乎虽然孚者潜通默化于其中而不大声以色也夫苟形于声色则所谓孚者非中而昧说以巽之义其为感也浅矣岂存心以虚接物以实之道哉师虽游乎方之外而理则不踰是也其亦有味乎吾言也乎姑以是释其字之说孚中尚其勉之

刘闲闲字说

吾乡华盖山有道士曰闲闲行混元教法以济夫人既而丧明然不盲于其心与人语祸福亿中如响远近有奇疾者争迎致之跨一驴从一僮贸贸自西自东无虚日又喜丈词得名士一言荣于华袞屡求予发闲闻之义予以为闲者天下之至福也而闲之又闲乃至福之尤者也而未易得也唐人诗曰又得浮生半日闲又曰能解闲行有几人皆深羨极慕若不可幸而致也惟游乎方之外者则庶几焉盖出无爵禄之縻以劳其心处无妻妾之奉以累其身若可以少自暇逸矣可谓备天下之至福矣而犹卒卒无须臾闲者何哉而又谓之闲闲可乎道士曰天下之理始之不闲者有时而得闲专务于闲者闲终不可得矣诗不云乎不解于位民之攸暨予之闲闲以衆人之安为一己之安以衆人之闲为一己之闲故语其闲非一言所可尽也予笑曰道士辨矣虽然予昔也闻之漆园吏曰大知闲闲小知间间间间分别町畦者也闲闲则从容自得之意矣夫苟从容自得于其心又奚以泥其迹为嗟夫世之人安于闲者不知闲之为乐而往往见小利者之为利而自扰之其于人贤不肖何如也予既书其说以贻道士而亦因以自儆焉

欧阳海旭字说

盖尝观夫旭日之离东海者乎其始也出自阳谷次于扶桑烜烜赫赫苍苍凉凉衆阳之宗孰齐其光彼夫海气之鸿蒙也既进而升若退而藏故旭有骄骞之意然刚而精终焉允臧在易卦为离明在阳爻为君子庸非君子德性之良虽暂蚀于物慾而本体之明不远而复则浮翳孰揜乎太阳贤人君子之在世也譬之皦日当空万民所望欧阳生旦海旭资质开朗学知乡方以推择为吾里巡徼司吏周折回翔未数月慨然曰身体髮肤受之父母吾安能以迟钝日受责于大府而谋稻粱乎遂求代去行之日过予求一言予嘉其志作海旭字说以贻之使知自强云

东旭字说

佛者之徒心昶字东旭住儋岭慈云道場为人谨饬嗜词翰尝从长老云林定公游风致自异西愚刘先生欲予为说以贶之予以尝瞻慈云之岭漓岏巖劣意必有胜俟异日游而悉之为一言未晚也庚申之冬西愚之从子敦复出守浔江予往贺焉西愚与同登儋岭以纵目而畅怀良宵剧谈而知东旭之襟度蔼如也西愚曰东旭之义俟子而发兹非其时乎予媿诺进而告之曰旭者曜灵之光彩也方其升于东也苍苍凉凉或揜或彰跃于阳谷隐乎扶桑与云霞而同出不烜赫而扬光庸非阳德之养晦者乎方今当宁求贤如渴凡吾儒与二氏之翹楚者

莫不登崇授之以政而东旭则寄迹灵山胜地以遯其世兹东旭之所以为东旭也与其寓意微而婉矣虽然此用世法也至若明本然之心见本然之性则当洞洞煌煌无隐之弗烛无远之弗鉴矣师其勉之哉东旭谢曰一切出世法应作如是观稽首而去

麟原後集卷十一

麟原后集卷十二

钦定四库全书

麟原後集卷十二 元 王礼 撰杂着

王氏典郡楷法述

窃闻生日称贺三代秦汉未闻其礼至有唐之盛昉有之盖当是时海内清寧民物殷阜上自宫庭国都下而州里闾巷莫不遇初度崇晏乐以相媚悦沿循至今以为常典于是王公大人之生日门下士争为赋颂以赞功德四方部属竞为瑰奇靡丽之献以希宠幸果何义哉吾庐陵守相王公岳降之辰实六月六日也伏惟登门墙辱顾遇亦一年于兹矣于斯际也道古今而誉盛德既非固陋之所能为而馈仪物奉殷勤又非事大贤君子之道夫以公笃寔英伟之姿正大廉介之 则为此者将宠幸之难希而谴呵之易召也然舍是二者独无一言忠告之可献乎自汉而降郡太守之贤者未易枚举而吾王氏之任郡寄足为二千石楷法亦自代不乏人姑举其所记忆者为守相诵之王尊为安定太守到官出教告属县曰令长丞尉奉法守诚为民父母抑强树弱宣恩广泽甚劳苦矣太守以今日至府诸君更宜勉力正身王堂拜巴庸太守巴庸清净吏民怀惠为之立生祠王朗为会稽太守旧祀秦始皇刻木为像与夏禹同庙朗到官以为无德之君不应祀于是除之王导迁丹阳太守加辅国将军上牋曰今日临郡不问贤愚皆加重号辄有鼓盖有不得者或为耻辱天官混襍朝望颓毁导忝荷重任不能崇浚山海开荆乱源谨还鼓盖加崇之物请从导始庶令雅俗区别王况为陈留太守以德化民永平中蝗起弥山遍兗豫至陈留界蝗高飞不集王居正知婺州大将张浚请于上有田在诸郡丐免征徭居正言兵兴以来士大夫及勲戚之家科敷与编户等盖欲上下同力一心共济国家况将相之臣乃不能体此乎王尧臣知光州岁大旱群盗发民仓廩吏法当死克臣曰此饥民求食耳荒政之所恤乃请以减死论其後遂着为令苟守相行事光明磊落皆如前人则他日名继一王之後传之无穷其为壽祉不既多乎因思昔者开元之际千秋令节侈矣曲江张公不以贵戚近臣之所说者献其君而以治乱存亡之监献其君端平以来达官庆壽亦云盛矣西山真公不以四方牧守之所献者贺时相而以诸葛武侯开诚心布公道集衆思广衆益之说为书以献自当时观之疑若违衆自异者由今观之彼衆人之爱其君相者与张曲江真西山之爱其君相者孰为至耶某之于真真之于张时之相後若此其久而君子爱人以德之意其揆一也守相诚能即前人之所已行益推其类以尽其所未行则太平盛治将由一郡而放之天下岂不赫赫在人耳目哉诗曰心乎爱矣遐不谓矣礼之谓也又曰乐只君子邦家之光乐只君子眉壽无疆守相其有焉故述夫羣贤当世行事之迹揭于公堂以为莅政之助云尔

太守雨辨

洪武七年夏四月不雨郡太守徐侯叹曰频年丰裕民犹无以供赋今禾芟初行而四野尘槁

後將若之何遂偕廬陵王君道亨由青原徧走群望詰朝一雨三日优渥沾足于是懽聲載道咸曰此太守雨也或疑其佞王某聞而折之曰是實太守雨也名之者當子惡乎知惡乎知今之郡守古之諸侯也先王疆理天下畫界分境諸侯各祭社稷及境內名山大川是故太守賢則山川鬼神莫不從令蓋千里履封之內鬼神民物皆其管攝氣機感通分之所至也太守賢且誠山川之氣有不聚而應之乎況出云雨者山川之職也太守賢且誠斯山川效職雨陽順序而民物鬯遂矣雨而歸之太守豈佞也哉昔宋均為九江蝗不入界劉昆為弘農虎北渡河皆山川之靈郡守之賢也物之妖者有以拒之氣之祥者有不致之乎作太守雨辨

縣令箴

廬陵劇邑也平世號難治況今日哉兵亂以來田萊而賦弗寬民匱而用愈急舒城吳侯為邑長于斯也子視其民衆咸德之于是徵丈于邑之庶老以寓美報某不得辭賦縣令箴一首

粵惟縣令擬男于古奉宣德化以作民父母和寧慈君汲有信父謂子懷群黎載摩載抚能名赫赫循吏所弗屑為潁川四長并仁善篤誠人自不欺矧茲甫輯宜綏靖是思譬赤子啼飢而乳之以時猶牧牛求刍鞭服少施是用弗轉于殘羸嘗聞醫師疗人病既少差又慮夫元氣之微猛劑不烝惟參朮是資詢美令君蘇枯起萎志在養生得時措之宜允恕且恭民以弗病匪惟上之供而下焉是浚宜此永譽昌于世胤爰記諷詞庶勗從政

平陽王氏世次志

王氏之先出自周靈王太子晉後為太原琅琊二族太原臨于平陽平陽王氏太原之支也平陽之裔宋季因仕家三山有曰復字子陽洪武三年皇明設科求賢閩省欲得公正耆碩者較群試之藝子陽奉命乘傳二千五百里至禮之庠而委帑焉辭不得命至閩既事子陽乃請曰復系出平陽家乘逸于兵亂念累世單門旅人无宗屬父兄可訪往事惟復粗記其槩愿一語以志源委俾後無忘某忝同姓不敢以固陋辭叙曰復之先可考者六世祖諱伯大宋某年第進士積階至金紫光祿大夫太師資政殿大學士有學有文人稱留耕先生配姚氏封永國夫人繼鄭氏封榮國夫人值國難太師薨於閩謚忠文公葬福寧子男四人伯諱積翁字畊存元初內附授榮祿大夫江西行省平章政事政尚簡靜尋歿于王事上嘉其忠謚忠敏公賜田三千畝芦蕩一千畝优其後人建報恩寺主其祠事俾其子都中襲父爵丞相伯顏奏都中年財十七重任非所宜宜使臨民习政于是授平江路治中改浙東副元帥历福建海北宪累官至正奉大夫江浙行省參知政事廉介自持篤學下士令譽翕然既歿謚清獻公父子俱葬姑蘇子孙因家焉仲諱某仕至朝請大夫循州路同知号竹窻歿葬懷安叔諱剛中由提刑按察使改婺州慶元總管兼府尹陞中奉大夫江東淮西福建三司宣慰晚号中齋娶洪繼陳亦葬懷安季諱光祖中大夫寶慶路總管号南湖散人歿葬晉寧循州寶慶之後寢以微絕惟宣慰公有子曰畿授福安尹改永福尹字雪屋娶黃氏封宜人歿葬懷安永福之子曰让字仲漳州務提領历閩安高泉巡檢長泰簿福建鹽運司監運除敦武校尉上杭簿娶蘇氏祔葬懷安子男二人長即復建寧倉官历泉州市舶庫提領侯官務大使福州路録判而世易矣次曰友諒兩浙鹽運司奏差早世某惟平陽之族盛衰于漢唐五季之際者不可知而由宋迨元簪纓烜

赫在人耳目犹尚如此呜呼非世德之隆曷臻是哉子阳谦厚笃实有乡曲之誉无势利之竞兢兢焉惧隳其家声恶知汉世以清廉着名者不复见於今日某故为着述平阳王氏世次志一通俾藏于家使後之覽者重本原之思怀笏组之旧力学以发其身作善以亢其宗异日将门有将相门有相不在兹乎不在兹乎

瘞犬志

余任顛时寓家于雩有馈黑犬雏者稍长代猫有功动静率解人意主适外必随叱之返旁徨帖耳不忍去回数十步驻足目逸远不见冠盖始还舍迨归俛首俯伏若拜不自休後二年浮家东归家僮摇樵艇载鸡犬器皿尾余舟行下皇恐滩纵之岸忽风顺湍驶不得收自断必失乃穿灌翳望舟疾驰百余里舟至亦至严霜必卧篷上若防警然过家家久墟矣狸兽交迹虽无鸡无能畜者自是巷曲晏然时夜繁滋亲戚有及门者曰斯犬日深衔濶趾密而尾轻猎材也惜无人出之负其骏耳假以合围不献其技而逃归数日复求易之余止之曰彼必不肯违旧以从新归而有阻利他人矣是冬复辟地曲溪永和书画米粟悉置楼上犬未始登楼鼠引几夜增竹柝驱之卒莫能禁犬在下叫噉不胜其忿于是令童竖掖之以登楼次夜即不待掖已而升降甚习闻影向即至捕获无遗囊橐不废坏皆其力也近病癖赤立怜其寒命女僮衣以废襦越数日将毙适有山农艘楫至者愿输数擎得之余曰斯犬相从危难之间有功多矣忍令人烹食之耶毙即深瘞墙陰实壬寅腊也嗟乎受衷秉彝以生者食君之禄不肯致身以除害又安然违之余恶乎不悼斯犬之丧予恶乎不悼斯犬之丧作瘞犬志

策问

问仲尼洙泗之教陶冶贤愚初无厚薄增损于其间然观其异同之际去取若有可疑者其使漆雕开之仕也开对以吾斯之未能信则悦其论乘桴浮于海子路闻之喜则曰由也好勇过我无所取材夫漆雕开拒夫子之言是与夫子异见者也而夫子反进之子路喜夫子之言是与夫子同趣者也而夫子反贬之岂圣人于群弟子不欲其苟同也与然三千之徒顔子最善学夫子者也步亦步趋亦趋终日不违于圣言无所不悦是亦类乎苟同者也圣人又何为而深取之耶其必有说愿相与辨之

问圣学之大原夫子以一贯授曾子尽之矣而曾子之语门人乃不曰一贯而曰忠恕何与子思子亲出曾氏之门而其言则曰忠恕违道不远岂忠恕自忠恕而道自道与师生之说若不相似然其旨安在夫子亦尝告子贡以一贯至答终身行之之问而蔽以恕之一言而忠不与焉其去取殆必有说也孟氏愿学孔子而绍曾子子思之正传其论自反则释恕而言忠其论求仁则释忠而言恕忠恕果二道耶果可分而言之耶凡此皆疑而未谕者愿明以告我

问若圣与仁则我岂敢是其道至大虽圣人有所不敢居岂他人所能与而周公之制礼列仁圣于智义中和之间并举以教人且以此待天下之学者而无所轻重周孔岂殊道耶孔子答子贡博施济衆之问曰何事于仁必也圣乎是仁之与圣有优劣也且仁之一字夫子所罕言然其立言其问答及于仁者不可数至于圣初非夫子所罕言而载于论语反不若言仁之多

又何也夫子许伯夷以仁止目之以贤孟子许伯夷以仁遽目之以圣其说复安在耶

问语曰穷经将以致用所贵乎致用者必储实理育实材而求实效也今之学者论学则宗孔孟论治则主三代论保民则曰发政施仁省刑薄斂论律身则曰孝弟忠信礼义廉耻发于言笔于纸非不粲然可观也就而索之则冥然而昧也枵然而虚也意者骛于空言而未尝从事于所以言而求实用耶今姑与诸君商之孰不言圣学之当明也诸君各指寔见志当何所期力当何所用孰不言王道之当修也诸君各条实事何者而为纲何者而为目佛老乱真者也勿徒曰清虚寂?盖的言其乱真者安在申韩害正者也勿徒曰刑名术数盖确论其害正者孰存凡此数端具以实告毋徒袭先儒之遗言作书生之陈语以仰称明天子教养之实德斯不负诸君之实学其悉心以对

问科目之设三代以上不可详经典所载莫盛于周大司徒以六德六行六艺教万民而宾兴之可谓本末兼该内外毕举矣汉兴有孝弟力田之举有贤良方正之科自时厥後秀才孝廉二科常行唐则秀孝衰而明经进士独盛宋因唐旧至王荆公始变其法罢明经而取进士其法果可常行与或谓汉之选举有以启西都良吏之盛宋之科目有以成庆历诸君子之风然与否与历代制科所以待非常之士将非常之士必待制科而後出与近代安定胡氏教法则有经义治事二者之分明程子奏疏则有经学性行才能三者之目考亭朱子贡举私议则有所谓各处解额半取德行半取经学三先生之说同乎否乎将安所折衷而可以合于古宜于今愿相与究之

激孝

永新龙潭洲有业一舟以食者周其姓酉一其名元季之乱辟地庐陵篁灞有父年近八十不敢须臾离有所适无远近必稟命乃行归期无敢晷刻爽父不见即呼之既至了无所云而酉一恂恂侍侧无几微厌怒意随所得必市甘脆以养常戒其姊与妻曰老人体犹枯树不能饥寒饮食贵及时且宜燠姊与妻亦遵其言而酉一有未及亲视犹慊然于中其後父益老病且殆时酉一受人直拟运粮入郡城或劝其留老病者于在岸之舍俾姊与妻时其药餌在舟倘不测悬隔累人酉一曰吾一时不在亲侧将亲之心与我之心俱有不得其寧者焉遂载以俱至郡城外夜必望斗拜且吁曰细人有父艰食矣度命在朝夕愿少延余息俟归至篁灞则不子之罪庶其寡乎果如其祷归及灞岸始絶衣衾棺斂顺便以葬之人谓其孝感左君齐贤每见予辄道其事亟嗟叹之且曰今世簪纓之门诗礼之族其宫室妻妾车马佩服之奉下视酉一之微贱曾不若土芥而尽孝不愧於斯者几何人哉又曰人之不能事亲者多诿曰失学酉一曷尝读书而纯孝若是读书者或愧之岂读书者骛于空言而忘其实践耶又曰父子天性恶有後其亲者无亦古人所谓孝衰于妻子欤齐贤永新簪纓诗礼之裔亦侨居篁灞三世矣故悉酉一之孝行而言之若有所激嗟夫君子取人之善岂以门地哉予特笔之以愧夫蒙鉄炉步之名而甘落黄?郎之下风者且易酉一之字为益友以进之云

送吴茂卿东还引

茂卿良士吉郡名家少负不羈之才蚤有远游之兴三十年豪族岂能局促如辕下驹千里归来但觉回翔似辽东鹤孰两东门之芜可觀或三荒径之菊犹存报本追远而事鬼神尊祖敬宗而修谱牒卓矣超群之见藹然怀旧之心奈于帝王之畿既以占籍是以父母之国亦许驻?望并州而是故乡思颍水以偿夙志但亲戚慰悦初盍簪于契濶之余而仆夫仓皇又舣舟乎炎蒸之汧于兹分手亦难为情爰各咏于离声庶少光乎行色凤城朝雨不须唱彻于阳関鹭渚秋风更冀有怀于杜曲一言为引多士遂歌

讼龋齿文

江南生久入耆龄忽患龋齿遇羹藿而俱拔犯酸坚而辄死饮则衅生饭常中止风耶蠹耶厄我如此昔也排拶今也硃豁龋龋孔开齧齧锋缺坐观狼餐枵腹其侧骨鯁之旧久踈鱼虾之侶新接当喜而忧不瘖而默淳于傍观?手无策生乃斋沐歛衿叩身之神再拜肃穆冀其垂聽若曰物禀气偏牙角翹然人灵万物数齿弗坚厥咎伊何内省其愆岂若豪夺之家弱肉强食弗安其分独肆已力惟思我肥寧恤彼瘠致天之罚使至斯疾岂若贪冒之吏嚙民膏脂掊克聚歛并缘为欺磨牙张口如虎如貔溪壑难满节齟齬搥召身之殃使阽于危顾生所事出入文字非义弗由非礼弗履何罪何辜遭此祸螫明以语我过不可式毋苦微躬未疾淫滯时夜将半有风飒然灵兮神兮恍惚言传谓生之微志行莫先齟齬经嚼史?英咀妍远溯太古旁搜百家唇腐齟烁摇其辅车谈王说霸守正斥邪子之疾恶奋怒穿龈子之厉 漱石求清皦皦者易污容容者葆真人之致疾亦各有因胡不此思而忿云云吾将以尔之诚上達于帝增尔智牙锡尔儿齿使既有年亦受繁祉勅尔天君饱尔仁义播告天下饫尔甘脆生闻是言深省潜砭舌利速殃齿刚有玷惩违改忿形迹靡见闭口藏舌没齿无怨

遣疟鬼文

疎放翁系出太原世为清门总角读书无他技能生产不事淡泊无营今者店神倏尔下顾先寒後热汗液如注沾衾浣席饮食错迕顾惟老身何堪频数敢告尊神试聽吾语牲醪非吝我实寒素谨备洁粢冥钱一筐用愬愚衷遣子以行我居此土兎处狼窟初喜民淳今苦蠹贼外则强佃田不税纳年深月久报为己物里役受私掩蔽其册内则强类盗货产业诡诈百端非?秦舌恃其裕美欺我老拙暮景艰行蹇骖代步耕圃不樊独见嗔怒时夜出闲泽彼鬻釜彼恶弗寻顾我实误陰府甚明岂容火度吾辞已殫各问津路登舡上车请从此去

题兰竹

兰葳?而下垂竹回薄以斜起澹与泊其相遭保幽贞乎终始

赞红梅障

春动芳郊时节默染臙脂香雪休疑冶杏夭桃犹带冰霜标格

赞彭志高行乐小引

其昔也有凌云之志谓功业为可必其晚也有傲霜之姿以诗书为燕翼脱略风尘徘徊松石羽扇竹冠逍遥自适使邂逅乎山泽之臞未必不以为竹林之逸也

赞龙图

潜则在渊见则在田德施之普拟圣配乾于嗟龙兮

赞虎图

藏或负嵎用或守閤感德渡河叛夫胆寒于嗟虎兮

赞忠孝图

道是葵萱障也得道是忠孝图也得莫言草木无知也具人生大节噫人见此花慙无惭色美尔倾心向太阳美尔忘忧树堂北

赞猫犬图

维猫维犬维家之宝鼠窃穿窬莫我敢暴或无寐以防奸或素餐而忘报载绘尔容非资玩好昔图功于麒麟托久远乎丹青念尔劳之交修爰用播其芳馨重为告曰有形必神有功必祀蜡典可推有引无替各聽誓言勿荒女事我服我器暨我书契举切吾身一不可废毋使嚶嚶聲聲祇搅我睡于嗟乎蒙贵

踰垣沃枢柳下之弟罄人所藏欲忽以游遇则尽死以嚙毋徒声吠于嗟乎善噬【犬曰善噬】

词

喜莺迁

甘霖停溜喜浩荡湛恩跻民仁壽戍柳拖金海棠染绦报道宰官移绶转眼积劳三考犬卧更深犹昼最好处似冰壶玉露十分清寥 难有看里巷此日壮夫都是来时幼笄鼓迎风旌旗耀日旋筑草堂完就自今四时纳福遥对溟山如綉愿岁岁共桐乡父老一卮春酒

百字令【壽老妻八十】

晨看婺女正流光垂照耆昌堂里只为佳人延眉壽影入玉杯迎喜莫道春秋八千八百玄远

都难拟人生稀七古来登八能几 眼见绕膝孙枝烹羊脍鲤也有些肥美淡饭恶衣聊自足多
少何能如你夫是谪仙金銮待诏妻亦寻常比随缘相守安贫况是王礼

题疏

华盖山题钟疏

永阳之上曰华盖山寔万姓祝厘之所革命以来缺蒲牢物昧五更深省之时况逢道宇之苟
完岂有异气之可掘敬资檀越谋就工倕结千人缘庶洪炉之一泻成九乳器将远韵之咸闻
警尘世之昏迷作神天之供养春生笔下霜动人间谨疏

东山题疏【为无诤长老作】

伏以东山胜地实野史翁之故基【龙袞七举不第着江南野史】西域法源有达奚师之遗
迹记明月清风之旧【寺有明月阁清风桥】兼茂林修竹之幽岂期大地黑灰空慨前朝黄
叶遂归天竺庶见雨花事有大谬不然乃鹊巢而鸠处退将修吾初服或鸟革以翬飞叩诸贤
豪发大欢喜莫令龙象久泣所望给孤将见金碧交辉真如兜率谨疏

题东陂甃砌桥疏

东陂石桥利便非一日矣年深月久桥屋尽颓砖亦散落过者危之习溪庵僧广无量与东陂
桥隣谋择残材作亭其畔以休行者而化缘砖石重甃补之整旧为新方便第一予闻盛举遂
赞一言

伏以东陂一派实会梅花水源千涧之流此路两头远接茶陵湓浦数郡之境日千万人商旅
愿出岁十一月徒杠乃成长者後來遂建石桥为千年之计遐哉深虑孰知屋瓦亦历刼而飞
今欲砖甃如砥之平必须工徒如云而集非资乎力曷底于成况拟择破?之材作亭於其侧庶
往来困?之客弛担乎其间苟于财谷倾困倒廩而惠然将见子孙高车驷马而过此好事好事
大家大家谨疏

上元院题钟疏

上元为院二百余年矣代迁世易涉难摧残近来竭力修葺虽近苟完而奉佛无钟实为缺典
用持矩疏敬叩大檀

伏以院曰上元亦数百年而已久俱如钟器非寻常匠所能成欲求鳧氏之骏功必藉孔方而
聚力大檀那除一毫于瓊上小和尚铸千斤于寺中暮暮朝朝长作人天之供养鏜鏜鍠鍠悉
令神鬼以皈依功德无边民人有赖谨疏

杂说二首

至正乙未春礼筮仕安远见有捕鷓鴣以媒与为花园?鱼者有感于中作二说

山鷓鴣雏既长分其所食山谷于雏使各有分地有鸣其界者雏辄往鬪而争焉土人知其性褊而好鬪捕他雏养以为媒置其界而设机絜媒鸣闻者耸其项忿然轻身以先竟被絜获无能脱者惟老雄虽有鬪志进若迟上若思其雌又遮道劝沮之故?者最寡呜呼世之褊而好鬪不能且迟且思以受劝沮而堕于罟獲者岂惟鷓鴣也哉

渔人编筱为围罩溪涧中名曰鱼花园立橛悬置水之半列石缀其趾设閤楫于围中采稻穗之嫩者饵诱之其始至喁喁圉圉且食且疑不尽而逝再则引群携类洋洋自恣穗日加鱼日衆饱食满意而去以为常如是者旬日始系穗于閤楫鱼犹旋绕贪食恐後踊跃如游龙少焉牵系而楫发石确然坠围以下渔者攘臂而至矣余观斯鱼也遇倘来之物饱食满意而不知止使知快意不可常而中去斯不蹈确然之祸矣而竟殒身以偿之噫

麟原後集卷十二

麟原后集附录

附錄

元广东宣慰使司都元帅府照磨王公墓志铭
赐进士第中顺大夫詹事府少詹事兼左春坊左谕德经筵讲官阙里孔公恂撰

麟原先生歿于洪武丙寅四月二十六日以戊辰十二月庚申葬於中村其高祖运属官之墓後距今成化改元乙酉七十有八年其族孙大理公槃以其曾孙谦所奉圻志来请铭予与大理公旧同寅也谊不可辞按志先生讳礼字子让姓王氏世居庐陵之宣溪自号清和道人因所居後有憩麟山学者称为麟原先生曾祖维翰祖公涂父斯觉俱隐居弗仕母刘氏先生生而聪慧好读书事亲孝五岁就学揖让进退俨若成人八岁四书经传皆通习之十岁即有志于科第出就外傅习举子业年十五作文 笔立就老师宿学皆叹异焉十八试於有司与群士争衡至正十年庚寅以诗经魁江西有司以名闻十一年授安远县教官十三年循民弄兵掠汀州攻龙南于是安远顽民作乱十五年贑州路总管噶海齐以先生尝典教是邑令奉诏往绥之蛮獠砺兵刃弦弓矢以逆于境先生谕其父老曰吾奉诏辑安汝民宜改过自新毋自速咎使妻孥得保首领以歿顾非幸欤若负固肆暴一旦天兵远临父母昆弟并遭擒戮悔之何及汝宜思之父老再拜谢曰明公教以生道敢不自悛叱其子弟令各归舍解甲为农于是远近居民悉遵化贑州移文省宪议功十六年授兴国县主簿未几以亲老辞归江西行省参政沁布阿咱尔闻而嘉之遂辟参谋幕府越明年迁广东道宣慰使司都元帅府照磨十八年噶海齐为江西行省参政总戎贑州复召先生归幕府参赞军事九月陈兵?贑沁布阿咱尔与噶海齐俱死所领兵亦溃先生偕都事巴延子中收余兵栖天封意图恢复而世事日非矣乃取道过雩明年挈家下贑又明年归庐陵而乡里莽为邱墟民不遑处二十二年江西内附遂构堂于古城旧址乡郡学者争师之洪武纪元诏兴学校郡守王君泽以书币延至于郡庠为学者师洪武庚戌设科取士于是福建广东藩臬奉诏礼聘先生为考试官继又江西湖广书币交至皆以疾辞弗往八年诏行鄉饮酒礼郡守徐彦中以先生老于文学固请为宾讲明礼法九年四明乌斯道知奉新县事复迎处宾位多所咨问焉先生自少至老嗜学不倦其于六艺之文百家之书靡不阅覽尝类群贤之诗名曰长留天地集沧海遗珠集行於世复辑官箴一帙名曰为政规范俾官守者得以法焉每于严冬冰冻辄减米以济贫者鄉隣德之元季以来科举法废先生遂工为古文是时前进士江浙提举云阳李公祁国子司业西昌刘公崧翰林学士金华宋公濂每见先生之文咸推重焉乱後文多散逸其所存者百无一二名之曰麟原集生元延佑甲寅正月四日壽七十六配吴氏有贤德子男三人长楫次朴次枢楫枢先卒女一人适固塘文氏孙男四人士頔景蘧希晏慕侨曾孙男十三人谦其一也铭曰

仁者必有後而後未必多贤吁嗟乎先生簪组绵绵德者必有言而言未必能传吁嗟乎先生道义兼全道以淑人义以制事惟所在而能安故俯仰而无愧中村之阳有幽其堂勒铭斯藏百祀不忘

麟原後集附錄